

萬 有 文 庫

第二集七百七種

王 雲 五 主 編

湖 海 詩 傳

(一)

王 昶 輯

商 務 印 書 館 發 行

湖海詩傳

(一)

王昶輯

國學基本叢書

古人選詩者有二。一則取一代之詩。攝精華。綜宏博。并治亂興衰之故。朝章國典之大。以詩證史。有裨於知人論世。如唐文粹、宋文鑑、元文類所載之詩。與各史相爲表裏者。是也。一則取交游之所贈。性情之所嗜。偶有會心。輒操管而錄之。以爲懷人思舊之助。人不必取其全。詩不必求其備。如元結、殷璠、高仲武、姚合之類。所謂唐人選唐詩者。是也。二者義類已不同矣。予弱冠後。出交當世名流。及游登朝。寧、敷歷四方。北至輿桓。西南出滇蜀外。賢士大夫之能言者。攬環結佩。率以詩文相質證。披讀之下。往往錄其最佳者。藏之篋笥。名曰湖海詩傳。忽忽將六十年。而予年亦八十矣。去歲自錢塘歸。發而觀之。則向日所錄。蟲穿鼠蝕。失者十之二三。詩中之人。長逝者亦十之八九。并有聲消跡滅。無所表見者。是不得不急爲傳世也。因屬同志。編排前後。復稍加抉擇。要不失乎古人謹慎之意。共得六百餘人。編四十六卷。以科第爲次。起於康熙五十一年。迄於近日。其間布衣韋帶之士。亦以年齒約畧附之。而門下士并附見焉。視感舊篋衍二集。多至一倍有奇。亦云富矣。問以遺聞軼事。綴爲詩話。供好事者之瀏覽。雖非比于知人論世。而爲懷人思舊之助。亦庶幾元結諸公之遺。至于往時盛有詩名。而爲投契所未及者。則姑置之。蓋非欲以此盡海內之詩也。然百餘年中。士大夫之風流儒雅。與一國家詩教之盛。亦可以想見其崖略。或不無有補於藝林云。嘉慶癸亥中秋王昶書。

湖海詩傳目錄

卷一

程夢星

張梁

查爲仁

許廷鑠

卷二

厲鶚

錢陳羣

盧見曾

顧棟高

戴亨

沈起元

蔣恭棐

尹繼善

張廷瑒

王安國

樓儼

卷三

汪由敦

王峻

李重華

劉統勳

陳浩

嚴遂成

卷四

張元

蔡德晉

鄒一桂

彭啓豐

呂熾

楊錫紱

梁詩正

孫灝

商盤

許開基

卷五

嵇璜

英廉

方觀承

陳祖范

周宣猷

彭端淑

董邦達

金德瑛

秦蕙田

蔡新

劉綸

諸錦

杭世駿

卷六

陳兆崙

沈廷芳

夏之蓉

齊召南

符曾

陳撰

朱稻孫

陳章

程廷祚

翁照

馬曰琯

馬曰璐

張庚

陳黃中

胡鳴玉

楊潮觀

曹秀先

卷七

宋邦綏

觀保

德保

錢琦

王會汾

喬光烈

阿桂

祝維誥

高瀛洲

袁枚

卷八

沈德潛

卷九

程景伊

裘曰修

儲麟趾

李繩

姜恭壽

申甫

曾捷宗

楊述曾

竇光鼎

章寶傳

鄭虎文

王太岳

廖運芳

熊爲霖

陳宗達

卷十

夢麟

錢維城

蔣元益

閔鶚元

李友棠

宋弼

江權

卷十一

盛錦

周準

陳魁

顧詒祿

韓騏

李果

鄭廷陽

金農

沈之亮

陳臯

吳燻文

趙虹

卷十二

張錫爵

王爾達

王愨

蔡瓏

葛景中

沙維杓

張崗

胡承祝

過春山

朱研

朱昂

易諧

陸貽穀

沈懋功

邵玘

王本蕃

王玖

卷十三

梁敦書

廖景文

王鳳儀

王秉韜

邵齊熊

梁國治

汪廷嶼

朱珪

馮浩

錢汝誠

李中簡

張裕榮

邵齊然

劉星煒

查禮

余慶長

吳翀

黃文蓮

王元啓

卷十四

劉壙

譚尙忠

周於禮

穆丹

惠棟

陳鴻寶

吳焯

褚寅亮

邵嗣宗

梁同書

錢載

秦燮

周天度

董元度

紀復亨

沈清任

張鵬

卷十五

翁方綱

顧光旭

蔣宗海

周大樞

陸燿

袁文康

馮廷丞

阮葵生

周震榮

張五典

胡溶

吳維鏗

吳桂

梁夢善

朱休度

朱休承

盧鎬

施養浩

王日杏

賈虞龍

陳文錦

卷十六

王鳴盛

紀昀

錢大昕

王又曾

卷十七

倪承寬

胡紹鼎

朱筠

翟灝

平聖臺

蔡書升

葉佩蓀

沈業富

曹學閔

杜玉林

范家相

薛田玉

于宗瑛

汪永錫

李昌昱

劉鑾

周春

鄭來祚

卷十八

沈大成

朱方藹

閔肇

陶元藻

朱楷

華玉淳

華淞

江昱

江恂

江立

王廷槐

徐薌坡

林如璋

高景光

卷十九

陶璉

張棟

莊寶書

查岐昌

徐堅

黃之紀

薛龍光

葉抱崧

劉潢

金紳

陸藻

陸藝

涂逢豫

江春

毛大瀛

陸授詩

卷二十

盛百二

朱雲駿

劉秉恬

凌應曾

蕭霖

袁文典

蔣業晉

徐作梅

陸惇宗

曹錫寶

李漱芳

周嘉猷

彭元瑞

卷二十一

蔣士銓

彭紹升

吳寬

孫永清

張遠覽

彭光斗

陸遵書

張銘

張時風

卷二十二

畢沅

諸重光

王文治

吳璜

程之章

吳楷

謝啓昆

錢受穀

王曾翼

裘麟

卷二十三

吳泰來

王宸

祝喆

徐觀海

申兆定

張應均

卷二十四

胡高望

趙翼

陸錫熊

卷二十五

曹仁虎

顧震

吳玉綸

李文藻

嵇承謙

蔣雍植

吳興宗

馮應榴

崔龍見

儲祕書

沈士駿

卷二十六

趙文哲

卷二十七

張熙純

嚴長明

鄭澧

錢維喬

朱孝純

金學詩

馮兆觀

蔣雲師

卷二十八

沈初

韋謙恒

姚甬

王嵩高

蘇去疾

李集

祝德麟

董潮

吳森

吳霽

卷二十九

褚廷璋

吳省欽

施朝幹

羅有高

張塤

萬鍾傑

奎林

卷三十

張四科

汪棣

鄭炎

陳鴻賓

楊懷棟

朱維魚

金式珪

朱維藩

蔣業鼎

朱漢倬

朱澤生

朱位恭

王鳴韶

諸廷槐

汪 昭

林大中

張允武

朱 璿

許兆桂

張夢喈

張夢鼇

王 芳

曹錫黼

張登晨

邵一炎

陸文啓

陸文蔚

何王模

金鴻書

朱位行

王陳棟

王陳梁

卷三十一

汪孟銷

朱 炎

金兆燕

謝 垣

沈世煒

孫志祖

彭 禮

徐以坤

陸 敬

陳初哲

陳嗣龍

任大椿

陳 朗

伊朝棟

潘奕雋

吳壽昌

龔敬身

程 沅

王 璜

戚蓼生

于鼈圖

印 照

嚴 翼

卷三十二

程晉芳

邵晉涵

周厚轅

魯仕驥

徐長發

錢 澧

洪一朴

伊湯安

彭 淑

汪端光

卷三十三

鄒炳泰

毛上哀

許兆椿

李堯棟

吳 俊

李 棻

鐵保

馬緯雲

董詔

秦瀛

吳蘭庭

趙希璜

高文照

溫恭

吳錫麒

范來宗

顧宗泰

曹錫齡

李廷敬

嚴福

宋思仁

陳繩祖

王啟焜

卷三十四

黃景仁

程夢湘

蘇加玉

殷如梅

朱士廉

朱履長

韓是升

徐麟趾

金夢麟

陸象拱

卷三十五

楊芳燦

吳照

金慰祖

汪中

李旦華

黃駢

陳樹華

卷三十六

張誠

宋大樽

趙秉淵

馮培

馮敏昌

管世銘

錢世錫

李鼎元

王元勳

徐大容

汪如洋

江德量

法式善

吳樹萱

謝振定

吳蔚光

錢塘

程際盛

陸伯焜

史國華

卷三十七

楊揆

趙懷玉

王鼎

汪學金

曾燠

陳廷慶

楊倫

馮集梧

俞廷楡

沈景熊

邵培德

李驥元

潘奕藻

呂星垣

邱思燕

卷三十八

王復

徐書受

何青

胥繩武

劉大觀

王初桐

余鵬翀

黎簡

朱彭

曹秉鈞

朱文藻

金德輿

金廷榮

卷三十九

黃易

羅聘

汪履成

陳焯

吳騫

方薰

翁春

慶蘭

吳鈞

蔣元龍

王開沃

王翰青

趙汝霖

莊師洛

徐文錫

孫魯

鍾駕鼈

汪大經

周厚培

張雅宗

萬福

石渠

卷四十

徐榮慶	余鶴年	孫星衍	楊夢符	何道生	汪彥博
梁履繩	朱文治	王芑孫	邢彥成	阮元	伊秉綬
張錦芳	王廷蘭	洪亮吉	張問陶	桂馥	李膺芸
張若采	洪坤煊	余煜	詹肇堂	吳本	英和
葉紹樞	唐仲冕	章嵩生	孫爾準	顧張思	王文潞
何錦					

卷四十一

朱宗大	張燕昌	邵志純	余慶遠	錢大昭	陳燮
-----	-----	-----	-----	-----	----

許宗彥	鮑桂星	吳鼐	樂鈞	錢林	陸學欽
-----	-----	----	----	----	-----

沈端	繼昌				
----	----	--	--	--	--

卷四十二

吳嵩梁	陳文述	郭塋	葉紹本	汪庚	張興鏞
-----	-----	----	-----	----	-----

顧蕓	王世錦	王尙珏	馮金伯	史善長	王炘
----	-----	-----	-----	-----	----

邵步瀛	王汝翰				
-----	-----	--	--	--	--

卷四十三

張興載

沈靖

徐熊飛

金棻

蔣莘

蔣徵蔚

蔣夔

張彥曾

卷四十四

郭麐

徐葵

王槐

王豫

蔣炯

何元錫

姚椿

楊文蓀

吳引年

蔡元春

袁文揆

胡篤年

卷四十五

華瑞潢

高岑

施晉

朱鐘

陳詔

項墉

胡量

袁廷禱

陳基

陳達

方燮

鈕樹玉

楊之灝

朱桂

湯禮祥

何其偉

李福

徐雲路

石鈞

李方湛

金學蓮

李斗

周中孚

董國華

陶梁

楊惕龍

楊試昕

徐弼

朱壬

吳擘

于淵

戴延介

吳傑

章柱

邵保和

王紹舒

王莊壽

卷四十六方外

明中

篆玉

實源

逸雲

湛汎

性仁

達澄

達瑛

清恒

默可

際祥

覺銘

劉敏

湖海詩傳卷一

程夢星

青浦王昶德甫輯

字伍喬。又字午橋。江都人。康熙五十一年進士。官編修。有今有堂集。

蒲謁山房詩話先生淡於榮利。自丁內艱歸。終身不出。築篠園並澗。別業讀書。偃仰其中。竹西故
南北衝途。往來逆謁者。文酒流連。主詩壇幾數十年。詩兼法。唐宋而雅。好在玉溪生。以雪灘叟注未
精。重爲箋注。其集中句。如碧流似帶。環雙峽。青嶂如屏。抱一村。十里烟深。因近水。一年秋早。爲多山
芰荷風。自浮輕幔。羅綺香多。過別船。女牆宿草。經春綠。古渡斜陽。照水紅。軒因惜竹。三間小。樓爲看
山四面寬。一院雨聲。聞客後。半窗梅影。上鐙初。滿塢雲深。紅杏雨。一溪煙澹。綠楊風。花落尙攜沽酒
盞。湖來爭泊。賣魚船。皆清麗。可誦。予少客竹西。暇日過從。門庭蕭寂。門茶馱餅。仰其風貌。不啻孤雲
也。整鶴

五祝樓詠五首

鹿門子以五瀉舟。華頂杖。太湖研。烏龍養和。訶陵尊。贈毘陵魏處士。作五祝詩。余齋中無長物。有
洪源方竹丈。一漚子琴。綿津研。五茸筆格。味諫壺。皆友人所遺。壬戌夏於齋前構小樓落成。以此
貯之。題曰五祝樓。余何足以方處士。而惠贈諸君。則鹿門高致也。因繫以詩。

洪源方竹杖。洪源萬化谷。去岑山五里許。谷中多方竹。取以爲杖。枝節稍短。而方整明潤。絕勝天台所產。

洪源故鄉人。惠我園中竹。方外而虛中。寶此數尺玉。柱上蓮華顛。晴空寄遐矚。

一 瀛子琴

一瀛子明隆萬間僧悟言也所藏琴云賜自神廟流傳三陽處士汪敕盤敕盤歸道山其子以余愛琴因寄贈焉

孤桐斲秋琴。散音傳葛嶧。昔聞奏雲門。禪榻曾寄迹。臨風時一彈。何似山陽笛。

綿津研

綿津山人端溪研舊有銘舍人余葭白得之贈余

商邱研有銘。胡爲落市肆。舍人偶得之。精英肯自秘。愧我不中書。永負良友遺。

五茸筆格

雲間僧蔭寶有竹筆格中半剖凸其背滑淨如脂余以詩乞得之

梵夾安筆格。形質何離奇。老僧解吟詠。余乃乞以詩。還期山心室。共參玉版師。

味諫壺

天門唐南軒節丈齋中多砂壺有狀如橄欖者或憎其拙余獨謂拙乃近古遂枉贈焉名曰味諫

義興誇名手。巧製妙圓整。茲壺獨擁腫。贅若木之癭。呂申公有木癭壺詩一盞回餘甘。清味託山茗。

四月二日登康山。喜環山歸自新安。各賦五言古詩十二韻。

康山近市廛。頻年遊跡杳。何況家新安。江峯隔浩渺。今日遂伴過。高堂坐清曉。時維四月初。節候尙春杪。荒榭隱深林。曲逕餘蔓草。有客卸帆歸。來自桐廬道。煙巒盡入手。歷覽衆山小。視此城東隅。那足事遐討。余謂豁心顏。一邱亦自好。昔賢急友難。繁弦寄窈眇。我輩殊蕭閑。隨地攄曠抱。底事返天都。扶筇躡雲表。

雨後過讓圃登樓野眺以韋蘇州綠陰生晝寂孤花表春餘句分韻得綠字

積雨生夏寒。輕煙放晴旭。勝地游故頻。佳招諾敢宿。耽吟有舊侶。力疾但朝粥。城遠喧不聞。樓高紛可矚。隔溪餘夕紅。羅戶雜新綠。麥壠尙微波。村徑自歸牧。古宅感廢興。清襟比風浴。願傍開士廬。更結野人屋。

重訂箋注李義山詩刻成題後

西崑無鄭箋。遺山昔招悵。況我千載下。敢窺秘密藏。虞山箋杜陵。惟此亦推讓。朱氏本道源。注釋未云創。所惜作詩意。蒙昧若煙障。要非抉其微。何以發高唱。時從獼祭外。一洗優孟樣。楚雨縱含情。其義某竊諒。穿鑿固不免。論說或非妄。但求古人心。寧避世俗謗。想其不羈才。詎肯牛李傍。君臣朋友間。厚意誰與亮。美人怨芳草。遂至北浮浪。豈知寄託淡。直追風雅上。荆公是知己。謂與少陵抗。杜箋匪一家。往往共頌頌。梅溪有蘇注。司諫更精當。疑誤藉改定。後先寧礙妨。管中窺豹斑。聊用志所臆。

登看山樓觀殘雪用東坡聚星堂雪韻

歲餘莫莢才六葉。雅集消寒觀剩雪。小玲瓏館最清閑。樓上開眸迴幽絕。蒼松倚石老不凋。翠篠橫窗低欲折。萬鱗堆瓦瘦逾明。一桁遮牆淡疑滅。已無亂影作花飛。還有殘光驚電掣。依稀遠岫露眉痕。約略平池舒面纈。蕭齋呵研試烟丸。暖閣圍爐添炭屑。簷前霜重多倒垂。林際風迴尙斜瞥。聚星復舉潁州令。冷然亦效汝南說。許有孚觀雪冷然壑詩豐年但願太史書故事須從汝南說酒闌更擬賦廣平。莫笑詩人心似鐵。

布泉歌

乾隆壬戌冬杪。西域人黑某攜青綠古器來售。中有布泉千餘。云山左鄉人掘土而出者。余爲檢視得六十四種。惟平陽安陽可辨。餘不盡識。攷春秋有平陽。漢書謂之東平陽。史記王子侯表。安陽侯桀。濟北貞王子。索隱表在平原。大抵皆漢時物。諸家泉譜。布泉十品外。載異布不過十餘種。未有若斯之多者也。因購得之。作歌。俟精於古篆者考證焉。

黃虞泉制杏難攷。秦漢鑄造還堪追。一刀兩柱別朋貝。五銖半兩分龍龜。天鳳以來創十布。紛紛名目莽所爲。降至後代祇圓法。貨布盡廢殊前規。蕭梁顧烜略紀載。李唐封演推廣之。趙宋李金董洪輩。旁搜遠引爭傳疑。綜核已非世常見。疏漏未免人猶嗤。我朝方子繼溪氏。博學嗜古老不衰。嘗蓄古錢累三百年。代一分澠淄。更有扶風兩鬍弟。亦復愛此藏書帷。余昔間獲一二品。竊同寸管誇天窺。乾隆壬戌歲冬杪。西域有客來江涯。叩門請謁鬻古玩。傾倒盡出囊中攜。商尊周卣誠重器。雖欲購買無其貲。中有異布以千計。青斑翠點光陸離。古文奇字詎易識。安陽平陽差能知。當時侯國各私鑄。大都出自炎劉時。獨惜繼溪已仙逝。無由攷訂相窮推。越日馬子忽枉過。開械一見生嗟咨。千有餘歲蝕土壤。那能完好畱今茲。古物精英不終秘。蟲書有篆侷鼎彝。願以此品補泉志。庶幾全備稱精奇。宇內廣大何不有。耳目所見真幾希。偶然得此聊自賞。紀其歲月系以詩。

故人寄茶詩與俱。雨前題封紅紙書。鷓斑初展一痕翠。蟹眼乍翻百斛珠。況截石乳雲碧腴。試較蜀井當何如。但取清風生兩腋。底須清夢游蓉湖。

雨後兩明軒看盆荷再用山谷韻

兩明軒子風月俱。種樹自繙老圃書。荷葉田田花柄柄。午時驟雨跳新珠。素瓷五十紛雪腴。三十六陂紅不如。晚天吟賞不歸去。小窗清興同江湖。

小玲瓏山館題郭熙寒風密雪圖

山館林陰翠欲滴。微露清光縈四壁。中懸郭熙風雪圖。凜凜嚴威儼相逼。枯樹偃枝疑有聲。危峯積素真無隙。當時藝苑稱名流。譜入宣和擅高格。神宗年號章宗璽。兩兩標題皆可識。內府珍藏七百年。詎料流傳屢沿革。不因靈物相護持。豪奪巧偷遭蠹蝕。何從寶軸歸君家。一丈鴛溪尙完璧。時維四月風雨多。銀蟾閉窟陽烏匿。對此不覺生夏寒。消盡煩蒸轉蕭索。清暑之殿曾高張。壽安之宮亦陳迹。區區墨妙畱人間。等閑遷徙江南北。於今移向草堂看。老眼摩挲三太息。

和馬嶰谷雪後看山樓小飲

小有玲瓏館。春初已報晴。瓦溝容雪凍。竹杪見山橫。飢雀晚仍下。老梅疎轉清。幾人共幽賞。吟興酒邊生。

十月十七夜西疇招集行菴席散復登彈指閣

山舍罷吟初。登樓興有餘。煙光四野合。月影一林虛。人語凌寒寂。鐘聲入夜疎。城闌歸路遠。睡美藉籃輿。

五月十二日集篠園

一棹泛初霽。荒園夏景深。林藏前日雨。雲度半湖陰。與客分磯釣。有時穿竹吟。還期新月上。小閣坐橫琴。

豆棚

種豆衡門下。支棚小院中。葉疎偏障日。花細不禁風。午夢棲閑蝶。涼秋語夜蟲。老夫無事日。清話有鄰翁。

水雲漁屋聽雨分得江字

隔宵猛雨似翻江。又送檐聲到紙窗。暗入竹梢猶瑟瑟。細添石罅更淙淙。已愁攪夢眠難穩。更爲催詩意未降。最是故人瓜渚夜。一燈風岸泊吳艫。謂變樹

九日登平山堂分韻得雲字

菊囊萸佩結幽芬。山閣扶筇避俗氛。遠岫浮江疑近岸。高松當檻不遮雲。開鑪香泛村村醉。打稻聲喧處處聞。更喜老夫腰脚健。又憑吟檻送斜曛。

篠園種竹分得六言絕句二首

原是篠園舊地。蕭蕭又漸成林。邀風邀雨邀月。可茗可棊可琴。

清吟與我同瘦。遠俗非君不能。開徑應多酒客。何妨更有詩僧。

小漪南詩三首并序

宋葉主簿杞有別業淞江魚鱗涇上扁曰漪南丙申秋余築篠園二十四橋之東偏復構小亭於溪上澄潭修鱗可以垂釣蓮房芰實可以樂飢既落成仿主簿意以名之小云乎哉以果吾腹猶以爲大也

吳淞別業憶前賢。博士清詞亦可傳。願比穎昌營水竹。小漪南似小斜川。
新添亭子傍疎籬。幾曲闌干俯碧漪。移柳乞桃忙未了。清明又是種荷時。
芹青菱白滿平蹊。寂寞蓮花十里隄。畱得二分明月夜。棹歌只在小橋西。

雨後看梅

山齋愁坐雨蕭蕭。趁曉看花不待邀。應是東風知客到。暗香先送過溪橋。

南園春柳詞

覆牆一帶細於絲。飛絮年年入硯池。記得夕陽人喚渡。綠陰深處待船時。
又見新條換舊條。春風吹瘦女兒腰。二分明月巷前影。長是青青壓畫橋。

泛川小漪南觀荷聯句排律三十韻限南字

日涉原成趣。星夢荷開肯後探。小衫披軟白。黃短艇汎澄藍。容與經孤嶼。程夢透迤入淺潭。葦桴收古篋。余

茶具挈都籃。勝集欣聯袂。程名世良朋快盍簪。樹藏蟬嘒嘒。程志隄夾柳毵毵。園竹紛千个。星沙鷗狎兩三。

停橈遵北岸。裕曳屐過西菴。小飯松菴側。在曲榭弓方拓。鈞夢平池鏡半兩。關廂縈細浪。吳牖敞納虛嵐。直擬

居蓮社。名世何須問石龕。山志繞亭偏旖旎。志照水更清酣。鬢鬢晴雲斂。星晶瑩冷露涵。霞蒸顏綽約。裕風

逼氣翻醜。掩映啼妝遜。鈞夢招搖舞袖慙。盈盈嬌欲語。吳脈脈睡初愁。似列屏間麗。名世如勻臉際醅。凌波羅

襪瘦。志出浴黛鬢鬢。絕世雙身少。星傾城一笑堪。解愁傳謝沈。見謝文君沈君故事。裕設色倩王譚。王友譚

品。異種渾難辨。鈞夢佳名豈悉諳。會心寧在遠。吳騁目未云貪。釀熟思仙姆。見王荆公詩。名世香生憶老聃。見關令尹喜傳。

寒來莖不斷。志雪處藕應甘。裂芰能為服。星分枝自可含。漢昭帝喧尤憐浣女。裕歡足代宜男。以茲代萱草必使愁

人歡昭明太子。雅合揮絃操。鈞夢還憑捉麈談。拈毫嫌捃拾。吳覓句費研覃。漫載紅盈舫。名世徐傾綠滿甌。夜

涼人影散。志魚戲葉之南。星

張梁

字奕山。號幻花。婁縣人。康熙五十二年進士。有澹吟樓詩鈔。

蒲褐山房詩話。先生卜居吾里。有保閑堂。澹吟樓。學圃居。叢桂讀書堂。鶴徑風漪草堂。花陰館。藕香亭。一松齋。書巢。備水竹花藥之勝。又兄農部別業。本高文恪公竹塹。在杭。西溪。是梅竹最深處。每

年上元後。輒往探梅。至雜化俱謝。綠陰如幄。乃歸。過中秋。復往看秋山紅葉。歲以為。工琴。遇好山水。及花月佳時。一彈再鼓。鶴為起舞。望之者。以擬柴桑之處士。松陵之散人。時姪得天。司寇。方貴。或

勸之出山。清要可立致。笑不答也。晚歲專修淨土。至八十。三而終。其詩宗法王孟韋柳。間效山谷。誠齋。以見新異云。

山莊雜興

青山入牕牖。日夕烟嵐濃。無心看行雲。有興咏古風。漁歌叢竹裏。鳥語深松中。隔溪佛屋近。高枕聞疎鐘。卽景自怡悅。思與故人同。霜散碧落迴。澄池映岩光。臘殘氣未暄。草樹懷春陽。梅萼破一二。日炙聞妙香。雖非飲者流。欣然命我觴。醉起月在天。門掩山蒼蒼。荒邨一夜雪。人跡淨原野。飢鳥鳴樹間。凍犬吠籬下。對此逸景賒。扁舟愜心寫。四山皓已盈。蕭屑空林灑。歸來撫香醪。感彼荷蓑者。歲華忽云暮。人事焉得閒。獨予此棲泊。篁徑門晝關。方寸自恬曠。素琴時一彈。鄰翁偶相過。談笑劇歡顏。問我何不歸。無言對寒山。

彈琴雜詩

昔有累丸者。用志凝於神。薄藝何足耽。亦以示精勤。中人異嗜好。如口於甘辛。靡麗戰我前。危此閒中身。牙籤擁書罷。羅薦橫龍脣。嘈嘈箏瑟間。庶幾鳴其真。吟露草蟲秋。晷華山鳥春。拂石一再鼓。清風散四鄰。昔買靈開材。斷紋勝蛇腹。攜之西谿游。有舍西谿曲。頗似庾信園。雖小亦已足。焚香對山僧。一彈差不俗。響隨澗水落。指與烟霞觸。至今泠泠音。清夢尙相逐。明年正月破。此游良可續。不到茶筍時。先掃梅花屋。

讀嵇中散琴賦有會而作

束髮好鼓琴。自謂甚易工。初得一聲似。曠若意已通。學之既十年。茲理彌無窮。吾未忘我手。焉令諸有空。乳泉滴幽洞。箏木含遠風。至音本自然。聊與相從容。

由庚六笙詩。何乃實以句。昌黎十琴操。等之乖其趣。誰曰辭不工。於聲倘無與。古人意慨然。觸物偶有寓。冲和寫間曠。刺促含怨慕。且非指所傳。而謂口能喻。附會一何弊。聲失義始著。乃知得其聲。辭可悉汰去。庶幾無言中。時與古人遇。

學圃居

隙地種花竹。幽居興非淺。土膏以養人。毋乃等暴殄。蔬者穀之佐。日食誰能免。抱甕未幾時。新蕊行可翦。宛然野人廬。籬落露華泫。夙勤菜盈筐。古語聊自勉。夙勤則菜盈。頃筐見譙子。

遣興

晚景知物情。閉門却塵雜。秋爽入東籬。遠山晴見塔。空齋藥氣濃。窄徑花陰匝。雀字多並檐。蛩吟近依榻。人閑方晝眠。落葉響誰踏。

家兄營別業於杭之西溪時初落成偕雪莊游止卽事

屋向羣山倚。門臨一水斜。畫欄深映竹。吟棹曲穿花。客到轉迷路。人來欲住家。桃源那勝此。戶外盡桑麻。

蟋蟀

掩關塵事遠。隱几道心平。好鳥當軒下。新蟬抱樹生。岸痕知久雨。山氣識將晴。此意誰能道。幽居近物情。只為聲難闕。偏教跡易尋。露花垂暫濕。風葉聚籬深。切切多私語。悽悽更苦吟。老夫牀下穩。容汝伴鳴琴。

黃宮允唐堂八生辰集少陵句得五言律六首並禁複題遵香屑例也

中允聲名久。殊恩且列卿。青松寒不落。天馬老能行。耕鑿安時論。樵漁寄此生。謂公行樂圖本無軒冕意。心跡

喜雙活。奉寄王中允維。奉送郭中丞充隴右節度使。寄峽州劉伯華使君。贈陳二補闕。吾宗。邨夜。猶酌。屏跡。

軒冕羅天闕。如公復幾人。蛟龍得雲雨。鵬鷲離風塵。鍊骨調情性。虛懷任屈伸。神仙才有數。酒綠正相親。

贈太常張卿。奉簡高三十五使君。奉贈嚴八閣老。奉贈鮮于京兆。寄峽州劉伯華使君。贈王二十二侍御契。敬柬王明府。獨酌成詩。

王國稱多士。侏侏胄子行。使臣精所擇。仙老暫相將。鑿徹勞懸鏡。提攜頗在綱。名高前後事。回首一茫茫。

奉贈鮮于京兆。題衡山縣文宣王廟。送顧人分文學。觀李固請司馬弟山水圖。秋日荆南送薛明府。秋行宮張望督促東渚耗稻。發潭州。懷錦水居止。

海內文章伯。官高何足論。思飄雲物動。詞感帝王尊。世路知交薄。家聲器宇存。流傳江鮑體。高價越瓊璠。

暮春陪李尚書汎舟。佳人。敬贈鄭諫議。奉酬贈集賢崔子二學士。從驛次草堂復至東屯茅屋。贈虞十五司馬。贈畢四曜。贈蜀僧闍耶師兄。

老去才難盡。新詩近玉琴。文章千古事。時序百年心。暗水流花徑。荒鉏淨果林。維南將獻壽。楓岸疊青岑。

寄彭州高三十五使君適西閣。偶題。春日江邨。夜宴左氏莊。課小豎鋤斫舍北枝蔓荒磯。假山。舟中伏枕書懷。

伊昔黃花酒。明星惜此筵。坐深鄉黨敬。甘與歲時遷。竟日留歡樂。秋風灑靜便。八荒開壽域。恣意向江天。

九日登梓州城。春夜峽州田侍御長史津亭置宴。壯游寄岳州賈司馬。六丈。觀安西兵過。赴關中待命。秋日夔府詠懷。上韋左相。春日江邨。

從子鶴來別二十年今年歸暮秋過邨居喜作

雀喧叢薄掩籬門。返景殘霞帶遠邨。寒色小停江上艇。晚香濃引竹間尊。陰晴事往嫌重數。唱和篇多喜細論。落葉蕭蕭三徑積。未妨吟遶藥欄根。

查爲仁

字心毅。宛平人。康熙五十三年舉人。有蔗塘未定稿。

蒲褐山房詩話。蓮坡先生。早賦鹿鳴。被許得罪。數年而後得釋。因發憤讀書。博通典故。所居天津水西莊。貯書萬卷。南北往來名士。如萬栢坡。風變樹。趙欽谷等。無不攬環結佩。延主其家。相與覃研詩詞。書畫。又所娶金夫人。含英亦就風雅。人望如仙。其集中句。如地偏人跡斷。潮定水痕深。落花寒食節。飛絮午晴天。晚得黃花開。有色曉程殘。月落無聲一榻茶。烟畱客話半。簾花影枕書。眠皆中晚唐妙句也。今下世四十餘年。而莊亦改爲公廩矣。先生弟儉堂。與予交善。而子篋樣給事。爲予同年。故得其風流好事如此。

大悲院題壁

瞻此東林社。來尋惠遠師。坐深涼意滿。吟苦樹陰移。白鳥衝殘照。青蘆響暮颺。一層樓上望。浩蕩自伸眉。

畱題勗宗上人玉泉山房

初地雲邊構。精廬岩腹藏。半庭春水活。一屋古松香。禪已離文字。交須耐雪霜。支公容入社。分我小匡牀。

秋夜

雞蟲得失又何傷。聊爾閑吟夜未央。簾樹含烟難辨色。瓶花貯水有餘香。且煎雀舌添清課。尙戀蠅頭讀細行。驀地又教悲老大。朝來兩髻點吳霜。

佛手柑和查浦伯韻

盈筐相寄自吳船。幻出天龍一指禪。摩頂雖無心印法。拈花却有妙香傳。剖煎翠茗芳逾烈。畱伴黃梅色並妍。本是兜羅綿現相。越橙吳橘敢差肩。

萬松寺

寺前青翠萬株松。寺後巉巖百疊峰。坐久不知天過午。數聲聽打飯時鐘。

許廷鏢

字子遜。長洲人。康熙五十九年舉人。官武平縣知縣。有竹素園集。

蒲褐山房詩話竹素先生詩才綺麗始學杜牧之王仲初繼而規模何大復徐昌穀志和而節雅七言絕句尤爲人所傳誦然性豪放上論古今史事慷慨激發一官閩海憔悴數年非其好也既歸長洲居郭外二十里之陳墓河水雲千頃花藥數椽儻作詩以自遣時入城與沈歸愚蔣蟠瀾兩公來往故予常得接其議論。

憶昔行寄石洲觀察

同心有幾人。每作參商隔。山川一間之。世事復紛迫。遂令面會期。迢迢望無極。自予走四方。奇士儘能識。

君從蒼梧來，秉心貞且直。風義篤友生，古道照金石。抽思必詣微，靈境多獨闢。亮抱璠璵姿，文采耀東壁。一朝登賢書，聲名動京國。本以金閨彥，而混簿領職。牽絲聊一試，政平伏已擿。治行遠近聞，問歲乃三陟。屬當濱海區，伏莽多刼賊。白晝肝人肉，裨校肯辟易。蔓延將百年，流毒過辛螫。君來指顧間，豺虎吭以搯。渠魁尸桓東，降者保黃馘。南越百萬戶，自此安衽席。先是粵東被盜禍最烈，丁役莫敢捕，人人自危，君一出而搗其穴，散其黨，根株既絕，四境遂得安枕。何來逢掖生，首建不世績。天子聞其名，有喜動顏色。既縮銅魚符，旋樹牙門戟。鸞鳳際清時，九霄行展翮。憶昨華掌遊，繼遇金臺側。溫溫公瑾醇，至今猶在臆。武溪重相逢，翦燭話疇昔。風波一失所，蹙蹙靡定迹。蛩駘性相依，芝蘭氣無敵。南睇鳳山雲，伊人如可卽。緘素屢言情，半被洪喬厄。尺書天末來，忽見雙飛翼。邀我韓亭遊，勸駕詞甚力。嗟予值數奇，豪氣未全革。重爲飢所驅，浪作年年客。憂勞能傷人，况復暮景逼。衰病戀故邱，壯遊計久息。非君知愛深，胡爲遠行役。啓途歷水陸，兩見江月碧。高秋蹋鈴閣，君上珠江鷁。盈一水間，遙望心如怒。賴茲賓從賢，談笑西園劇。鳳雛有清聲，英英覩世澤。觀之散老懷，離思終難釋。昨日報霓旌，將發五羊驛。翻因歸有期，更引長相憶。各蘊十年懷，吐之待良覲。

題活溪

活溪一片石，長寄幽人賞。蘊靈亮有基，穿徑識所昉。昔遊景已移，勝情紛涉想。重來際蕭晨，清湘駐雙槳。初日澄遠心，水木明秋爽。石梁敲半橫，絕壁峭以上。曲徑垂繁陰，流泉激清響。當境乃自今，過目已成曩。

寂寞塵外蹤。日見屐幾兩。高秋多白雲。空亭自來往。

對月懷石洲觀察

憶昔平川月。同看淥水流。

戊申相別於淥水湖

十年逢此夕。獨照海天秋。使節正當路。故人今白頭。清輝千里共。望

遠一登樓。

鑪香峰

昔夢香鑪頂。空中浮紫煙。今來瀑布下。天半挂流泉。遠寺鐘聲斷。蒼山月影圓。狂歌招李白。雙鶴下雲邊。

懷宋四嘉榆

依然不得志。五載鬢毛疎。正挂匡廬席。開君蒙澤書。生涯各歧路。鄉夢半離居。憶想葑溪上。長空流望舒。四海誰相識。斯人知我心。天涯逢令弟。話舊一霑襟。聞道赤城去。蓬萊碧海深。爲期秋水闊。予亦返楓林。

送春

吳兒日暮踏歌回。紈扇痕新袖底開。燕子一雙斜掠地。不隨春去却飛來。橋過芳草酒旗橫。醉睨當壚倒玉瓶。十里好風吹不住。亂紅飛雨過長亭。

題家書後

觸撥離情拂彩箋。秋風瑟瑟雨綿綿。寒燈獨照三千里。薊北江南共不眠。

吟鞭遙指酒帘斜。唱徧旗亭樹樹花。忽憶風光滿吳苑。江頭燕子又還家。
乍逢寒食客中情。麥飯誰家隴上行。如雪梨花如線柳。當年容易過清明。
飄零莫怨竇連波。每對青山憶黛螺。錦帶書成頻寄否。天邊飛雁北來多。

湖海詩傳卷二

厲鶚

字太鴻，號樊榭，錢塘人。康熙五十九年舉人。乾隆元年薦舉博學鴻詞，有樊榭山房集。

蒲褐山房詩話：徵君性情孤峭，義不苟合，讀書搜奇，愛博鉤新，摘異尤熟於宋元以來叢書稗說，以孝廉需次縣令，將入京，道經天津，查蓮坡先生圍之水西莊，觴咏數月，而撰周密絕妙好詞箋，遂不就選而歸揚州。馬秋玉兄弟延為上客，嗣後來往竹西者，凡數載。馬氏小玲瓏山館，多藏舊書善本，間以古器名畫因得端居探討，所撰宋詩紀事、遼史拾遺，極為詳洽，今皆錄入四庫書中。其先世家于慈溪，故以四明山樊榭為號。所作幽新簡妙，刻琢研鍊，五言尤勝。大抵取法陶謝及王孟章柳，而別有自得之趣，瑩然而清，昏然而遠，擷宋詩之精詣而去其疎蕪。時沈文愨公方以漢魏盛唐倡於吳下，莫能相掩也。予於戊辰歲在長洲，趙君飲谷小吳船遇之，辱為亡年交。嗣後徵君過吳，必訪余于朱氏蘋花水閣，凡三年而徵君下世矣。至其詞直接碧山玉田，予已錄入琴畫樓詞鈔，故不具論。

曉登韜光絕頂

入山已三日，登頓遂真賞。霜磴滑難踐，陽崖曦乍晃。穿漏深竹光，冷翠引孤往。冥搜滅衆聞，百泉同一響。蔽谷境盡幽，躋巔矚始爽。小閣俯江湖，目極但莽蒼。坐深香出院，青靄落池上。永懷白侍郎，願言脫塵鞅。

宿永興寺德公山樓

昏黑山雨歇，一徑松烟蒙。微聞梅花氣，吹落疎磬中。詎惜衣履溼，宿處投支公。凭樓蒼人語，迴與雲際同。少選沈靄斂，俯聽幽林風。明星忽三五，挂在殿角東。短燭照春綠，夜靜山逾空。觀河悟衆象，拂石期冥鴻。

神清了無夢。亂壑流何窮。焚香以達曙。茲焉悅微躬。

永興寺二雪堂曉起看綠萼梅是馮具區先生手種

幽人先鳥起。林磻正寂然。是時春空霽。山翠爭便娟。的花間雨。澹澹花上烟。烟雨爲合離。花態亦變遷。祭酒昔游此。手種猶生前。傲兀根倚石。欹倒枝暎泉。微馨委陳跡。高格同枯禪。儒官罷亦得。不廢招隱篇。攀花久延佇。世已無其賢。

溪上巢泉上作

翫溪遂窮源。東峯屢向背。朝日上我衣。春泉淨可愛。不知泉落處。潺潺竹籬內。喧聞兩疊瀉。靜見一潭匯。松風颺纖碧。花影蓄深黛。名言猶有相。幻照乃無悔。悠然巢居心。頗欲終年對。

晚入石人塢還永興寺

撥蘿尋微徑。山意黯將暮。幽討忘體疲。窈窕入深塢。激瀨不通人。踏石凡屢渡。返景忽難留。蒼蒼目爭赴。萬竹皆爲風。千花并成霧。去鳥有遺音。歸樵詎同趣。夕梵懷信宿。春溪延緩步。入門不生月。仍倚簷際樹。

同樂城耕民游艮山在城東北高可二丈許蓋土阜也旁列古松三四晚風肅然殘雪在地臥殘碑已中斷讀之不甚了了乃元艮山土神廟碑大德己亥紹興路儒學錄古杭沈德章記并書廟不知毀於何時作詩紀之

臯亭雪未消。數峯粲可數。城陰良其背。有此山戴土。牽拂無事朋。共探風物古。晚寒閉漁村。斜陽入蔬圃。疎松時一響。似喜我輩撫。徘徊去仍留。斷碑記祠宇。惟存豬兒年。髣髴辨某甫。斯人今安在。閱世如過羽。社翁一尊酒。寂寞罷歌舞。明年梨花時。再尋比韋杜。沙河春水生。看客曳柔櫓。

四月十五日同施自勗吳尺鳧游西山入龍泓洞

淺夏宜尋山。幽深最靈鷲。言瞻理公塔。濃綠暗晴晝。行勝已十里。地奧峯轉秀。石牀不暇坐。窈窕入雲竇。乳泉排蜂房。其下若懸露。絕疑秋雨時。濺撲到襟袂。圓穴居上頭。晃晃天影漏。照見壁間書。亡國有餘詬。洞刻咸淳丁卯賈似道同客俞昕等題名蒼然留後鑒。反似神所守。鑿爓出別洞。冷襲袂衣透。恨不裝輕絛。佛國殊氣候。

冷泉亭月夜

望月迎峯菴。已吐鷲嶺背。林閒炯積雪。搖影紛瑣碎。出門路漸低。步步入幽鶴。過橋松露滴。茅屋一犬吠。層巒回復凸。月尚隱其內。招要坐空亭。萬木鬱垂蓋。泉光動深池。翻疑夜當晦。聞聲彌覺靜。澗韻雜陰巖。微於交枝隙。忽見鮮雲挂。此時各無語。翹首翠屏對。颯然古精靈。髣髴妙景會。烟中客兒句。風外寶公咀。欲留凍生寒。將去如有待。今宵單牀夢。猶繞琉璃界。

晚至溪上集

林巒生春寒。心在諸天暝。列坐疎竹根。微泉各爲聽。花光淡欲無。松籟遞相應。衝烟山鳥還。余亦下蘿徑。

西溪曉起

首春溪中寒。偃臥如屈鐵。宵分天柱夢。覺來轉清切。開門殘月在。下見數峰雪。雪際生白雲。宵暎不可說。登橋水市靜。尋徑冰泉裂。山翁尙無事。初陽候林缺。懷新意似欣。理舊抱已結。何如巖棲人。麩竹飯松屑。行田至荆山嶺下作

大山何連延。細岑若洄顧。中有微徑通。兩村隔松霧。平疇開朝日。宿麥半凝沍。雲根脈未洩。涓流但微注。野人籬落小。鳴雞隱雜樹。雖無汜勝書。農話眷幽素。稍營下涇業。更羨上洄住。竹橋滑春霜。往來定非誤。同吳西林汎舟西溪看梅

緩權縱遙目。心與春流平。邀侶以事解。得朋因寡營。峯色烟上霽。竹風沙外清。一夜叢梅發。幾處山窗明。香中林鳥語。引我沿溪行。積翠點殘雪。陰淡寒自生。西崦未云夕。東畝方可耕。稚子寫迎客。花間啓柴荆。曉過福清竹院

探幽勇晨興。靜院鐘未歇。晴烟暎竹澄。殘月轉花沒。地僻養靈姿。氛潤蒙玉骨。有如列仙儒。初日晞薜髮。深山畱古春。凡豔想易歇。老僧空色相。折取供白佛。護此無盡燈。常依妙香窟。坐聽籬落間。緜羽轉清越。夜宿松靄山房

閑房駛雨過。林杪挂星漢。涼深欲添衣。不但殘暑遁。蔬盂供細食。花巾奉清盥。相偕靜者流。共待疎鐘斷。

夜闌空山黑。月吐翠微半。澄輝漾庭戶。秋影互凌亂。露蟲鳴始急。坐覺歲時換。人生非學佛。詎免感此不能眠。斐回以申旦。

晚由金家堰步至崇先寺

一峯抱花迴。不知凡幾里。遲日落未落。散策從此始。石梁跨澗空。苔枝皆倒倚。入寺罷晚參。僧堂寂如水。詰曲取微徑。返景照花裏。瀾漫徧岳壑。春透無剩藁。乍疑吐佛光。白毫映霞紫。復訝妙香生。秘醇得禪髓。盤桓憩松根。結茅擬來此。何必問通波。遠尋光福市。

十二月八日敦復招集餅花齋食臘八粥聯句

歲序何崢嶸。周京星紀忽已而。八葉抽堯蓂。金志章五德重漢臘。吟社邀襟聯。樊榭山館喜簪盍。浴佛東京

遺。梁啓心設供西竺法。漑釜精作糜。丁敬龍析薪燎以蠟。果兼檜殼膚。杭世駿米槩升俞合。釋之復揉之。全祖

望謝載剝還收招。瀘水力斧冰。顧之麟蒸餽氣焚蒔。汨汨醅汎缸。吳城濃濃乳傾榼。宿辦勝咄嗟。丁健早

起占噬嗑。坐疑集梅林。汪啓淑圍如禮花塔。不待木魚呼。穆何煩齋鼓鞞。素甌滿同盛。江淨饌齊一呷。甘

芳滑流匙。樊榭磊塊利用椀。羣喋訝水鳥。蘇餘瀝施簷鴿。口香聞諸天。龍腹果傲古衲。利益瞿曇云。董家風

靖師蒼。緬思烹穀初。謝軒后澤溥洽。玉井象昭垂。寸囊饅紀職納。人皆依風住。甌俗始理生陋。貴或糅元

黃。誠三品侈和雜。貧或點齋鹽。秀七寶爭嘖嚙。或詭名目奇。穆料斗說閭闔。或困衆指繁。江舖歡沸吹飲。

魚傳放翁詩。

樊榭

膏載叔庠劄。寒持濟軍飢。

林藪

晨炊恤僮乏。何如我輩閑。

龍泓

文史共歡狎。蜡飲用上寅。

蓬談

譏資某甲。嶺梅吐萼纔。

謝山

山茶破紅恰。騁辭筆紛飛。

田寸

搜祕神有塔。節物鬪朋牋。

甌亭

故事徵梵夾。流連至

纒黃。

誠叔

新月照簾押。

秀峯

二月十七日重游洞霄宮探大滌洞天

振衣浴罷體更輕。竹杖投石聲彭觥。空山昨夜龍洗窟。雨過萬壑泉縱橫。山靈知我有默禱。故遣松風作前導。一峯陰見一峯晴。天柱中央翠於掃。元同先生昔隱居。洞天長鎖琅函書。前游日夕未曾到。恨身不得乘鷗車。穿盡幽篁履苔石。驚見谿硤洞門圻。童子曾爲擣藥禽。桃花解笑題詩客。此中日月停兩丸。想像九夏尤清寒。微明秉炬觸暗壁。古靈題字來尋看。洞中題刻多漫滅。但見一處云。陳襄述古來癸巳夏。玲瓏乳竇隔凡處。路接華陽不歸去。有人問我洞中來。爲說浮雲如柳絮。

題敬身所藏崔子忠伏生授經圖

樹底危坐秦博士。頭童背僂須眉蒼。彼姝侍側兩鬢安。啓唇似有聲微颺。一人炯視面若削。高冠褒衣意則莊。刻深頗似見顏色。潁川掌故稱智囊。據石作几俛首聽。手操不律書幾行。登來化我本齊語。豈至難辨如公羊。此時未有蔡侯紙。非是簡策應縑紉。羸灰既冷孔壁匿。聖權獨賴生扶將。二十五篇復繼出。微言大義難低昂。後儒往往疑作僞。欲與百兩俱淪亡。典午清談那辨蒲。此地下齒冷梅豫章。操矛入室

真箇莽安得生也。相撐塘北平。崔丹古節士。布袍草履神揚揚。貴人乞畫怒不與。槁死上室甘飢脰。龍泓館主得小軸。晨夕坐對齋屋張。遺經獨抱湖姚姒。樸學正可傳諸郎。猶勝濟南一女子。宛轉膝下青桂裳。焦山看月分得聲字。

焦山寺裏鐘始鳴。焦山寺前江月生。此時月上潮復上。風水相薄爲奇聲。餘音瑟瑟獵枯荻。礧然飛起棲禽驚。長波萬里入杳靄。中流一道馳空明。數星莫辨北固火。幾點不送南徐更。羣峯隔岸悄如睡。何事賈舶貪宵行。吳頭楚尾兼越角。我輩聚若九子萍。同游者九人。珉石興來弔鶴瘞。瓊田望去呼龍耕。坐久起踏松影碎。滿地窳窳霜華橫。琉璃宮殿水精城。佛界盡在寒而清。良朋偉觀那易得。天教今夕二者并。高詠坡公赤壁句。一尊酌月還同傾。

東臯閑居

白拾成新隱。青苔徧舊蹊。水明村裏外。樹罨屋東西。菜把官羊敵。茶香佛粥齊。慨焉思靜侶。安得手同攜。沈大匡先生華山草堂

心跡竟沈淪。空山闕古春。亭酉唐野史。名在宋逋臣。破壁全題字。雙松一作薪。惟應千載上。媿殺瘦腰人。晚秋夜雨有懷故園

落葉卷風雨。客愁仍去年。背燈三峽水。欹枕九江船。預想他時話。須妨此夕眠。南湖烟翠色。應濕草堂前。

羊流店拜羊太傅祠

茅屋疎林雜晚炊。羊公祠下獨來遲。探環已失前生樹。墮淚猶存故里碑。盛德在人如昨日。清談誤世詎同時。雍容裘帶瞻遺像。深媿無才進些辭。

月夜渡江

露荻風林隱戍樓。宵分月上動行舟。凌雲髣髴三山意。濯足空明萬里流。北府兵廚誰與載。南朝詞客冑同游。人間奇絕成孤賞。喚起魚龍一笛秋。北府兵廚宋時鎮江酒名。

二月十日同丁敬身金質甫陳江臯登寶石山天然圖畫閣

塔下樓開躡級登。東風聊憶昔游曾。春深城郭渾如畫。定裏鶯花不屬僧。人影漸移湖上柳。烟花又綠壁間藤。畱題爲紀閑蹤跡。只有看山詫最能。

送沈確士歸蘇州

滿天梅雨合思吳。早挂烟中十幅蒲。白髮定能爭席否。朱絃曾遇賞音無。人同樂園文偏潔。宅近靈巖趣不孤。只恐鷗情成閒阻。五湖那復憶西湖。

悼亡姬

病來倚枕坐秋宵。聽徹江城漏點遙。薄命已知因藥誤。殘妝不惜帶愁描。悶憑盲女彈詞話。危托尼姍祝

夢妖幾度氣絲先訣別。淚痕兼雨洒芭蕉。

郎主年年耐薄游。片帆望盡海西頭。將歸預想迎門笑。欲別俄成滿鏡愁。消渴頻煩供茗椀。怕寒重與理熏篝。春來憔悴看如此。一臥楓根尙憶不。

除夕家筵已暗驚。春醪誰分不同傾。銜悲忍死留三日。愛潔耽香了一生。難忘年華柑尙剖。瞥過石火藥空擎。祗餘陸展星星髮。費盡愁霜染得成。予壁溫柑尙食其牛。

蒼蒼當時見慣驚。鴻影纒隔重泉便渺茫。舊隱南湖淥水旁。穩雙棲處轉思量。收燈門巷忭微雨。汲井簾櫳泥早涼。故扇也應塵漠漠。遺鈿何在月

蒲褐山房詩話。樊榭下世。塋于杭州四溪王家塢。因無子嗣。不久化爲榛莽。後四十餘年。可君春渚琪游四溪田舍。見草堆中樊榭及姬人月上梁。主在焉。取歸。偕同人送武林門外牙灣黃山谷祠掃洒一室以供之。予爲撰丈室花同天女散摩圍詩。共老人參句。以題其楹。李光甫方湛蔣村。烏程堯香梁諸子。皆有詞話記之。樊榭生于康熙三十一年九月十一日辰時。月上姓朱氏。名藻。瓊。烏程人。生康熙五十八年三月二十四日辰時。歿于乾隆七年正月初三日。戊時。並屬蔣村及項金門塘許周生宗彥。各于忌日奉酒脯薦焉。

春寒

漫脫春衣浣酒紅。江南三月最多風。梨花雪後醱醱雪。人在重簾淺夢中。

題周兼南唐小周后寫真

命婦隨朝掩淚光。虛聞龍袞紀興亡。畫師自有春風筆。不寫傷心入汴梁。龍袞江南野史。今所傳不全。載小周后事。見王銍默記。

明鄭貴妃書泥金普門品經同丁敬身作四首卷首題云大明萬歷甲辰年十二月吉日皇貴妃鄭謹發誠心沐手親書觀世音菩薩普門品經一

卷恭祝今上聖主祈願萬壽洪福永享康泰安裕吉祥

梵夾盜青出漢京。翊坤題處最分明。依稀買得研神記。紙上香多蠹不成。明大內寫金字經多用

巧笑由來雨露偏。佛恩遣在聖人前。開函稽首無他願。一筆泥金壽一年。

柘館餘閑罷女紅。祝釐不與衆嬪同。也勝密誓高元殿。小字親封玉合中。

城南詩老觀空久。特賦新詞繼夢華。更待秋山黃葉下。與君禮足九蓮花。靈隱寺有慈聖李太后賜九蓮觀音一燈

西溪山莊有感

闌壓垣衣戶網塵。嫩寒惻惻那禁春。一池好漾羅裙水。只照梅花不照人。

錢陳羣

字集齋。嘉興人。康熙六十年進士。官至刑部侍郎。加尙書。諡文端。有香樹齋詩集。

蒲褐山房詩話。公久直內廷。深蒙知遇。而乞假歸田之後。恩禮尤深。時賜御製詩章。俾其屬和。資子便蕃。至以明僧紹爲比。及舉華陰。幸南邦。公輒在屬車。豹尾間。矢音寶和。詞臣歸老。榮眷有加。爲自古所未有也。公位隆望重。而愛才如不及。予鄉會試。二座師。皆公門下。於禮爲小門生。而公以乾隆辛巳入都。祝釐。予尙未進謁。公已先來訪。適予上直。未歸。關人辭焉。公不許。直入蒲褐山房。坐俟予歸。劇談後去。蓋其瀟灑俗如此。先是公督學江西。特拔蔣君士銓于嗜衆中。所過名勝。輒有題字。而北蘭寺墨跡尤多。予兩至江西。公歸道山已久。公子東麓侍。耶謝世亦四載矣。時與蔣君循覽遺詩。不自知其悽黯也。

渡潯陽江經廬山至德安次香山德安趨潯陽韻却簡柱川太守

侵晨薄潯陽。煩慮始一展。廣川利泛涉。層巒揖清緬。穿石水紆迴。出岫雲舒卷。攀危倚僮僕。攪勝去帷幘。西崦竹逕封。東林碑字選。登頓信云疲。散誕乃忘倦。山程延信宿。茆屋就偃蹇。復此遵修塗。仍欣開別巘。村稠市稍喧。礪豁路初轉。通津俯金帶。古渡歷敷淺。稽圖豈遂游。托志聊紀顯。凌虛馬啼蹴。窮蹙吾目眩。題詩報故人。卽事得幽遣。

題林上舍涪雲陶舫硯譜

端石如端人。厥質靜而正。徵行諡旣彰。傳愛銘可鏡。此册林氏守。名輩互考訂。銛鋒碾纖阿。圭璧發晶瑩。詞兼鱣柳深。體許斯豐並。借觀不忍釋。秋窗張短檠。龍尾穴已涇。鳳咮賞難更。碧瓦多飄零。黃眼爭季孟。品題有羣公。石室事稱盛。我老當學耕。與君租一稜。

東林寺和王文成題壁韻

下馬登山踏秋艸。路入東林覺秋好。處士高僧跡已陳。廬山面目何曾老。石罅寒筑泉聲哀。酌泉仰看芙蓉開。天池拂水落天半。餘噴似逐清風來。出門西去重回首。今宵且醉山村酒。醉中猶認壁間題。龍蛇生動不可朽。故人高閣虛中庭。中丞謝公遣吏來迎采芳遲我江之汀。夢回記上爐峯頂。北指恆燕一髮青。

楓香驛次靜山侍御韻

入山身在白雲鄉。複澗迴溪問野航。瞥見新槽聞酒熟。始知小驛是楓香。夢回郢尾人千里。月滿樓頭雁一行。馬上閒情數秋草。露葵開老尙當陽。

盧見曾

字抱孫。號雅雨。德州人。康熙六十年進士。官兩淮鹽運使。有出塞集。

蒲褐山房詩話。運使短小。精悍。有吏才。總督那蘇圖特薦。謂其人短而才長。身小而志大。嘗為四川洪雅縣令。故以雅雨自號。夙慕其鄉王阮亭尚書風流文采。故前後任兩淮運使各數年。又值竹西殷富。接納江浙文人。惟恐不及。如金壽門、農陳玉、几撰、厲樊榭、鶚、惠定宇、棟、沈學子、大成、陳授、衣、章、對、鷗、臯、兄弟等。前後數十人。皆為上客。而是時地主馬佩兮曰：鴉、秋、玉、日、瑄、及、張、漁、川、四、科、易、松、滋、諧、咸、與、扶、輪、承、蓋、一、時、文、酒、稱、為、極、盛。又、校、刊、乾、鑿、度、高、氏、戰、國、策、鄭、氏、尚、書、大、傳、李、鼎、祚、周、易、集、解、封、演、聞、見、記、諸、書、又、補、刊、竹、垞、大、史、經、義、攷、并、以、歐、朝、山、左、詩、人、最、盛、屬、鞠、編、修、遜、行、張、孝、廉、元、董、庶、常、元、度、諸、人、採、輯、傳、世、修、小、秦、淮、紅、橋、二、十、四、景、及、金、焦、樓、觀、以、奉、辛、未、丁、丑、兩、次、宸、游、其、愛、古、好、事、百、餘、年、來、所、罕、見。

承恩出塞 匪別揚州諸故人

解網綸言下九關。孤臣猶在識天恩。三年便許朝金闕。萬里何辭出玉門。沙暗陰山秋獵壯。雪明瀚海夏裘溫。多情應信揚州月。直送征輪到塞垣。

休致歸里 匪別揚州

力體宜勤敢自憐。薄才久任受恩偏。齒加孫冕餘三歲。歸後歐公又九年。犬馬有情仍戀主。參苓無效也憑天。養痾得請縣車日。五福誰云尙未全。

平山回望更關愁。標勝家家醉墨留。十里林亭通畫舫。一年簫鼓到深秋。每看絳雪迎朱旆。轉似青山戀白頭。爲報先疇墓田在。人生未合死揚州。

顧棟高

字復初。無錫人。康熙六十年進士。乾隆十六年。以經學徵。官至國子監祭酒。

蒲褐山房詩話。震滄先生少與蔡進士德晉。吳孝廉。肅。精心經術。尤長於春秋。既捷南宮。官中書。以奏對。越次。罷官。遂不復出。所著大事表。萃公穀之微言。正杜孔之義疏。凡輻輳紛紜之說。悉爲定其指歸。表而出之。蓋宋元以後。諸儒無其精確也。乾隆辛未。以經學徵。賜官國子監司業。未就。丁丑。迎鑿晉祭酒。時年幾八十矣。是時寓維揚者數月。猶見其撰毛詩類釋。今亦錄入四庫書中。先生不好吟咏。而大事表後。附論春秋詩。皆無關風雅。故從梁溪詩選中所錄止此。

寄秦子樹澧京邸三十韻兼柬蔡子宸錫吳子大年

春秋有淵源。其祕舅氏啟。閉門四十載。著述浩難紀。餘膏漑後人。愚也叨染指。蔡子亦勃興。不謀而同軌。鑽研事三禮。註疏繁且哆。余著宮室圖。三代遺基址。蔡子有禮傳。精入豪芒裏。質齋兩昆仲。大年號質齋。與賢弟蓮義。並以經學名世。臭味略相似。易傳與春秋。著論各宏偉。秦子年最少。味經得經髓。味經秦子別號。窮經著實用。穎銳尤莫比。比治河洞古今。鹽筴析源委。乘時並高翔。稽古光有煒。而我守窮廬。麟經究終始。諸儒論積薪。不肯隨諾唯。編年從周正。紀事因魯史。朔閏補長歷。輿圖看聚米。紛紛日月時。瑣瑣爵名氏。一掃支離障。庶得筆削旨。謬誤斥公羊。災異嗤董子。州次而部居。分肌兼析理。爲卷四十九。大義貫首尾。所恨帙浩繁。未能致雙

鯉良友兩三人。無由攻疣痕。舅氏有從孫。爲華子師道貫穿窮根柢。尋筒數往來。辨論析朱紫。仗助良不淺。割豁頑鄙。此事有由來。先河而後海。十年粗告成。吾友當心喜。天遠帝城闕。白雲空徙倚。

正月十四夜泊建寧城外

春來漫說短長亭。迢遞離腸酒易醒。兩岸青山圍素月。一溪寒水宿殘星。人依樹色經年老。舟帶灘聲午夜聽。料得家鄉燈火鬧。可知客路在郊坰。

戴亭

字通乾。號遂堂。遼陽人。康熙六十年進士。官齊河知縣。

蒲褐山房詩話。遂堂襟情超邁。詩筆堅剛。自齊河罷官後。率其小妻。漂泊江湖久之。依雅雨運使于邗上。嘗與予同寓真州。言生平所想企者。惟李鐵君陳石閭兩布衣。餘子不足數也。故雅雨爲刻。遂東三老詩以傳之。性善飲。至數斗不亂。年近八十。貌如嬰兒。自誇得容成之術。予入都後。年餘。聞移寓金陵。一夕無疾而卒。

宿來青軒

已覽香山勝。還尋勝地眠。陰厓連戶竹。疎磬出山烟。月色緣塔上。泉聲到枕邊。夜來魂夢冷。身出白雲巔。

山行

每至幽棲地。長懷出世心。緩隨流水去。漸入白雲深。墟里澹斜照。烟蘿生暮陰。道逢樵牧侶。閒坐話中林。

雨後山齋

山齋雨乍晴。新月照茅屋。萬籟寂不喧。殘聲滴疎竹。

秋雨

孤艇泊秋林。夢繞江天路。寒雨帶歸鴻。飛向江南去。

沈起元

字子大。太倉人。康熙六十年進士。官至光祿寺卿。有敬亭詩文集。

蒲褐山房詩話。先生白澗之子。處爲名儒。出爲廉吏。自典郡以至方伯。所莅之地。深求利弊。次第斟酌。行之。心切愛民。而以寧靜不擾爲主。入任光祿寺卿。引年致仕。生平清操自勵。進退超然。與武林虛船通政相似。而詩學尤醇。歸愚先生謂高者撫杜陵。次者近白傅。信也。甲戌秋。予在濟南。先生主澗源講席。把臂甚歡。出所著周易孔義集說。敬亭詩文集。見示。因得其學問之詳。歷城周君書倉。永年。時年弱冠。在書院中。能讀徐氏通志。經解。先生譽之。令予相見。其後書倉以辛卯登進士官翰林。兼通內典。爲濟南學者。沒後詩什無存。故附記焉。

秋日過顧思儼

秋容老更嫵。埜步尋幽居。天空高不盡。水冷清如無。曲折依蔬圃。往往逢樵漁。何以識君家。繞岸鮮芙蓉。稻黃喧鳥雀。池晴漾游魚。種藥霜不死。晚秀盈階除。分畦植菘韭。向日課耰鋤。靜觀造化理。自著蒙莊書。此樂真自得。淵明復何如。

石壁

客從花中來。僧向花中住。誅茅傍峭壁。日影常半吐。修篁入天翠。偏愛侵細路。石古柏根穿。松高巢鵲乳。

羣梅遶牆外。迴顧失來處。款接來山童。香茗煮花露。坐久客意安。徘徊不知暮。尋幽定頻來。勿以花落故。

溪閣秋晚和小山

寂爾秋遂晚。落葉散復聚。斷烟忽如雲。池中碧天曙。秋光入靜睇。會心不知處。孤吟欲有贈。望望夕陽去。

紀行一百韻

男兒不成名。飢驅遠行決。亦知北地苦。且念內顧缺。割棄試一行。百恨難具說。平生負奇氣。少小頗挺拔。落筆一身膽。結交寸心血。狂言衆所哈。志與蒼生切。功名不足取。肯念生理拙。阿翁垂七十。鬚髯皓以潔。數奇老不遇。意氣餘覬豁。一子嗟晚舉。瞠目望早達。十年走文場。三試竟三黜。劬勞阿母心。兒大母已沒。事母痛已虛。事翁力何竭。士窮未爲辱。念此增內熱。幸逢右文朝。曠典下金闕。思走長安道。聊振雙羽鏃。似非翁所歡。勉強聽慙出。堂前苦無人。欲出轉愁絕。翁有舊執友。四五青雲列。平津篤恩義。投林匪干謁。買絲製羊裘。買布製菹褐。厚綿裝被褥。弱線理巾襪。懷中一卷詩。心知覆瓿物。冠蓋多賢豪。尙冀賞真骨。落落辭朋儕。依依謝親暱。知己各有贈。規誦具古質。園中有病妻。餘情復騷屑。畱勸諒兩難。徒看啼綆抹。幼女無所知。弄餌倚爺膝。且託丈夫志。掉首未遑恤。阿翁悽遠送。無淚向兒咽。仲冬北風寒。三更虎邱別。始悟失乳孩。夢寐殊忽忽。同行有繆子。心形故膠漆。舟車共長途。吟嘯散佛鬱。荷天假晴和。千里弄雲日。首塗惠山寺。孤塔烟中戛。泉聲茶思清。帘影酒情逸。漸看雙岸高。稍驗下水疾。吳楚山忽斷。一道江流活。

巍石撐洪濤。海門樹修闌。朝曦利彩飛。濕霧浪痕滅。片帆掠鳥鷗。瓜步倏超越。頓覺故山遠。吳雲望中失。
蕪城煬帝家。枯楊剩芽蘖。邵伯積水長。烟草中蕩瀆。人家半淹漬。雁鶩雜鳴聒。俯視淮安城。盃底萬家室。
窺簷亂帆度。憑舷女牆沒。疏鑿荒禹功。汨陳師繇術。哀哉生民魚。千載憂潰鬻。恬波受輕槩。河靜流轉滑。
旁支避險艮。靳公著宏烈。鷺鷥立清淺。蒲葦與曲折。功名垂不朽。豈必在賢哲。洋河見清流。俯映醒眉髮。
就漁擊仙鯉。斫膾猶撥刺。亂山童亦佳。晴烟媚峰岬。夜寒風力尖。水凌長川截。光清日影淡。氣肅天空窒。
摧擊恃巨椎。琤琮玉聲裂。遂便一日程。三宿始改轍。旅舍濟寧城。驚心值令節。離情一線添。燈暗天欲雪。
凌晨乘柴車。簸蕩比糠粃。辨途認征鐸。鷄聲遞木末。踈星閃餘芒。日色冷烟暝。霜花順風飛。人馬鬢鬣結。
軟沙或埋輪。瘦石或拒鞢。揚鞭乍奔騰。倦程時蹙躡。寒林村落虛。葉脫混梨栗。客來嗟過時。玩樹思解渴。
樵髡古柳枝。童曝敗榆窟。空霄孤隼閑。荒野羣豕突。騎驢看少婦。羞顏蒙縵纈。塵埃劇霏霧。咳唾澀齒舌。
自從河流徙。齊魯膏潤洩。菑畚變磽瘠。蓺植鮮稻秫。承平日已久。土城壘螳埵。小邑數十家。茅屋見闕闕。
暮投村店宿。泥床衾似鐵。苦酒一再斟。北食四五設。羸雞宰金距。美菜煮玉笏。屑麪更作餅。團團似規月。
佐以秬黍粥。飢來愧饕餮。四壁疥題詠。妍醜未區別。河間太守堂。通家下陳榻。溫湯洗盆垢。負芒快一撥。
詰朝指趙北。重霧裹林樾。天晴帝城開。瑞靄紛籠綴。車馬如雲烟。小儒媿薄劣。傍午登相府。遂許解鞍歇。
先達假令顏。故知慰契闊。疲形得乍休。游魂尙恍惚。歲暮客窗深。清燈照孤子。江南杳何處。北斗如可揭。

計程越三千。數別途一月。家翁此際情。到期指應屈。如歸固云喜。心定轉憂悒。急思報平安。深夜呵凍筆。
下十八灘

下灘喜安流。客心付輕櫂。復此風日佳。江山耿瀟照。連峯帶波迴。雲水相窈窕。一箭瀉盤渦。飛鳥不可到。近跡已條經。遙情復紛召。翻緣巨石橫。得領清景要。月流千縷光。籟起萬山竅。漁歌落遙空。客思正孤峭。去帆何匆匆。終傷流景慄。

桐廬江中作

霽巖消殘雲。蒼翠不可象。石色萬古新。風日與滌盪。峽曲江逾急。帆勢青冥上。前途旣迷阻。後逕復憺愴。林密鎖秋烟。蟬寒有餘響。孤村不見人。老樹挂疎網。清陰起遙情。靜目寓延賞。何必子陵灘。高風令人仰。
喜雨

久旱望雨切。無雨雲亦好。今朝忽翻盆。神功顯大造。危簷挂飛瀑。塔除走橫潦。飄洒林氣動。翻若烟塵擾。紙窗破忽盡。洞達領清灑。琴書霑漏濕。敢嫌吾屋老。此時田間農。狂呼天雨稻。穀熟農固喜。米賤吾亦飽。破屋與麤飯。平生事足了。雨罷颯然秋。長風送懷抱。

集穎山齋賦鬪蟋蟀

少皞行殺機。蟲豸氣先受。擢趨起郊原。唧唧滿戶牖。幽士感孤懷。黠兒逞捷手。巖厓剔虺穴。曉暮迹莽藪。

草間出韓彭。席上爭季郗。旗幟標錦彩。輝映秋八九。俠客呼鷹侶。閒曹鬪雞友。致師曳弱管。拔柵開細柳。未戰厲刃須。先聲憑氣取。初看齟齬交。如聞劍戟糝。膈膊與方酣。騰挪迭相蹂。勢均前却窮。力并轉側久。一擲或暫解。再合似佯誘。寸吻未云裂。兩股詎肯後。微傷強撐振。並仆益紛糾。呼吸不相當。斫刺已遭掬。賈勇一鳴驚。亡魂四隅走。竄伏思藏頭。追奔更拉肘。壇心決死生。客面徵勝負。捐軀果何爭。戕類異滅醜。造物孽蝨賊。歡場狎斯阜。斯蝨阜蝨皆蟋蟀類宮掖唐家戲。平章賈相詬。流風昔朝寧。好鬪今童叟。長吟在野篇。幽詩王化首。

題元祐進馬圖

程真江收藏圖五馬每一馬後標計年月甚詳意若當時進真圖簿獨不載畫者姓名畫却生動有法一匹元祐元年四月初二日左驥驥院收董氈進到錦膊驄

八歲四尺六寸一匹元祐元年十二月十六日右驥驥院收于闐進到風頭驄八歲五尺四寸一匹元祐二年閏月十九日溫溪心進照夜白一匹元祐二年十二月二十三日于天駟監揀中秦馬好頭赤九歲四尺六寸一匹元祐三年八月初九日進到豹頭驄四尺六寸

趙宋全盛元祐初。舉朝卿相皆鴻儒。巍峨元老溫與潞。二呂三范同機樞。六合清明萬物遂。兩宮日月羣公扶。代遠人亡青史舊。流傳墨寶珍茲圖。茲圖五馬盡神駿。元祐年月來穹廡。董氈初進錦膊驄。于闐鳳頭如鳳雛。照夜白自溫溪獻。好頭赤本秦中駒。豹頭誰進偶缺略。馬齒尺寸端詳書。青絲一人牽一馬。冠服各異馬色殊。行歸華廐新翦刷。羈轡未受當風趨。駿尾飄拂連錢動。骨肉精能清不羶。筆飛墨走落空

橫姓名失識。知誰歟。承平在眼圖在手。蒼茫俯仰生嗟吁。中朝有人四夷服。胡馬不敢嘶邊隅。遐邦貢獻琛寶。却要使龍種歸驕虜。大宛汗血涉海至。豈事漢武窮兵誅。聖后垂簾真相立。重譯跪進彤庭臚。鳥言卉服次仙仗。特詔畫手工描摹。黨碑一出天地閉。陰霾障日中原墟。銅駝荆棘生轉瞬。此馬知否來南都。馬不可問圖尚好。劫灰千載空區區。君不見他年窺覬偷寫照。有人立馬憑山湖。神器一跌元祐末。章蔡之肉何堪餽。酒酣歌此意慷慨。冬青樹老啼霜烏。屏斥騏驥駕鴛劣。由來此恨無時無。

北行舟中懷許二子遜於兩粵

別後風流憶邈然。驚人佳句萬人傳。狂來魯國真男子。餓後淮陰尙少年。揮斧莫教修皓月。銜杯何處問青天。南游芳草萋萋遍。夢到羊城路幾千。

三年京洛共牢愁。二載章江復漫游。雁陣分行偏度嶺。梅花無使獨登樓。細斟柳酒千場醉。曼舞珠娘一笑留。可道春江明月夜。思君有客倚孤舟。

蔣恭棐

字維御。長洲人。康熙六十年進士。官編修。

景州董子故里

嫚秦廢學校。坑儒并焚書。師吏辜誦說。六經歸榛蕪。漢興雖天授。創業內征誅。典禮命叔孫。縣叢誠區區。

詎能崇正學。詔令相江都。後復相膠西。驕主重詔諛。誠正能感通。兩地無齟齬。邪臣懷妬嫉。主父偃公孫宏。譎計何從據。春秋詳災異。衆口訾其迂。弟子昧師說。呂步舒。妄謂論大惑。獲臯得免死。緘口全其軀。所幸聖道明。邪正分殊途。以待後來者。迭起肯匡扶。有宋五子興。直溯姬孔初。日月懸中天。蒙翳消雲衢。何人啟靈徑。廣川實先驅。而胡昌黎伯。吐辭取敷腴。屈原司馬遷。子雲與相如。論道遺董子。所見猶偏隅。我過景州里。祠宇裝粉楡。稽拜瞻儀容。和粹緬真儒。王道復誰陳。攬轡空踟蹰。

尹繼善

字元長。號望山。章佳氏。滿洲正黃旗人。雍正元年進士。官至文淵閣大學士。諡文端。有文端公集。

蕭揭山房詩話文端公歷任封疆晚歸臺閣歲歷五十餘載承先啟後三代平章史冊所罕覩也公在江南最久慈祥豈怙沾洽閭閻而官吏格心斂手無敢稍爲乾沒及去而漕弊漸滋至今猶煩釐剔故民間思而誦之公入覲詩云九重塵念是江鄉葑屋年來少葢藏疾苦未全登奏草帝心早已切如傷多年積潦閔淮徐元氣於今尙未舒四野蜚鴻猶滿眼頻詣景象近何如直以民隱具陳萬規于頌實有古大臣風範性耽吟詠詩等牛腰藁後

秦隴江南余皆三至新知舊雨聚散無常癸酉春日一房山齋中感懷口占

惜春屢唱送春詞。人似浮雲任所之。白下風光常入夢。青門花柳又題詩。行來蹤跡離還合。老去情懷笑亦悲。此日齋前頻把酒。明年賓主得知誰。

余將赴金陵得袁子才山中寄懷詩依韻和之

廿年四度到江城。江草江花屢送迎。白下爭看新使節。青山仍伴舊書生。梅因耐雪香逾晚。雁爲凌空影自橫。野外清閒無底事。行雲來去尙關情。

瑤琴獨抱向誰彈。僻處荒村夢亦安。膝下晨昏方日永。中間嘯傲覺春寬。來札有山中歲月膝下晨昏之句。隨風笑我舟無定。臥雪憐君骨尙寒。欲問年來身健否。幾回北望整征鞍。

高東軒東省查災甫竣又奉命來南勘河余於病中寄懷卽用東軒舊韻

年來轍跡遍東南。卽雨歌傳信不慚。山左茅簷如望歲。沅陽古渡又回驂。秋深澤畔鴻皆集。路滿棠陰樹亦甘。那得揚帆登畫舫。清波皓月夜深談。

流水行雲不染塵。先憂後樂總忘身。廿年豈易成知己。千里還應似卜隣。望月定多懷友句。隨風誰是繫舟人。署中舫屋名不繫舟。料公此日篷窗枕。夢裏猶思海上民。

學使劉崇如所得三鶴忽失其一復賦

胎禽攜傍碧雲陰。世上塵氛未許侵。纔喜蹁躑來瘦影。忽從寥廓動遐心。養成羽翮三秋健。借托烟林一載深。也似鵬飛萬里去。不甘寄跡在江潯。

幾見梳翎碧沼頭。一聲清唳別羣流。海天自覺乘風杳。竹塢曾經對月幽。鷓鴣縱多誰作侶。稻粱雖好莫

輕謀不知亭畔雙棲者。可羨翱翔得意游。

和如菴學使臨行前一日不繫舟小集卽事兼以留別韻

池上風清送晚涼。招尋把酒對秋光。人逢舊雨情偏遠。山帶斜陽色倍蒼。老圃漫嫌紅葉少。好花終覺素

心香。更深重話當年事。福地閒雲景不忘。如菴前印游攝山詩。有千年福地無人到。一片閒雲有夢通句。

又向棲霞欲逗留。看山夙願可全酬。連朝送客頻題句。兩地懷人易感秋。曲徑自隨幽澗轉。大江仍抱碧峯流。雲烟深處塵寰隔。拾級應登最上頭。

過燕子磯永濟寺

每過精藍便繫船。非關前路受風偏。秋殘野岸丹楓冷。水落空江翠壁懸。月色微茫僧入定。鐘聲斷續客初眠。回思十七年來事。似與名山有宿緣。落葉聲中響木魚。茶烟輕散晚風餘。探幽路慣依山轉。隔岸人多傍水居。幾度登臨皆偶爾。再來意興復何如。虎溪一笑重回首。又送行雲過太虛。

張廷瑑

字桓似。桐城人。雍正元年進士。官至工部侍郎。

過永濟寺贈默上人

一徑秋陰蹋薜苔。翠蘿深處寺門開。懸崖石色窗中出。繞閣江聲樹杪來。牘有禪房容徙倚。尙畱先澤重徘徊。流光五十餘年事。又到蒲公舊講臺。康燕壬戌先公有贈蒲公和尚詩

松堂清悶聽鐘魚。苦行山僧八十餘。卓錫不曾行脚去。繙經爲愛閉門居。閒雲野鶴心同靜。瓶水爐香意自如。古木十圍忘歲月。蒼顏相對一窗虛。

王安國

字書城。高郵人。雍正二年殿試第二人。及第。官至吏部尙書。謚文肅。

蒲褐山房詩話文肅清流眉目官廣東巡撫每以風節自矜及入長六官晚年充會典館總裁所撰欲上比周官唐六典以下不屑道也乾隆甲戌予以會試入都公邀同編纂常見老嫗所抱驚停玉時瑤環瑜珥卽今給事中懷祖時纔十餘歲耳公歿懷祖幼而好學長與興化李進士惇江都汪貢生中泰州劉廣文台拱深研經義而小學尤精所撰廣雅疏證剖析毫芒咸歸古義時人言訓詁者莫之能逮予以公居爲館舍見其宅第庠隘廳事至不容旋馬益知清德之匪貽久矣

游蒜山

杖策期我侶。柳目烟嵐飛。披徑躡層岡。緣源面修碕。空水寒無姿。淡綠生已微。僂僂一老僧。隔澗開山扉。延客坐松寮。梵響生清機。谷幽光易暝。江遠聲逾稀。衆籟窅然合。心清無是非。憩久神彌愜。徙倚憺忘歸。舉手謝前嶺。逶迤窮林霏。

山光引游子。窈窕乘險絕。路歧情屢眩。徑錯與逾發。修竹翳層陰。危松綴殘雪。衆鳥寂無聲。騷屑林響徹。

石氣入昏冥。川光互漂擊。岸轉失來蹤。谿明得前白。斜日下江臯。餘霞蕩晴碧。夕嵐落千尋。空色遞相激。握手尋舊蹊。一一想所歷。忽看江上月。遙遙挂蘿壁。

樓儼

字敬思。號西浦。義烏人。寓居上海。以薦入武英殿修詞譜。官至江西按察使。改京卿。有蓑笠軒僅存稿。

蒲褐山房詩話。西浦寓居申浦。與繆荃孫。張幻花。以詞唱和。兩君極道其工。東隱已丑。詔修詞譜。被薦。與杜紫綸。同館纂修。辨析體製。考訂源流。曾駁正宜。與萬氏詞律。百有餘條。其中竅要。又以張絳之詩餘圖譜。程明善之嘯餘譜。及毛先舒之詞學全書。率皆謬妄錯雜。倚聲家無所遵守。因自訂羣雅集一書。以四聲二十八調爲經。而以詞之有宮調者爲緯。併以詞之無宮調者。依世代爲先後。附于其下。竹垞先生曾爲之序。後以卷帙繁重。未及開雕。今不可復得矣。

過同官峽用韓詩原韻

蠻鄉臘月天。詩境亦不少。閒閒巖洞花。澹澹沙洲鳥。凍雲釀微寒。薄雪弄清曉。作吏雖庸庸。行已實矯矯。江山景不殊。俯仰腸空繞。試問公家事。茫茫誰可了。

初秋夜坐

秋到月逾白。暑微風漸清。微吟忘漏下。久坐覺涼生。昨夜蓴鱸夢。當年鷗鷺盟。拂衣歸亦得。鷄肋戀微名。

龍江晚泊

風晴日暖浪花平。一櫂秋江鏡裏行。薄暮山光多黯淡。近邨人語漸分明。長官自諳江湖趣。父老空勞燈火迎。指點星河天色冷。船頭小立露華生。

清明

三分春已二分春。幾日驚看火又新。人面桃花紅乍吐。裙腰草色綠初勻。試茶擬問山中信。插柳空憐客裏身。誰道秋千村落好。東顧吹滿敵裘塵。

光霽堂讌集演邯鄲夢傳奇口占二絕

一枕風光夙願償。醒來猶未熟黃梁。銀箏檀板尋常事。譜出英雄淚幾行。尋思我亦夢中人。一劍千山事已陳。回首瘴雲天似墨。恍疑磨盾是前身。

湖海詩傳卷二

汪由敦

字師敏。號謹堂。休寧人。雍正二年進士。官至吏部尚書。諡文端。有松泉詩文集。

蒲褐山房詩話。公優直內廷。幾三十載。清和恭謹。上結主知。予鄉會座師。皆出公門下。甲戌在京會試。以小門生禮見。相得。雖然。深加獎厲。蓋夢文子。座主爲之先容也。其後哲嗣承藩。今官總憲。先與予同直西清。得公行事益詳。公卒後。總憲囑趙君翼編次其集。繕錄進呈。上製詩以弁其端。

題徐潛昭所藏米元暉山水

春雲濛濛濕不飛。層巒漠漠開林霏。力窮造物人毫素。老頗僊筆傳元暉。楚山清曉無由見。尺幅寸縑珍紀覿。含毫待制知幾何。玉躡金題歸秘殿。此門流落自何年。蛛絲煤尾淪寒煙。忽逢好事得收拾。腰纏豈惜奚囊錢。於潛徐翁隱埃壙。几列緹緗羅寶繪。子昂獵騎趙昌花。什襲雖多此其最。臨安山水多峒奇。圖中所見猶依稀。橫風吹雨過溪外。山腰紫氣斜陽低。雪花打窗歲方宴。邀我題詩展繪練。我詩漫與何足多。鑑古尤難辨眞贋。朝來舒卷坐擁鑪。眼前歷歷四子湖。平橋老樹虛亭孤。山樓對雨誰能圖。感君珍重重拂拭。誰道知音世難得。只愁名蹟少流傳。不乏高人能賞識。

鄭方伯黃臬司張觀察招同彭宮允遊趵突泉

濟南名泉天下奇。泱流突見城南陲。白龍拔地幾千尺。鬚爪劈破青玻璃。明沙石瀨開平曠。噴薄中心忽神旺。地湧青蓮玉作花。井抽冰柱銀翻浪。驚湍灑灑匯清渠。日影波紋上綺疏。當軒坐擁三堆雪。繞檻平傾百斛珠。圖經自昔聞靈瀆。勝槩今來真在目。寧誇鸞羽曲江濤。不數晴虹匡阜瀑。公餘軒蓋駐郊垌。野色泉聲共一亭。泳游自適魚依藻。呵殿不驚鳧唼萍。清秋歲稔場將滌。地主情殷尋古迹。酌泉共喻飲冰心。紀遊莫笑成詩癖。

晴嵐閣學貽水僊碧桃走筆爲謝

釀花居士遣送花。白琢冰雪紅蒸霞。亞枝含笑人面暎。倚石側顰雲冠斜。濃妝淺暈各異態。神仙風骨無爭差。信風纔到老梅蕊。綠意未迴新柳芽。斡旋直借補天手。鬪豔競出東皇家。凌波娟娟步羅襪。和露灼灼調鉛華。風輕自著紙屏護。寒重更倩重簾遮。薌林矜賞破枯寂。靜海觸緒翻愁嗟。梁勳二公各有報詩。其意云爾。我生幸不乏意趣。燈前笑語爭喧譁。兒童少見強解事。既以新水培新沙。燈棚廟市不計數。珍重詎比辱拜嘉。屏間墨戲適寫照。筆妙隱躍飛龍蛇。屏間雙清閣小幀亦釀花居士所臨趙子固王元章兩家筆。頓令陋室春光奢。從來草木同臭味。莫笑瓊樹依蒹葭。

吳江

輕帆向晚急。遠水入秋澄。煙霧漁莊柳。風低蟹籬燈。市沽缸面酒。盆採折腰菱。高士傳祠廟。遺蹤未易徵。

聖駕南苑大閱恭紀八首

千羽堯天洽。車書禹蹟同。順時稽令典。撰日整元戎。七德揚神武。三驅振古風。不須刊石鼓。盛烈邁車攻。
清蹕向長楊。鳴鑣出建章。九旗懸日月。萬騎蹴冰霜。帳殿氍毹暖。旌門組練光。驍騰健貔虎。肅肅羽林郎。
地是周靈囿。城連漢上林。華旃馳日馭。紺宇佇天臨。沙路飛塵淨。松皋積翠深。離宮時暫駐。端不爲從禽。
甲帳拱中樞。辰旗辨正隅。花鬃金駟褭。析羽繡螭弧。令舉吟龍角。營開合虎符。氣酣金鼓外。雷動萬人呼。
日角瞻天表。親巡驃騎營。乘麾森豹尾。按轡儼龍行。韎韐威容壯。戈鋌節制明。六軍同拊躍。挾纊此時情。
周官司馬法。風后握奇經。迭進嫻師律。環生按陣形。千行飛電紫。萬道漲煙青。卻望高臺上。森嚴衛百靈。
六鈞神力勁。一發耀天威。旋旆仍餘勇。呼鷹更合圍。彩翎迎日麗。錦翼傍雲飛。恩賚叨蕃錫。歡同奏凱歸。
詰戎非耀武。偃革誕敷文。喜氣融城雪。和風捲陣雲。陽回軒律正。歌阜舜絃薰。謨烈承三后。垂衣仰聖君。

過丁乃清書樓

賸有餘閒作往還。每來高館俯塵寰。風光盡入三層檻。晴靄低迷幾曲山。好客坐看煙樹綠。新詩吟對夕陽殷。漫摹書幌思陳事。瓊蕊營窗手自攀。

丁亥余讀書是樓樓前玉蘭最盛

元夜

村舍風光五夜過。春燈合岸射晴波。當頭璧月沉沉夜。勸客銀船緩緩歌。對酒漸傷前輩少。追歡惟聽舊

聞多板橋霜。重人初散。不醉其如曉漏何。

除夕和趙學齋韻

十載清班忝致身。今宵餞臘正迎春。開歲元旦立春漏聲漸聽將交子。魁柄俄看又指寅。芸局圖書從汗漫。青編

姓氏懼湮淪。是夕燈下編訂明史文苑列傳挑燈檢點經年事。多愧蘭臺筆札新。

常山峪行宮蒙賜佛手柑恭紀

佳實曾陳玉案傍。冰盜擎出沐恩光。賜從紫塞風霜老。貢自炎天道路長。名美竝標僊掌秀。色深遙映御衣黃。縹囊什襲歸裝穩。畱對秋花共晚香。

題陸芑洲寒山舊廬圖用張文端公韻

蒼煙古木宋林邱。傳為韓平原南園故址四十年前紀舊遊。予於壬辰癸巳間過此入夜泉聲清到枕。隔城山色近當樓。石間句好苔紋護。洞口雲濃樹杪流。山上為紫陽洞此日天隨為地主。鶯花一洗向時愁。

王峻

字次山。常熟人。雍正二年進士。官至監察御史。有良齋集。

蒲褐山房詩話。先生居壘中。義形于色。遇事敢言。常劾其壘長。時以為當。故雷副憲貫一序其詩文。謂議論侃侃。而言天下事。指此也。謝病歸。為蘇州紫陽書院院長。巡撫宗室雅公蔚文。小有過舉。必面折之。蓋自來院。及所罕見也。其詩宗尚兩馮。參以趙秋谷何義門之說。不獨前後七子。深加擯斥。卽漁洋尙書。亦多未愜然。集中貽行詩。最為清矯刻削。轉似蜀道集。何也。

舟中望江岸石壁書所見

絕壁插江濱。瞰臨幾百丈。舟行過其下。人語山蒼響。石門闢玲瓏。洞穴赫宏敞。俯探魂已驚。仰睇神俱蕩。忽看崖隙間。結構絕人想。架空木縱橫。插罅椽三兩。連延綴蜂片。漂搖冒蛛網。鳥飛不可過。躋攀何以上。舟人頻指點。使我彌恟怍。云昔吳逆時。居民苦擾攘。相攜逃此中。不爾罹賊黨。聞言轉愀然。前行去沆漭。

斗狼箐

斗狼高插霄。萬木蒙龍蔽。循途繞山麓。壁暗天無霽。輿夫喘不前。號呼兩繩曳。盤紆至山腰。身已入雲際。四觀所經山。帖地皆瑣細。是時煙雨中。褰帷試一睇。灌木不知名。山花開自麗。芭蕉葉拂衣。翠竹陰交翳。羣猿競來窺。野雉止不逝。行行造其巔。惜哉難暫憩。蠻荒故多奇。天地亦護閉。此方山更雄。物產佐國計。丹黃及鉛鐵。採取有定制。而此深箐中。材木衆仰濟。自來阻幽險。兼以畏瘴癘。一朝成大路。見者恣芟薶。我知十年後。山童地且敞。感此遂成詩。山靈庶相契。

雨中過大小斗狼箐

小斗狼箐七八折。大斗狼路更險絕。蜿蜒十里幾十盤。關索雞公敢齊列。蒙龍萬樹翳天日。釀雨蒸雲失秋烈。人從天半下林杪。欲畱不能氣鬱結。平看對面山萬重。如瞰如飛鬪截竄。我行半日雨已收。忽衝雲脚又噴泄。輿夫躑躅倩人助。泥滑兼之石凹凸。况逢大水當路臥。性命須臾懼傾跌。山下居民三四家。伐

薪採斲衣破裂。行人再過不勝愁。全家來此一何拙。嗟哉苦樂天難均。蓼蟲食辛味亦別。

哭歸安吳奉常房師

難將黑水洗沉冤。萬里層冰慘鬼門。魍魅有知應下淚。文章無地與招魂。名高至竟爲身累。爵重誰能丐主恩。望斷尙陽堡外路。幾時歸櫬赦虞翻。

李重華

字實君。號玉洲。吳江人。雍正二年進士。官編修。有正一齋集。

蒲褐山房詩話。吳江詩家。百餘年來。苦無傑作。先生筆力嶄然。滔滔自運。其宗法蓋在杜韓間。時吳縣蔣恭棨編修丁古文。而先生以詩名。兩君莫能軒輊也。先生諸子。皆能讀書。登仕路。而詩文未有破捨者。僅存此編。棗木亦久朽蝨矣。

道古四首

羸氏尙督責。好用韓非言。不知吃公子。乃伏亡秦根。其身則已斃。其說旋以尊。良由嗜殺身。理勿使久存。岐周積仁義。箕疇助其源。奚獨旦爽謀。亮弼貽後昆。維韓闡申商。毒甚燎火燔。追咎道德家。伯陽寧非冤。子長憤著書。論或憑胸臆。殷勤表素王。已足稱神識。時方貴黃老。經術尙剝蝕。卓然仰高山。先路導其惑。駢羅七十賢。附聖爲羽翼。遂使絃誦堂。崇祀盛軌則。我嗟衛道人。曾未預配食。盲左旣酬功。腐遷何愧色。俗儒矜奧博。凌雜徒記醜。我思鄭康成。迺得稱富有。窮經蒼羣說。羅列燦星斗。微言或有待。大義誠悉剖。

隱耀避時屯。侯伯不得友。悠然通德居。書帶映窗牖。陋彼馬季長。朱戶竟俯首。回賜不名官。斯言能道否。
濂溪圖太極。發緒內希夷。正類洙泗傳。柱下亦我資。相彼容哲人。妙契超言思。早歲輒聞道。聖域可等期。
傳心不在圖。聊復意擬之。微言吐精蘊。迺配繫易詞。斯人開閩洛。功績孔與姬。太元與元苞。何獨蠡測爲。

劍閣

我行閱雄關。天險殆無敵。迢遙來一髮。突兀遏重壁。橫排十萬劍。豁罅不盈尺。都無客土附。而惣精鐵積。
其巔鬱叢箐。其底亂深射。烏兔讓飛走。蛟螭避堂宅。入門循地隧。雙峽亘而窄。左作長鯨掀。右類巨鼉擲。
雷轟泯斧鑿。雲蔚隨縷脉。迴風驟長驅。霜氣砭領脊。洪荒想胚胎。元氣更併迫。倘非僊掌排。亦屬應龍割。
五丁力不逮。渠能萬靈役。殘山通仄狹。畱險藉控搃。誰知徒長奸。據竊逞荷戟。炎漢固殊類。偏安吾所惜。
子陽先覆轍。王孟後接蹟。稱帝旋洞胸。降王遞銜壁。何況獻賊流。蝮蝎恣毒螫。張牙縱狂嚙。摧髮終寸磔。
伊昔影敵初。人煙莽蕭索。生息今百年。墾闢連萬陌。文翁兼詰戎。武鄉兼教澤。遼絕若番藏。倏瞬達重譯。
而此枕席安。號渙誰壅隔。地利分險夷。皇圖觀順逆。磨崖奮如椽。申命誠梁益。

五丁關

頑山積精鋌。屏亘斷無路。旁崖暗潺湲。豐罅不可度。摩天大斧劈。霆迅裂局銅。至今龍鱗文。刻畫筋脉露。
長蛇爾何物。詐誘致頽仆。得毋山精靈。幻化泄餘怒。二帝鑿混沌。七日迺物故。五丁頗相類。事與天地忤。

吾聞昔僊人。移山如縱步。造化可迴斡。猛奪何足慕。

孟冬遊草橋積花軒得澤字

遙情緬西山。近憩憶南陌。相期有素心。卽事互招客。氣候涉初冬。煙景異疇昔。折葦芸以黃。滄溪澹而碧。松門披宥窳。竹牖睇虛白。沿洄稍通渠。點綴頗疊石。長風遞寒條。落葉冒行蹟。始悟三春時。實見萬卉積。鄰園富花房。煖窰坎地脉。駢莖轉蔥蒨。吐穎彌悅澤。翻憐神植翁。坐令寒暑易。天香自供養。元化在肘腋。茲遊忘賓主。酣燕任狼藉。射覆笑先登。藏鈎戲相厄。開懷試清吟。佳興勿虛擲。

送徐編修澂齋冊使琉球

人言地缺東南陬。羣川萬派爭歸流。譚天誌怪寓言耳。寧知地體圓如球。中華正居赤道北。列宿照耀分齊州。河環嶽匝限大海。人文道化雄千秋。奇肱鑿齒候朝貢。歸往大國爲綴旒。扶桑之西地以萬。盡控絕島如萍浮。吾皇手啟天地鑰。八絃六幕綱維周。揆文奮武四十載。西北小蠢指掌收。乾端坤倪順迴斡。火淵冰海匪遐修。帝言覆載悉寓下。來王待冊惟琉球。嘉汝有才冠詞館。其副大使敷鴻猷。玉棠崇班一品服。顏如渥赭鬚髯蚪。牙旗畫鼓駭溟渤。大官餞飲擁上游。桅高百尺颿六道。柁以鐵力沙棠舟。百靈開明萬怪伏。禽魚翔泳隨權謳。白洋橫分亘其腹。上看有極當船頭。珊瑚瑋瑁作海底。幻化五色光通幽。中山居民共雷抃。盟心望拜依神州。窮歡極讌坐宮殿。炮膾異族臚珍饈。飽求詞賦乞書翰。星斗燦燿龍蟠蟠。

鑄之屏風刺弓。鑷寶玩萬祀。英名留此行。何止使不辱。神人坐致懷。且柔宣威播。澤報天子。乘槎漢客安。能儔。邁歸更作寰海誌。他年考据當九邱。

小花山

一徑縈丹壑。千松入翠霞。人歸衆香域。山是妙蓮花。竹外春風定。廊邊白日斜。步來幽意愜。延坐拓窗紗。

寄席對揚并謝鈔書見寄

經時相望渺雲煙。標格英華世孰先。楊柳當年張散騎。芙蓉初日謝臨川。虞山風雅空前輩。婁水芳華見別傳。梅村係外曾祖聞說異書將寄與。裝成何止玉爲篇。

過居庸

太行東驚正迴環。界截燕雲是此間。九土橫分雄地軸。三邊總會扼天關。羽書報捷風雷迅。戍卒承平日月閒。此去漠南皆枕席。馬啼思踏賀蘭山。

綏德州

全秦北戶勢嵯峨。韓范經營舊不磨。橫嶺千重遮絕塞。孤城三面繞長河。雲開古戍烽煙息。霜落秋原禾黍多。翻笑畫疆分控日。枉令西夏擁瑯戈。

湖天雜興

志和僊去杏忘歸。依舊青山擁釣磯。但隔斜風兼細雨。柳條如颺綠蓑衣。
晚洲漁笛裊纖音。颯颯蘋風動遠林。無限亂雲飛忽盡。洞庭空翠落湖心。
自趁溪雲撥小船。沿河幾度宿湖天。爛銀沙尾醉明月。有夢不離鷗鷺邊。
斷渚平沙淨渺然。酒旗寒映晚炊煙。分明滿幅營邱畫。畫出江南欲雪天。

劉統勳

字延清。號爾鈍。諸城人。雍正二年進士。官至東閣大學士。卒贈太傅。諡文正。

蒲謁山房詩話。公光明正直。燭照先幾。事之可否。微發其端。至一二十年後。始服其精識。士有賢不肖。亦洞見其將來。不可得而親。亦不可得而疎也。內外臣工。無不仰其剛果。而情意肫然。不欲過爲嚴峻。生平未嘗奉佛。然於大乘方廣諸經。皆能得其指要。六句以後。入夜秉燭跏趺危坐。至二三更許。窗外偶有聲響。無不悉聞。臨終之日。五更起盥洗飲食。如常。升輿至東華門外。輿微側。家人呼之不應。比啓帷視之。則已瞑矣。上親臨其喪。見室無長物。內外蕭條。枯槁寒氣襲人。因深爲嘆息。賜諡文正。不待禮臣議也。公薨後。今相國石庵先生。以事在記。注功在史。歲不誤行狀。不請爲墓碑。墓志第取所奉諭旨。及生平奏疏。編年繕錄。以示子孫。其謹慎小心。亦後來台輔所當取法者。

平金川詩

臣伏見皇帝陛下。御極以來。聲教暨訖。肖翹遂性。猛鷲易形。所謂仁育羣生。義征不諱。四海九州。大順大化者也。西域夷金川土酋莎羅奔狼卡。忽構隣釁。不遵吏約。初懷懼罪之心。旋成負固之狀。潛伏阨隘。天討久稽。皇帝命大學士傅恆。親往經略。誅渠奸。破堅壘。刻日獻俘。乞降不允。皇帝特頒恩

諭許其自新。二酋悔罪，抒誠詣營歸命。以六事自贖，經略宣布盛德，受降班師，桴鼓不勞，膚功立奏。蓋敵愾之後軍，猶在中途，而振旅之前旌，已返內地矣。捷聞，晉大學士、爵忠勇公、御製碑文，勒石太學，以昭示無極。慶賀禮成，遐邇歡悅。臣備員禁近，親見指揮，謹撰平定金川詩一篇以獻。凡千有八十字，具道聖天子武烈文謨，明良喜起之盛。雖詞遜昔人，而事高往古。傳諸簡冊，庶以揚扃我國。家赫聲濯，靈於萬一焉爾。其詩曰：

皇臨六幕，赫赫明明。陽開陰闔，秋鞏春萌。有遠而賓，無疆弗庭。孰恃蓮質，以扞大刑。西南絕徼，下豁高晴。躡躡呶咽，兔窟蟻封。泳沫遐闊，以長以生。跳跟自適，乃忘其形。狼奔豕突，厥隣是驚。彼羸弗支，籲我尉候。選隸授兵，往訶往救。不卽厥靡，翻駭而鬪。負嵎誰嬰，虞人避獸。螳臂已揚，懼弗蒙宥。磨礪觜爪，包藏雛鷄。巨網空恢，神椎莫透。時曠功稽，師勤將逗。惟皇遠覽，誕降天誅。謂叛無小，在梗斯鋤。非懲而舍，頑則莫渝。爰究爰度，運此鈐樞。曰予股肱，汝宏遠謨。汝往徯克，汝遂相予。虎賁汝從，錫汝彤弧。左右文武，敦圉之符。月在甲子，三日癸丑。建旄設旒，良辰是取。于塞于郊，來桓來糾。天子莅止，羣公先後。乘以訾黃，酌以大斗。虎步龍驤，相拜稽首。載抗威稜，來歸非久。爰集禁旅，禁旅庵庵。長轂雷野，高鋒彗雲。八方散彩，揚光飛文。讀列偏裨，矚朗紛紜。爰召勁卒，目我邊屯。卷甲東來，如育如賁。威險秋霜，氣挾春溫。擢淚執猛，動若焚輪。相臣率止，是用大誠。倩洌戈鋌，焜燿旗旆。度險如夷，飈驅電邁。乃越我疆，乃臨彼界。乃訓諸司，我營我隊。

有蹶其輿。孰遨以怠。乃討軍實。我卒我械。有淬其鏃。孰窳以壞。彼烙孰煽。孰誘孰和。廁我戎行。敢爲詐說。眇瞻冶夷。日測則叵。旣駢而誅。乃絕盜囹。蔡莽葳蕤。岳崖嶮峨。倚依歛碣。墨石是窩。龜縮蛇伸。蜂房螿窠。霆擊山鳴。堅摧峻挫。外潰以犇。中慄而掉。彼氣斯隕。我勇聿冑。涉躡蒙龍。騰凌翫翫。陣相孤虛。軍環粟兆。白羽蜚叢。赤輪響爆。羈屢暘睽。僂束蹠蹕。何阻不踰。何幽不竅。旣選摧鋒。將移大纛。匪枝匪梧。無寧盡劉。笞痛而警。惟生是求。負殼藏踪。遣訢啾嘍。待命孔殫。如魚挂鈎。相曰非誠。矧乃重尤。旦夕爾俘。奚慝是留。惟爾探威。戕隣樹仇。我仆爾梟。用綏彼柔。草牘師中。達於帝聽。請覆其巢。請訖其命。無俾遺育。以狃不共。弋取其穴。孰云可縱。相厥山川。審茲涂徑。簡銳而往。算則有勝。無我費留。勞輝我衆。三旬曷淹。一鼓斯定。皇容有稀。顛瞻咨嗟。予怒狂醒。予閔窮呀。弗赦弗圖。具燼於燬。曾是穀鯨。而斧鑕加。予惟安人。非武節誇。予奉慈音。是訓是嘉。汝其遄歸。有競鼓笳。息乃鷹揚。來相予家。相布皇言。風行汗渙。貸彼游魂。許以革面。凡我三軍。勿虓勿悍。式和爾容。歸承帝眷。有愷之魁。跂行闖現。魚瞰雞睨。出於笠圈。侏儻睽睽。有辭有獻。喜溢斯陶。悸餘猶顛。虎臣矯矯。提攜以來。取道彼衝。靡慮靡猜。翼從馳驅。結束鞞鞞。翊翊蠅蠅。雀躍兒畦。造於中權。膝屈額墮。戴費銜盟。牽牲薦壘。感發漣沍。悔深歎喙。六約有嚴。敢乞相裁。相曰來前。爾無怖苦。皇有恩言。弛爾罪罟。爾田爾宅。爾族爾聚。爾約我聞。我弗貸取。賜以鏐帛。啖以酒脯。舍之軍中。始焉圍圍。少旋而舒。觀其蹈舞。乃告成功。班師振旅。振旅輪軸。露布以傳。皇曰休哉。錫福汝駢。疏爵酬庸。庸自相先。

豹尾雙綏。衣袞圭桓。相拜稽首。天子萬年。稱賀論功。歌詩肆筵。祇謁寢陵。明禋用虔。樹石成均。既磨既鑄。磨鐫伊何。惟皇有作。如日斯光。如天斯大。炳耀鏗鐫。詩書莫過。神武宏昭。聖文遠播。百爾賡颺。載歌載賀。五色相宣。八音迭和。盈耳洋洋。飛騰蕩簸。頌我皇猷。美我良佐。佐聖以蓋。膺力方剛。爲元爲愷。爲召爲方。既定遐陬。思日贊襄。獻壽慈寧。菲祿穰穰。大孝尊親。徽號用彰。靈契神符。寫奕鴻龐。聲殷地紘。輝燭天閭。式於九圍。億載無疆。

題澄懷園八友圖

久結金蘭契。同殷翊贊心。勤拳分講席。蕭灑共芳林。煙樹瀛洲景。風篁韶護音。西園圖雅集。應遜此高深。自顧成荒落。名賢比屋居。月川晴理棹。花塢夜攤書。分袂趨華省。鳴珂到直廬。不須論主客。泉石列簪裾。

陳浩

字子瀾。昌平人。雍正二年進士。官至少詹事。有南游草。

蒲褐山房詩話。先生少日。畫聲詞館。與趙副憲大諒。李編修重華。諸贊善錦齊名。其子戶部君本忠。與余鄉試同年。故入京。晉謁先生。以子弟畜之。生平兼工書法。得蘇文忠墨妙。爲余書者最多。四十年來。遷徙遺失。僅存一册。蓋壬申春。典試南行所作也。戶部兄弟皆早歿。詩稿不傳。而都下亦無知其工書者。

飛來峰

衆山環兩湖。皆以淡而妙。茲峰獨怪奇。壁立聳羣峭。梯空臂難引。吹籟穴能嘯。青蒼盤松檜。瑣細雜蘿蒿。

其下爲冷泉。鬪石恣騰越。有亭翼然臨。俛仰便登眺。旁尋得洞戶。深入窮窈窕。直穿山腹行。上徹天光照。誰參造化工。鑿破混沌竅。自古名飛來。此說或非剽。天欲壯此湖。靈鷲分半嶠。至今蹇翥勢。猶見神尾掉。將老獲斯游。俗病翼可療。徐步下山橋。溪花向人笑。

周立厓侍御以所刻坡翁書清虛堂雪詩見寄卽次韻題卷尾

坡公眼空恆河沙。下視凡筆如蜂衙。偶然對雪揮醉墨。十指拂拂飛天花。豪情奇氣兩鬱勃。杜韓顏李同一家。神呵鬼護七百載。墨采照耀金輪雅。立厓侍御有古癖。欲爲藝苑畱瓊葩。搦成新刻遠寄我。見之技癢不可爬。我嗜公書嘗苦學。如飢思食渴飲茶。梁園寒夜百展玩。不覺漏鼓聞三撾。臨池那無千挺墨。惜哉老矣空吁嗟。清虛之堂在何許。栢臺雪照霜天霞。

渡揚子江

瓜步潮初落。春颿趁曉風。雪消江草碧。日上海雲紅。重鎮依天塹。中流起梵宮。濟川吾老矣。倚棹興無窮。

山陰舟夜

客行初入越。恍似鏡中游。風月來清夜。溪山送小舟。翠攢寒竹淨。香動早梅幽。已近齋居日。忘機對暝鷗。

遊蘭亭

晉代羣賢蹟。風流宛在茲。欲尋修禊事。不待暮春時。古色看修竹。清流到墨池。行廚知有酒。先酌右軍祠。

嚴遂成

字松瞻。號海珊。烏程人。雍正二年進士。官嵩明州知州。有海珊詩鈔。

馬文毅公彙草辯疑書後

入獄集少陵手書詩二百。從容赴柴市。千秋弔信國。文山在獄中曾集杜詩二百首。馬公曠代起。蒙難究心畫。疑辯信乃堅。守臣當死職。引脰絕粒時。蒼萃十二册。異同晰秋毫。一字一箋釋。侍姬亦斌媚。楷法淚痕積。闔門無吹火。燐青鬼其宅。遺書誰護持。裝池述祖德。幽囚緬四載。展卷我心惻。此筆如卓笏。生擊朱泚賊。此墨尙流血。溼濺嵇紹帑。同時范忠貞。淋漓炭畫壁。閩粵遙相望。對勒平原石。

遊蘇門山百泉出此山下

蘇門山痺隘。溜溜無顏色。孫登鸞鳳嘯。縹緲霧空碧。風雨颯中天。百獸爲之匿。臨眺動羣疑。虛名若浪得。而我不謂然。剛微貴撫實。此山空其中。上上下下則石。萬竅搜天根。一綫貫地脉。靈氣縈繞之。源源通不塞。運濟衛河流。濫觴罅縫坼。其功助灌溉。其害謝沖激。倒浸玻璃屏。山固兼水德。嗒然不自明。惘悞道用默。受侮於目論。甄藻賴寶識。朗朗見山心。白雲澹夷懌。清輝閣名良復佳。試泊張融宅。

高梁洞上灘

萬山建瓴水。直下勢懸瀾。而故屈折之。拗怒毒愈厚。呀然立洞門。夾束氣不透。穿罅鳴鳴箭。般空牛吼柝。

濤春堆疊雪。漩撇蹴衆纒。船尾如曳龜。船頭仰舒味。鏗然不受箭。支左先誦右。中心起鐔鏗。大聲呼疾救。跳珠溼滿身。手與霹靂鬪。負索腰環環。邪許聲應候。宋鷁防退飛。吳象忌反走。蟻旋磨出險。喃喃口詛咒。不敢問前灘。憊矣矧多又。

易門水城爲黃眷齋明府題

易門因山爲城小而孤大龍泉環之而山上無八昔苗攻城必過泉使內坐困明季王公國勳始於西門爲重關水從地道入爲備禦計

眷齋明府今重修之民並祠焉

平川浩如海。中央俘佛髻。高八九仞餘。圍以三里計。城削趾爲墻。雉堞齊塔砌。上無多屋宇。下山憊水遞。仰維大龍泉。長流易灌溉。苗民數構患。長圍規便利。土斷徙其流。喝者坐待斃。經始明王公。諱國勳重關峙大礪。引脈使暗通。濫觴竅溽沸。歲久石頽圯。修築君善繼。居安思預防。內捍釋外懼。昔聞漢將營。揚水敵退避。宋臣鑿清澗。深觀井養義。一水之有無。攻守所關繫。用敢勒此銘。報公祠永憇。

紀石樓令袁梅谷瘁憫饑事

石樓古屈地崇禎四年闖匪渡河入劇屠戮距今百有餘年矣其戊夏署西北隅忽露一枯骸擲之鱗次櫛比斷鱗剝缺爰瘞之義冢

旁勒石歲奉祀弗絕焉余既嘉其事又重悲乎死者之姓名湮沒不可考要皆生不辱於賊而死則碧血一坏何莫非勝國之勇夫義婦也詩以弔之

晉封夷吾地。迺今石樓縣。縣小山爲城。居民昔逃竄。石田廢春耕。土穴斷朝饗。隔河近米脂。劇賊首發難。吹唇兵搜牢。獻馘築京觀。百年槎牙級。癩瘡漬刀箭。是皆恥生降。忍死就塗炭。女不受賊污。男不受賊亂。中宵風月黑。啾啾聲達旦。里居旣蕩析。子孫亦糜爛。誰復與招魂。春秋澆麥飯。袁君莅茲土。撫循法稱善。

餘波澤枯骨。幽魂雪煩怨。朱囊白木柙。彙附義塚畔。而我想當時。賊勢遠博戰。出入河南北。晚登未央殿。淋漓人油炸。流毒天下遍。安得百袁君。遂爾首邱願。鬼亦異遭逢。望空發遙嘆。

飛雲巖

天公切石如切泥。搏之挽之分刀圭。亦復琢雲如琢玉。巧匠雕鏤納山腹。呀然一口中穿空。其下湧綿擘絮螺髻何蓬鬆。鍾乳滴成石變相。鱗鱗森動雷而風。咸與雲氣相追從。當前矗立太華蓮花峰。儼如三島浮自海上蓬萊宮。傳聞巖性忌不潔。往往呼泉一洗滌。官中那有清淨身。杉槽漆斛名無實。既來未便太匆匆。滿飲僧茶消水厄。

由坡貢之郎岱

望遠峨峨冠切漢。衣襟霞舉天之半。經宿崎嶇目已迷。雲烟各自開生面。一峰暝近若舊識。乃是三日前所見。以身盤磨蟻穿珠。左縈右拂香幃篆。高履星行下窺井。轉眼之間凡幾變。區田隨勢列等差。如規曲尺如畫線。什什伍伍不成村。殘梨在樹落微霰。風無定所歷亂來。畫眉聲碎彈翎怨。

渡盤江

盤江源出金沙江。自烏撒入懸奔瀧。踰二千里流益怒。影砂礮石以力扛。尸浮鼈令不知數。天塹畫斷蠻夷邦。始焉貫紵三十六。兩崖雲棧橫空絡。有風撓之鐵則鳴。人到中央濤浪作。後來改制橋落成。巨材排

比雁齒生。銳頭而上。牛鬪角。大鵬背橫空行。幃以板屋夾欄楯。琳宮梵宇交回縈。積日累月計程度。鬼神助役工非輕。豈知迤西有僻路。舍易就難前事誤。花河彝鮮_{名地}黃草壩。赴滇較近目無睹。直從莊蹻至於今。地老天荒屬鏑固。偉人帝錫勦奇功。屹然坊建西林渡。江寬尋丈水安流。昔遁新獲罔用涸。陰平問道取鄧艾。盧龍絕塞規田疇。鼉鼉爲梁烏鵲駕。遂此平版來夷猶。省水衝錢民利涉。棹歌一曲飛輕鷗。

蔣別駕芝岡招同費副使懷谷戴孝廉開成上舍光林遊陸氏水木明瑟園二首

十畝無多地。到來如許寬。池深魚氣靜。樹密鳥聲歡。淺碧侵琴薦。輕陰護藥欄。小長蘆去後。山翠至今寒。乞與天隨子。此間銷夏宜。堂虛雲不去。山近雨先知。種竹新成个。浮蘋亂吐絲。便無花亦好。况遇有花時。

常山旅夜

江館雲陰合。青燈耿夜闌。櫓聲離岸小。山氣壓城寒。樹老鴉棲穩。泉枯鹿飲乾。草坪_{離常山四十里。與玉山交界。}明日路。細雨濕征鞍。

楊州春日

竹西自古繁華地。况是風光九十天。紅杏一枝春店雨。玉笙三疊夜樓烟。隔江燈影迷歌館。吹岸衣香過酒船。好夢撩人歸未得。拂城楊柳亂啼鶯。

宿許天植見山樓

綠樹疎燈落燼遲。夢醒如中薄寒時。風通花氣全歸枕。月轉樓陰倒入池。如此夜深猶有笛。可因春盡竟無詩。開門便赴尋山約。酒熟茶香短簿祠。

蔡忠襄公祠

飛度黃河勢已成。但憑一掌守孤城。三千兵帶飢寒色。百二關傳慟哭聲。報國不能生殺賊。殉君何用死留名。遺祠蕭颯橫汾曲。夜夜泉飛白鶴鳴。公葬時山泉忽飛出白鶴繞墓。

紀俺荅款寨事懷明王襄毅公二首。余分修山西通志見俺荅歷入寇前後死二百餘萬人自襄毅受款迄明季不變然始多異議而主於中善其後者功俱

不可沒也。

城郭豐州帝制雄。鈞聯三鎮潰雲中。唇吹石勒瀉蔴嶺。血浴高歡避暑宮。奇貨歸來和始定。名經請去貢長通。新鄭江陵主議民休息。宋事虛徵葉夢熊。

不信漁陽突騎麤。連年膽落鐵浮圖。奇功忽逸桃松寨。小勝惟誇苜麥湖。海若何心邀祭典。閼氏有手握兵符。西方以次皆歸款。衣賜紅獅老把都。事詳韃靼傳。

曲峪鎮遠眺時西陲方用兵。

地近邊秋殺氣生。朔風獵獵馬悲鳴。鷓盤大漠寒無影。冰裂長河夜有聲。白草衰如征髮短。黃沙積與陣雲平。洗兵一雨紅燈溼。羊角魀魚堠火明。前明邊堠掛紅燈其上魀魚皮爲之膠以羊角雨溼不壞。

三垂岡

英雄立馬起沙陀。奈此朱梁跋扈何。隻手難扶唐社稷。連城且擁晉山河。風雲帳下奇兒在。鼓角燈前老淚多。蕭瑟三垂岡畔路。至今人唱百年歌。

姚礪圃徵士

聽斷蓮塘夜雨聲。與從兄惹田同居友善歸遲只爲啖虛名。才華見許盧思道。規矩難繩禰正平。珠帕簪花三館夢。錦衣泣月十年情。在禮館最久。善十上三中副車。洞庭葉落秋將老。渺渺愁予與日成。銓掣長沙二尹。將行丁內艱。

秋夜投止山家

山當面立路疑窮。轉過灣來四望通。涼月滿樓人在水。遠烟着地樹浮空。熊羆之狀乃奇石。鶴鶴有聲如老翁。清福此間殊不乏。可容招隱桂花叢。

齊尙書秦黃學士子澄

龍虎山高北燕翔。兵聲藉口罪齊黃。忍因發難誅量錯。恃以成功相李綱。一死報君猶氣節。兩人誤國共文章。齊順天鄉試第一。黃會試廷試皆第一。與齊同榜。金川門啟宮中火。漫指西南路渺茫。

史閣部可法

鼓聲鈴閣夜驚眠。縞素孤臣茗飲年。一死平生文信國。千秋奏議陸忠宣。國瘍有母呼遼鶴。冢祭無兒拜

杜鵑淚灑隔江埋骨處。梅花斑竹黯春烟。

穎橋弔李元禮墓

碧血千年化水濱。回天力盡遂亡身。知臨虎穴櫻常侍。忍仆龍門負黨人。覆轍可堪尋白馬。禍胎竟至釀黃巾。東林亦遭同文獄。漢碣摩挲重愴神。

宿江城晨起卽事

江城鼓歇一燈懸。竹葉春宜城酒名寒飲少眠。涼笛生於無月夜。曉鶯啼及未花天。水邊魚氣濛濛霧。樓外山光澹澹烟。試問白銅鞮唱罷。近來可有弄珠僊。

武定城望獅山龍隱庵

佛火空山照眼明。黔東庵亦白雲生。頻煩中使齋香出。可許亡人托鉢行。郵典未傳程濟謚。南渡郵典。道濟其人。無程經科不載仲彬名。致身錄言。仲彬以明經廷試。考科貢中無名。先公入晉身過死。賴有長陵實錄成。先司空死事。澤州。見成祖實錄。

由水坪宿尋甸與額觀文明府夜話

滿林霜果落繽紛。二月花紅正夕曛。山與雲依相慰藉。水因石阻得聲聞。兵鋒險道窺南戶。戍火嚴城駐北軍。容易時清君坐嘯。當年滇蜀此平分。東昭二帝昔隸於蜀州。固瀨北戶也。鳥蒙出沒。戰守時聞。至雍正九年始定。

李後主

番歌一去更誰聽。天寶遺音滿後庭。烟氣暗生嬰玉鼎。花光深覆皂羅屏。只嫌擗雪無仙爪。不信量絲有釣艸。昨夜柔儀殿名鐘漏永。秋風簾押振金鈴。

贈沈樗崖

諱廷瑞字兆符宣城人善山水祖壽民以諸生疏論楊嗣昌爲東林黨魁

白雲長護在山泉。與世相遺老可憐。黨論舊傳元祐籍。門風私記義熙年。蓬萊東海三間屋。薇蕨西山一稜田。生業算來無長物。摩挲粉本更潸然。

題介白亭

遶亭三面水如烟。好是霏微釀雨天。滿袖蘋香將不去。夜涼輸與鷺鷥眠。

吳門客寓友人餉鮮荔枝

羅襦白玉出新妝。不數人間十八娘。四百紅欄今夜笛。月明吹滿荔枝香。荔枝香曲名

聞墨莊主人吹笛金陵人時寓天雄僧舍

一聲入破決雲層。蕭寺閑愁寄老僧。彷彿秦淮人定後。月明如水滿船燈。

湖海詩傳卷四

張元

字殿傳，號榆邨，淄川人。雍正四年鄉試第一。有綠筠軒詩集。

登石門

靈境闕礪曲，幽尋及春晝。犖角屢環轉，險仄逼遷就。危徑緣纖毫，梯空得奇構。珠龕藏崖窟，鍾乳滴巖竇。丹嶂劃開豁，虬松蟠烟岫。日射冰池明，翠染石花繡。傾盃倚谿筍，幽鳥鳴相侑。天風吹白雲，散亂霑襟袖。山深谷風寒，樹密嵐光逗。冷然洗塵氛，曠焉小宇宙。暮靄條廻合，森沉夕陽瘦。淨業信難留，勝遊尙可又。夙懷託言詠，終期訪靈鷲。

遊冶源

風日藹明霽，策杖探幽境。冶源鬱奇秀，言遵溪路永。曲徑趁逶迤，峭壁緣青冥。連林杳蔭翳，篠簌叢千頃。岸曲春水環，亭高遠山屏。紛吾快流覽，垂綸思舴舨。樽酒煩主人，坐對檀欒影。山風倏然來，珮環響幽冷。森爽淡俗緣，蕭寂發深省。睠焉懷昔賢，韻與平泉等。遺編夙溯洄，勝地復略領。盤礴情未極，夕陽已沉嶺。莫惜歸路遙，吾意愛孤迥。

白雲山歌

白雲之山連雲起。單椒直入蒼冥間。雲來雲去時滅沒。嵐光蕩漾青烟鬟。倚天拔地五千仞。背臨絕壑根。紆蟠清泉一線迸。石罅虬松高下籠琤潺。松廻溪轉數隱見。幾家村落臨烟巒。我來習靜借棲託。恨不取氣騰飛翰。是時空山過微雨。松濤浮翠溪生瀾。穿林沿岸事登頓。風翻涼露霑衣繁。陰崖一徑垂纖縷。捫蘿附葛攀巒岈。雲竇嵌空剗疊嶂。石溜清冷凝晶盤。巖窮路絕壁面削。卻下澗底嗟險艱。仰見東南垂烏道。拾級蹶躡腰脚酸。徑轉山南更西去。峯腰橫截珠宮攢。浮金炫碧啓象教。一聲清磬飄梅檀。梯空百折凌巔頂。嶧嶭傑閣開金鑾。上帝高居御羣品。雲旗絳節排千官。瞻拜出門莽四顧。凌臨頓覺天宇寬。恍惚疑有仙人至。或乘白鶴騎青鸞。雲中笑語頻招手。遣我滿把黃金丹。但餐一粒縱超越。雲璈霞佩聲珊珊。安能跼蹐溷塵埃。坐令白髮凋朱顏。丹臺玉室無消息。仰天悵望憐緣慳。歸來茆屋卷書坐。松風流水空灣環。

華不注道中懷邊華泉先生

華泉在華不注下先生墓直其南里

歷下稱詩宿。尙書沈杜儔。敦盤分北地。宗派啓東州。墓道風煙斷。華泉蘆荻秋。遺文傳海岱。永賴砥橫流。

韓道中懷李滄溟先生

落日韓倉道。懷賢慘客顏。詩名猶白雪。墟里但青山。七子琴樽冷。千秋林壑閒。惟餘幽澗水。日夜送潺湲。

蔡德晉

字宸錫。無錫人。雍正四年舉人。官工部司務。

蒲褐山房詩話。宸錫先生。精通三禮。分門別類。以次相考。採綴鉤貫。凡五十餘冊。功未竟而歿。秦文恭公少與同學。得其本而增修之。證以歷朝史事。補以宋元諸儒之說。今所傳五禮通考。雖續健庵尚書讀禮通考之遺。實則據先生止為藍本。今其書割裂之餘。無有存者。詩亦非所長。今存一首。而附記其經學之淵深如此。

望鄉

龍山蒼翠正當樓。水上芙蓉一帶秋。雲樹不須遮望眼。夢中人在木蘭舟。

鄒一桂

字元褒。號小山。無錫人。雍正五年進士。官至禮部侍郎。卒贈尚書。有小山詩鈔。

天柱縣登樓

喜得齊雲倚石開。不愁前路有崔嵬。何人便說南天柱。我亦蓬山頂上來。

彭啓豐

字翰文。號芝庭。長洲人。雍正五年殿試第一人。及第。官至兵部尚書。有芝庭詩藁。

蒲褐山房詩話。芝庭尚書。以醇德。漢口著于朝。而性耽風雅。使節所至。遇佳山水。必游歷。乃去。集中句如楊柳春風江上棹。杏花細雨酒家樓。踈風影動林梢月。宿雨涼生檻外山。三徑杜鵑高十跡。扁舟訪舊故人心。漁唱數聲初出港。樵風兩岸送歸船。落月踈星荒店閉。四風鼓角戍樓寒。鐘動遠沉山店月。林踈斜颭酒旗風。古壁殘燈明乍暗。空庭落葉掃還多。三秋風雨添良會。五字河梁又別。

離竊湖處處多芳草。蠶市家家近畫樓。寫景闕情。神妙獨到當世好爲生澀槎枒者。未能津逮也。

折柳行送宮贊錢勉耘同年假還婁東

燕京四月春方暮。柳色青青挂高樹。長條踈地最多情。濃陰遮斷前行路。病裏芳華冉冉過。那堪送別聽驪歌。心憐飛絮隨風舞。目斷高樓夕照多。忽憶江南煙景好。汀洲夾岸迷芳草。繫得蘭橈喚渡遲。泊來野店抽帆早。羨君安穩計歸程。拋卻紅塵步履輕。鱗魚入饌楊梅熟。不用蓴鱸動客情。婁江帶水崑山麓。瀾迤溪田繞花竹。憑君折柳寄相思。東風吹夢江臯綠。

琵琶亭晚眺

臨江臺榭鬱嵯峨。九派潯陽檻外過。帆影微茫銜落照。笛聲幽怨激滄波。天涯易下青衫淚。商舶爭傳白苧歌。待得新涼明月夜。蘆花蕭瑟更如何。

楊柳枝詞和宋玉才韻

玉才名樂。常熟諸生。有雋才。早歿。

白公堤畔年飛綿。三月微陰澹以煙。宛轉肯隨金勒騎。輕盈都上木蘭船。萋迷山店拂澄澗。送別思攀尙未堪。春雨杏花零落盡。一株惆悵在江南。

呂熾

字克昌。臨桂人。雍正五年進士。官至副都御史。

恭和御製新修翰林院落成得見字

文教首蓬瀛。鴻儀今創見。鑾坡楹桷新。瓊榜星雲絢。廳樹鸞龍旂。亭波涵雉扇。欣瞻日采臨。特重珠衡眷。雅韻發金聲。華筵羅玉饌。卿僚載拜賡。千古傳詞院。

楊錫紱

字方來。號蘭畹。清江人。雍正五年進士。官至漕運總督。諡勤愨。有四知堂集。

蒲褐山房詩話先生清標直節。爲在廷諸老所推。督漕運時。嚴飭沿途毋需索。毋留滯。又體恤旂丁。以及押運各官。纖埃不染。使得迅速。進行。故數十年來。論漕政者。必舉先生第一。生平不以詩名。而所作文。清新踈秀。書法亦工。歿後人刻其書以行世。

梁王城

寂寞荒榛裏。歸然有舊城。烽烟千古劫。草木萬山兵。壞堞餘殘照。寒鴉落暮聲。年年迴棹處。憑弔不勝情。

安東作

近郭河聲怒。沿隄草木多。清宵聞雁鷺。白日走蛟鼉。補救功需亟。瘡痍氣若何。誰膺司牧寄。高臥盼庭柯。

夜舟

入夜鍾吾道。微風一葉舟。徐吟遲月上。獨坐看星流。野闊煙無際。波閑釣未收。逝將謀小隱。生事老羊裘。

夜意

河木明如練。風帆靜不張。蟲聲經露濕。月影渡波涼。計日秋將半。懷人夜未央。小山看漸近。到及木樨黃。

夕陽

一棹秋風裏。行行又夕陽。還飛鴉影亂。罷舞柳絲黃。客意銜山急。帆陰臥水涼。何人方獨立。覓句向蒼茫。

出臺莊閘作

帆挂秋風葉葉回。臺莊一望半蓬盧。倦遊客類還飛鳥。出閘舟如脫餌魚。嶺外夕陽銜欲盡。河邊柳葉落還餘。風烟是處供吟興。行到江南想亦如。

七月二十八夜坐

歸帆初卸棹歌停。漠漠涼生草露零。正好夜來無月上。水窻風細數流螢。

螢

風前雨後往來頻。入幔依簾解近人。剛有流光能自照。已忘腐草是前身。

查園

花枝落盡畫簾空。亭角蛛絲半網蟲。只有青蟬仍抱樹。盡情啼到夕陽紅。

楊柳青

梁詩正

字養仲號蕲林錢塘人雍正八年殿試第三人及第官至東閣大學士贈太傅諡文莊有矢音集

蒲褐山房詩話公居正陽門外楊梅竹斜街內清勤蓋御賜也堂左有味初齋前隔牆蒲菊藥壘其齋因以青乳名之公充續文獻通考總裁屬予司編校常宿其齋每日庭戶蕭然自諸司畫諾外

更無停轍進和御製詩逢劇韻必蒙嘉獎予異之公曰昔蘇文忠公善大韻每遇險處恆以譬喻出之是以信手驅駕毫無窒礙吾竊得此祕故後游行自在天然湊泊耳公歸養時與趙意林相

倡和且手自書之士人以爲祕寶杭董浦編修跋云如瑤林玉樹高出雲表洵然

奉敕賦青蓮朵

安南宋德壽宮即今宗陽宮宮中舊有零石傍石有古梅一株今石僅存上南廵頗拂拭之嗣大吏移送京師賜名曰青蓮朵并紀以詩

蒼涼南渡荒故宮。孤峰削立青芙蓉。蘇苔斑駁琳館廢。忽起凡劫歸瀛蓬。花綱良嶽不復見。誰念飛來雲一片。冷分黛色南屏腰。遠映清瀾西子面。此石經今六百年。窟竅不受神工鐫。卻陋平泉莊裏跡。差肩太華峰頭蓮。緬昔梅花石邊吐。石不能言花解語。花殘留影照春風。寂寞相看共媚嫵。即今重荷天矜存。翠膚新著摩挲痕。遠致雖非聖主意。珍異何啻儕瑤琨。昔澗塵埃今苑囿。瓊華島石姿相筮。仇池雪浪詎足論。甲乙居然稱去聲。皴瘦一峰竊窈浮烟鬢。明窗淨室當屏顏。同時異物嗟流落。研山筆格空人間。嘉名肇錫新詩賞。苑枯頓令殊今曩。不須更憶藍瑛圖。爲種梅花恣供養。

意林同學友屬書賜錦堂記以詩來謝即次元韻

百城擁處擬侯王。鉛槧窮年髻早蒼。獻賦乍蒙稽古力。待徵命作校書郎。錦頒內府榮儒服。記勒貞珉補

草堂傳語孫曾勤肯構。君恩霑逮可能忘。

再登前韻奉簡意林

烏衣自昔美諸王。秋水遐思葭莢蒼。膺有青編堪補史。意林著有南宋雜事詩不妨白首未爲郎。說詩客每勞前席。

問字人多到後堂。謂摹吳興天冠山題咏石刻贈答卽今成韻事。他年吟社莫相忘。

征衣恭和御製元韻

聞道長裾不利趨。用昌黎語況隨行獵歷川塗。短衣佩劍風猶在。見莊子缺勝從軍制未殊。見唐書高祖紀已喜跨鞍輕

矍鑠。不爰舉步礙榛蕪。書生鞭弭周旋處。也製征袍與衆俱。

地竈軍士藜食皆穴地爲竈。搖釜飯於上以資烹飪。

依山列幔隨疎密。因地爲鑪各淺深。穿穴不須陶冶埴。拾薪端可溉烹飪。升烟遙結千廬白。移壘空存萬

突黔。漫說風餐兼露饜。自來增減重韜鈴。

奉敕題畫

仿趙孟頫

綠樹濃陰清暑。青山暖翠浮嵐。水閣平開溪北。人家合是江南。山寺遠鐘未歇。烟村宿靄初收。最是鷗波館外。生平寄興滄洲。

孫灝

字載黃。號虛船。錢塘人。雍正八年進士。官至通政使。有道盥齋集。

蒲芻山房詩話。君夙厲清修。兩任平藩。名望與太倉沈光祿相埒。入爲京臚。以品詣入直上書房。故常隨木闌秋欄。退直後歸帳房。過山泉清澗。必取而煎之。淪以龍井芽茶。招句山太僕及予並啜之。雜談經籍。輒以爲常。其清寒幽峭。不異老儒生也。

咏撲滿

西京雜記。鄒長倩遺公孫宏撲滿一枚。因寓書示戒曰。撲滿者以土爲器。以蓄錢。具有入竅而無出竅。滿則撲之。土麤物也。錢重貨也。入而不出。積而不散。故撲之。士有聚斂而不能散者。將有撲滿之敗。而可不戒與。云云。唐姚元崇有撲滿賦。

有物工斂財。厥功利搏土。名卑貪夫愛。質陋良冶侮。守口深難窺。吸箕仰有取。六州鑄錢愚。一竅穴金鷗。形模假鼠微。腰腹怒蛙鼓。幣納周景千。瓶投漢銖五。情聯方兄新。筭用姪女數。拄杖看阮孚。繞牀詫夷甫。滿籛笑遺經。長袖比善賈。豈意欹器危。不堪墮甌撫。唾壺缺一朝。玉斗碎終古。混沌鑿忽開。膨脝脹何苦。速刪錢神論。大戒皿蟲蠱。盛滿厲所階。脂膏怨之府。苟懷焚身防。或較噬臍愈。東閣平津侯。西京媚臣祖。故人託諷規。忠告敢傾吐。布被飾清聲。金門踐華廡。廁名兒董儒。發跡羊豕伍。撲滿何心哉。寓言不無補。

和陳句山舍人作

五字哦佳句。蕭寥味共嘗。有情惟酒醴。無分是春光。官冷言愁易。鄉遙遣夢長。聯吟謝何遜。枉瘦沈東陽。

商盤

字寶意。號蒼雨。會稽人。雍正八年進士。官至順寧府知府。有質園詩集。

蒲褐山房詩話。寶意。胸羅玉筍。筆有錦機。本以詞林。乞為郡佐。久居白下。饒有閑情。常得趙姬小憐。解碧玉。連環為贈。易名環娘。以中秋夕。扁舟載之。未幾。玉隕。幽摧悼亡。屢賦。中如鬢影。恍覺化身一。眉痕怕見。月初三。舊居鸚鵡。曾呼我。斷帶鴛鴦。欲付誰。錦機未斷。纏綿縷。羅幃還留。細膩。摩誰與修。書添半臂。欲煩妙筆。畫全身。皆令人欲喚。奈何。晚得小東。又有句云。恐是玉簫。償宿債。偶從錦瑟感。年華未可。楚腰擊掌上。試將吳語。教燈前。時人吟。諷以為元稹。杜牧之比。不知其才情。橫厲出入於元白。蔚陸諸家。足以雄睨一世也。君美鬚眉。善音律。衣冠修偉。狀如古仙人。其出守雲南。予輩錢於從姪。將謫。喪歸。略敘生平。索為墓志。雖屬稿應之。然不得其詳。常以為憾。

攔江磯

長江如修龍。蜿蜒向東下。庚神不能鎖。其勢實雄霸。天帝勅六丁。挾石為堰壩。千尋亘縱橫。萬力防傾瀉。赴海得停機。約束勞造化。陽侯謹受命。違則罰無赦。我行秋冬交。水勢殊少謝。圭角露危礧。彷彿虹梁架。百繩挽一舟。有帆安敢駕。長年老解事。快從急溜借。始知天地間。利鈍爭一罅。鎮躁免險巇。解紛在閒暇。臥看江流安。明鏡光新研。

石門

石門最高頂。勢壓列岫低。鑿開一混沌。劃破雙虹蜺。乾連坤忽斷。圓壁方為圭。至寶謝雕琢。化工呈端倪。

老樹不知年。懸崖安可梯。幽瀑貫其腹。匯成九曲溪。數折入深洞。厥狀如覆甍。蒼茫出元氣。虧蔽垂幃幟。石髓凝不消。斑斑青紫泥。惜哉靈秀窟。遠落蠻荒西。往者漢昭烈。兵敗於此栖。代移疆索改。圖志無從稽。絕景不沿革。殘碣猶標題。嗟余慕邱壑。抗走霑塵墜。眼明忽睹此。勝刮黃金饒。閨苑現樓臺。武陵聞犬雞。雲霄若士竦。物論莊生齊。茲游慰夙願。柳標當重攜。

東門關

暮陰忽四垂。窅窅日光薄。岌嶮東門關。勢向馬前落。拔地有千尋。去天無幾握。峰作牛毛皴。路爲犬牙錯。碧澗貫瓏瑋。蒼藤挂瓔珞。怪木如老蛟。伸爪肆擊擢。難通漢使車。欲借秦皇鐸。五丁力已勳。知是何人選。在昔高羅司。種類此棲托。舞干文德敷。納土苗民樂。世泰息烽烟。時雍奠疆索。美哉膺膺原。盡屬天朝拓。

瀕行友人索觀入都近咏賦答

昨歲來潞河。停橈訪吾友。同心托薰蘭。芬芳真可久。詹詹紀程詩。棄遣輕敝帚。旅人愁善鳴。長者愛忘醜。蟹螯味無多。羊棗嗜亦偶。聊當楚騷讀。如下漢書酒。鍾呂君素聞。何貴乎瓦缶。茫茫塵海中。賞音遇誰某。謠詠蛾斂眉。支離柳生肘。頗思結習除。香雨歸烏有。楊綰常自韜。丁儀求不朽。矜慎與質疑。其意皆可取。方當典學朝。搜羅到林藪。鴻羽漸雲達。魚鱗依左右。曩列供奉班。愧非雅頌手。報國薄詞章。寧須探小酉。此卷不足觀。請君覆醬瓿。含意分袂申。驪駒在門否。

彈子磯

何年巨靈堂。劈開混沌石。神工出自然。皴染淨無跡。嵯峨一卷小。勢與羣峰敵。蒼浮鷗鷺騰。黑覆蛟螭蟄。嵐氣與雲光。深入古潭碧。還丹誰所成。恫恍衆真集。老仙去不回。留此青鸞翼。五乳七星巖。到眼堪一擲。我有邱壑緣。相看似曾識。翠屏宜晚對。金烏忽西匿。擊汰始興江。春流浩無極。

摩天嶺

偉哉挂榜山。本號摩天嶺。象伏與龍蟠。相對爭秀猛。象伏龍蟠。嶺名。上可捫星辰。下或起雷霆。擊上。巖石皆俯垂。

如木怒生瘦。美者雙髻鬢。鬢影臨鏡整。其色黝而蒼。不辨黎雲影。全身肆撐擎。元氣結青紫。不圖絃絃外。乃有此奇景。交州古荒服。久爲中國屏。守者受法疎。天心遂怏怏。特將青蠅螻。化作干尋綆。用以截華夷。有寇不須警。我朝威德敷。駱越猶鄉井。防邊刁斗嚴。專閩貔貅領。鼠害毋他適。鯨貪絕吞并。蠻情久已安。貢道休教梗。茲節變康莊。會向昭融請。

除草

柞氏載周官。翦燠乘時候。單子論陳侯。道菲國有疚。矧茲荆棘叢。蒼蔚迷昏晝。草竊古所防。何分人與獸。治草通治民。其理當深究。稂莠未完除。嘉禾安得秀。不斷將養奸。姑容卽藏寇。我行礪确閒。一望驚紛糅。任昉愛春游。杜甫譏冬狩。身爲司牧官。施設在成就。亦知興與革。從容無取驟。奈此曠土多。墾田勞鋤耨。

倘非無蔓芟何以施畊耨。燎原真上策。炎炎功易奏。卽事成短章。晚憩前山嶽。

五課詩

棲身十畝。舊學圃農。出守一麾。新逢吏士。至於家塾。每念羣兒。偶當退食。從容各賦。短章勸勉。課分五等。時屬三春。有水曹官閣之唵。無山簡習池之醉。采風行部。正宜治事如家。獨立趨庭。敢信愛民猶子。撫衷自愧。考績何優。用質同人。毋譏拙宦。

課耕

我本舊知農。半生以仕易。常祿雖濫叨。未敢忘民力。治郡首田功。厥土分肥瘠。何種宜高原。何種宜下隰。布穀已頻催。九九犁把飭。乘茲春令和。相戒毋休息。指日具壺漿。來就畊夫食。

課圃

少陵在西川。菜把園官送。何不勤灌畦。抱此漢陰甕。芋區應候鋤。瓜疇及時種。厥味旨且長。口腹非云縱。堪作王公羞。亦爲賓客供。鄙夫無遠謀。斯意非嘲諷。

課吏

悃悞自無華。古稱廉靜吏。有餘補不足。當以日月計。政或拙催科。心其勞撫字。許丞原未邁。尹公嘗請試。掾屬有通才。瑜不因瑕棄。孤賞出風塵。靜觀屏浮議。托身俯仰間。未可隨同異。廉部告鄉人。二天何足庇。

課士

昌黎在潮陽。子厚居柳州。各將教化著。能轉文風優。熙朝振鐘鼓。遠不遺蠻陬。茲郡雖荒僻。爨序人才收。所學敦本原。經明先行修。懷此希世珍。佇待側席求。太守老腐儒。耽書親校讐。棊芭如問字。載酒元亭遊。

課兒

正月硯涼開。童幼入小學。勗哉紈綺年。沈潛遠浮薄。積墨遺後昆。溫公意有托。我子十齡餘。孫亦非總角。訓課不及時。將成乃翁錯。延師啓東軒。近傍籌邊閣。晝長功課了。庭花紅未落。好鳥忽飛來。丁丁動鈴索。此時讀書人。應識讀書樂。

題八蠻進貢圖

李白昔成明堂賦。閭立本繪職貢圖。其朝有位貢有物。篚筐紛錯衣冠殊。誰歟狡獪作此卷。南蠻北貊形貌麤。番部君長偉丈夫。鬪賓纈錦纏其軀。腰間玉具雙滿盧。後有從者走且趨。大秦之獅大宛馬。文犀香象同馳驅。其餘獒雉非一種。迢迢重譯來通衢。異物寧爲天府貴。包茅要是王家須。東鷄西鰈紀封禪。元龜翠羽垂史書。丹青雖戲關國典。荒服不至非宏模。我朝御世邁前古。昇平河岳呈苞符。蘇祿梯航歷山海。高昌弟子充生徒。華夷一統大無外。六街雜遝聞僑侏。中原自有麟鳳現。萬里禽獸輕錡銖。憶昔侍直披香殿。親睹苑藪游騶虞。作歌作頌揚上瑞。寫生妙手煩曹吳。子牟闕庭久猶戀。師古王會工難摹。君不

見兩階文德今覃敷。勤兵服遠何爲乎。

李猷搏鷹圖引

道君畫鷹擅今古。誰歟匹者宋李猷。今觀此圖洵神異。素練八尺橫高秋。艸枯木落原野曠。鶴鶻累百離
繚鞞。此鷹一出振林莽。雙翻未動獐狐愁。爾時何處得此態。毋乃射獵南山頭。雄材絕技散天下。乘勢必
與風雲謀。廉頗不用枉善飯。李廣已老難封侯。雲臺紀功二十八。就中豈盡揮戈矛。名鷹勇略比名將。氣
象自異羣鷹儔。國家承平少征戰。田車千乘行苗蒐。此鷹才大必有用。但擊凡鳥吾所羞。安得晴空盡梟
鳥。坐使鸞鳳來同遊。

棲賢舍利歌

梵書八萬四千塔。誰其造者阿育王。衆靈雜遝供役使。分置國土隨神光。其在震旦十有九。就中一塔存
南康。內有舍利十一粒。昔時埋沒今收藏。瓶是玻璃盤玳瑁。入土出土全不壞。百鍊終完寶勝軀。五光遍
徹兜羅界。閻扶月照影逾寒。優鉢花籠形轉怪。聞者不見見者驚。蒼茫歷劫知何代。老僧向余言因緣。古
塔建自咸平年。摩尼之珠未遭燬。遂從西麓歸棲賢。其大如豆小如粟。長有寶氣騰星躔。作銘作贊永無
極。不逢鉅手安能傳。我昔曾讀匡廬志。復聞此語真奇異。熊軾雖邀一命榮。鹿車原解三乘義。放筆初成
舍利歌。重遊定作棲賢記。君不見宰官說法天雨花。人間何處非初地。

投壺歌

投壺之禮古所垂。賓筵酬酢樂有儀。踰言備立著深戒。義取正直非新奇。今朝張燕習嘉禮。兩楹羅列無參差。立馬以三挾矢四。諸賓登降肅不懈。嗟余好古生苦晚。魯鼓薛鼓亡其詩。張氏作圖卜作律。舊經新格何人知。分曹尙德不尙藝。但求命中良可嗤。是時深院日方午。酒鱗浮動黃琉璃。銅韻錚錚振庭樹。疑有落葉飄塔墀。丈夫懸弧本素志。會須手靖西南陲。弓矢載囊永不試。太平高會無窮期。

題林良九鷺圖

一鷺振振騰向天。一鷺仰視欲上竈。一鷺戍削寒聳肩。旁立一鷺一足拳。中有雙鷺斂翅眼。不飲不啄神氣刺。最後三鷺行不前。羽族亦有遭迍遭。飛鳴宿食野態全。誰與狡獪丹青傳。連意長在運筆先。寫生妙手真天然。秋深夢入寒塘路。葦白葭蒼不知處。

以俸米餽高妙主人系以詩

高妙主人冬掩廬。枯藤敗葉盈階除。典衣常貫少陵酒。乞米嬾作平原書。翰林一官清似水。臣朔年年飢欲死。便學侏儒將奈何。自憐骨相宜如此。薄少貽君君勿噴。加餐善養苦吟身。裹糧略可充三月。救死何勞具八珍。他年拂袖銅駝陌。夕葵秋樹高人宅。一片黃雲弄晚晴。讀書負米真良策。

題番騎圖

邊城吹角黃雲起。番馬番兒見獵喜。幽燕不作書圖看。逐電追風儼千里。一馬昂藏如欲鳴。數馬勃率駢不行。就中怒馬忽奔逸。能使突兀高原平。雲錦成堆誰第一。驍騰都入曹韓筆。合圍臨陣兩縱橫。人馬同心勢無敵。聖朝駕馭盡英雄。繕塞年年奏武功。已見助綏番部順。豈徒舉手射夫同。赤狄烏桓連人漠。書生愧少平羌略。惟將老眼相驂騑。一過空羣同伯樂。嗚呼健兒慎勿誇身手。苜蓿蒲萄中國有。樂府爭傳俶儻歌。闕氏且酌屠蘇酒。

苗刀歌

沙渠土司悍且豪。大爲容美小散毛。納地久降諸峒長。尙存苗種懸苗刀。此刀出匣三尺水。吳潭素練翻秋濤。春鷗長尾自皎潔。鵬鵠安用尋常膏。蠻兒矯健逞身手。累年剽掠橫相遭。官軍緩攻議勦撫。居民雜處思奔逃。留茲利刃經戰鬪。往往深夜聞鳴號。卽今向化買牛犢。兼有就學嫻風騷。朝廷德威加四海。合兵不向臯蘭塵。羅平妖鳥避鷹隼。大宛天馬隨蒲萄。東南自充財賦藪。零星荒土輕秋毫。奠安有方賴守牧。奸宄何自潛蓬蒿。孟勞伏突本兇器。昇平盛世宜藏斂。寒光如髮照無寐。起看太白西方高。

松雪硯歌爲童初五弟賦

名士愛硯如愛玉。肝是驂駟眼鳩鴿。百錢入市得奇珍。朝夕摩挲看不足。形模既古質性溫。斷紋隱約疑蛇腹。涓涓一勺水凝池。內有多年墨蛟伏。此硯曾供松雪書。自宋相沿閱陵谷。我聞承旨在吳興。妻爲仲

姬兒仲穆家學能博驟駢圖。墨痕徧洒蒼筤竹。趙社遷移元運昌。隨身老硯無翻覆。同時亦有玉帶生。慷慨西臺留慟哭。身當歸隱焉用文。物不磷緇豈非福。烟零雨碎易消磨。幸落吾家老同叔。拂塵啓匣石聯交。對客揮毫雲滿屋。白璧休誇十五城。紅箋要展三千幅。大德重論舊歲年。良工且免新雕琢。與君洗滌試耕耘。開凍還將家課督。四民月令正月硯凍開命童幼入小學

恭紀聖駕口外行圍

開道秋行獵。從來日用剛。三驅嚴虎旅。七萃盡龍驤。綵仗移芳甸。期門整貝裝。從臣誰第一。染翰賦長楊。萬乘應時行。秋高石北平。巫閭蟠重鎮。長白拱神京。列辟趨金鳥。虞人植繡旌。中原燕天子。徒御不曾驚。山海烏孫外。星辰紫極中。省方疆索大。舉堊射夫同。首宿秋還碧。燕支晚自紅。從今輕駟鐵。不必採秦風。允塞兼文武。聲靈暨朔南。助綏驍將集。辨物獸人譖。梓嶺高無際。蒲泥涼更探。左賢遮道拜。率服不須戡。毳帳圍熊地。雕弓射雉天。盛朝誇羽獵。宿衛選幽燕。石鼓周宣字。金支夏后年。皇心勒武備。應候舉秋田。至治陳千羽。遐方貢象犀。觀兵周冀北。繕塞達遼西。風人雙鵬勁。雲屯萬馬齊。豐碑宜有頌。遙見拂虹蜺。飛騰龍虎氣。隱隱出中權。霽日頭鵝宴。滄霜詐馬筵。分弓秋隼外。列戟暮笳邊。應有塔蘇酒。諸王次第傳。大閱陳軍實。前旂總不如。虞巡傳輯瑞。鎬宴咏那居。但取平羌略。無勞諫獵書。小臣江海隔。北望想鑾輿。

林道人山房

開蟬

道人老有道，自製薜蘿衣。清夢白雲遠，晚林黃葉稀。重尋應不遇，愛此暫忘機。十里下山路，蒼然橫夕霏。
石繖峯邊路，年年噪夕陽。忽驚新氣候，何處好池塘。森木雨初霽，古城秋正涼。如聞楚天雁，悵望一霓裳。

題鄭布衣秋郊餞別圖再送史丈

布衣老筆似龍眼，寫出旗亭薄暮天。折柳幾人同悵別，采薇何日罷防邊。帳中白髮依嚴武，城上黃雲弔赫連。莫問賀蘭山近遠，數行秦樹帶秋煙。

贈內子四十初度

憶聽靈鵲報初除，九載東華寂寞居。典盡金釵供傲屋，剔殘銀燭照修書。承恩縱得新鸞語，偕隱難忘舊鹿車。珥筆分符俱不賤，一麾休怪出南徐。
人間仕宦海茫茫，泛宅浮家又豫章。五斗偶需腰已折，百年將半鬢同蒼。安貧便是宜家策，采葯何勞註景方。差勝蓬門荆布婦，白頭未識綺羅香。

送潘筠軒編修還越

昇平朝野總君恩，局外閒將出處論。結社未應歸白傅，種蔬早已賦黃門。一竿遠拂珊瑚樹，八口同居薜荔村。此去撫松深閉戶，蒼髯勝友老猶存。

環娘至淮

廻身宛轉故依然。小別重逢似隔年。葯餌急須調病後。簪環親與卸燈前。但教好月當三五。豈惜春衣典十千。江北江南風正厲。護花人祝養花天。

信步至萬柳堂是前歲亡姬舊游地愴然久之

鞦韆徐行不覺遙。鳳城寒食又今朝。地經前度增惆悵。人對芳辰轉寂寥。侍史華年傷錦瑟。故家別業問雕橋。真珠亭畔斜陽暮。翻恐無端拾翠翹。

懷淮上程魚門晉芳

夢到通波九曲邊。槐花黃近已涼天。豈無淮海閒居集。秦少游著淮海閒居集。合有昌黎薦士篇。北斗望京成往事。魚門兩赴京兆試。南園餞別又今年。庚午北上。有南園餞別圖。丁家水榭聞歌處。凭遍雕闌夜不眠。魚門舊說青溪水閣。

秦淮雜咏和所見龍潭旅壁原韻

兩戒江山萬古清。劫灰歷盡見昇平。後庭一曲堪亡國。玉樹從今莫再生。南朝樓殿勝蓬萊。物換星移起暮哀。寒雨不知歌舞地。瀟瀟徧滴舊官槐。

憶金陵舊游

吾鄉放翁在蜀十年。曾有所盼。歸日每懷舊游。屢見吟咏。僕於金陵亦然。月地花天。復此追憶。不

知身滯百蠻也。

選勝鶯花幾度經。吳娘低唱酒微醒。誰知暮雨瀟瀟曲。偏向蠻村意外聽。
何處南朝不可憐。屏中樓閣鏡中船。茫茫洗馬愁難遣。已過羊車八市年。
鸞坊寂寞鳳臺空。白髮吳伶話故宮。外院尙橫金鑷鉞。內橋誰奏玉玲瓏。
謝莊玩月憑闌坐。梁緒簪花側帽歸。古巷斜陽誰認得。重來惟有舊烏衣。
名士當年說過江。圍棋邀笛總無雙。只今惟有青溪水。九曲潺湲到客窗。

方塘

如鑑方塘皎不昏。琉璃經雨淨無痕。楊花吹落魚苗長。一夜春流綠到門。

許開基

字勛宗。海寧人。雍正八年進士。官至戶部郎中。

湘潭道中遇雨

宿霧初收竹徑開。雨絲端與拭輕埃。泉聲忽作弦聲急。知是琵琶峰上來。
在琵琶峰
在湘潭。

湖海詩傳卷五

嵇璜

字尙佐。號拙修。無錫人。雍正八年進士。官至文淵閣大學士。諡文恭。

送女勤之德清

憶別汝母時。汝纔繞母膝。荏苒悼流平。汝年今十七。女工學未成。詩禮讀粗畢。當春賦于歸。余懷如有失。買舟送汝行。風帆毋太疾。却感泉下人。夜夜夢未悉。似憐汝尙幼。神魂不能佚。父母一身兼。未諳愧疏率。幸茲夫婿佳。和諧輩可必。多言固所戒。沉靜葆汝質。操作職在勤。奉養心宜密。庶用慰汝親。佇卜百年吉。登輿汝竟去。有語不能出。平生丈夫概。肯爲所愛汨。十載死生情。頓牽別離日。回棹望吳羌。老眼淚已溢。

題汪文端公松泉圖

讓谿少師古君子。同直後輩羣相師。喬松千尺棟梁用。源泉萬斛左右資。風度凝遠無涯涘。廣平曲江儼在茲。名儒名臣實名世。詎止書翰兼文詞。是時直廬暇無事。榮光煜煜臨堦墀。雲箋捧出御飛白。松泉二字蟠蛟螭。諸臣讚美更歎羨。懸之賜第彰殊施。維公遂取以自號。書紳佩德深長思。松風泉韻入妙繪。道貌於此位置宜。二十年來一彈指。蓬山往迹那可追。二泉泉旁聽松石。尙冀翩然一遇之。

送二兒承豫之滇南

年老難爲別。秋高又送行。臨風人萬里。對酒月三更。有守惟從儉。無才更戒盈。勉思爲善吏。莫負此家聲。

英廉

字計六。漢軍廂黃旗人。雍正十年舉人。官至文淵閣大學士。諡文肅。有夢堂詩集。

蒲褐山房詩評。相國初通籍時。雅嗜芸。紉尤敦車笠。與樊榭及吳樸庭。煥文。符幼魯。曾。查蓮坡。爲仁。爲酬。和友詩。壇酒社。翰墨飛騰。雖江左風流。不是過也。旣而駱長六。曹彈心。時務。或舉舊稿。爲言。輒。選語謝之。蓋不欲以文人自命矣。先是定制。內閣大學士。滿漢各二人。及于文襄公歿。時方爲戶部。尙書。滿缺。上以其祖籍涿州。本馮姓。尙踐文襄之席。蓋鹽梅之用。久塵聖心。故不拘常格。卽司台鼎。云。

晚過古春小築奉雨訪樊榭

游雲不滿空。返景下疏堞。佳人隔深巷。薄暮引幽涉。相違期非遙。相見意彌愜。微風亂燭影。涼雨鳴蕉葉。寂寞共西窗。惜此清淨業。

戊子仲秋爲友竹先生題畫卷卽送歸吳門

虎山橋外記維舟。曾爲梅花結伴游。彈指不期卅載過。驚心才有兩人留。甲子正月鄧尉之游歸。簡在師。張墨岑盛青樓俱下世。唯余與

友竹在耳。相逢且作無何飲。老別方知分外愁。展卷幾回還闕筆。微茫烟樹似吳洲。

方觀承

字宜田。號問亭。桐城人。雍正十一年。由監生保舉。加中書銜。官至直隸總督。加太子少保。諡恪敏。有問亭集。

曹素功菘粟齋墨歌

黃山六六峯。峯峯產奇松。曹阮二水交澄溶。天生墨材擅天下。精能孰繼廷珪蹤。廷珪去今八百載。劒脊龍紋幾丸在。元明妙製亦多人。轉眼烟塵隨刮改。興朝作者獨數曹。輕煤薄麝萬杵勞。水濡不壞點如漆。半挺可直千錢刀。後賢復能世其業。豹囊珍護青麟膏。鴻儒鉅公交口譽。姓字上徹楓宸高。却憶吾家老子魯。九元三極心良苦。名高物忌召恩讐。寂莫金壺贖空譜。于魯造九元三極墨。自謂前無古人。程君房與之競勝。遂構嫌。豐。秦寶鏡。吳純鉤。神物化去不可求。何如菘粟齋中青英。且日出。子孫長作松滋侯。老夫意氣雄筆壘。興來須遣雙螺待。菘甘園譜爲成圖。看潑春濤接雲海。

雨後夜坐

雨歇郊園暮。窗開野色青。歸雲不礙樹。淺水亦涵星。茶熟兼花氣。詩成託灑靈。涼宵秋得似。的的度流螢。

嘉峪關登籌邊樓作

時乙亥杪冬三日。

燉煌西外酒泉東。萬里登樓驛盡通。望去單于新毳帳。牽來都護舊青驄。水分夾谷邊重繞。山到陽關勢畧同。冷映高旌移暮色。塞雲開處月如弓。

冬夜雨中同劉林一馬湘靈話故鄉風景因成四韻

微風拂拂雨濺濺。已到輕寒十月天。茗椀頻添新活火。時里門寄梅花重檢舊吟箋。客歲詠盆梅詩。憶及白門翠微寺綠梅。

障爲隣預結山邊屋。湘靈擬卜居清涼山下。林一話金牛洞舊田之美。記取官齋同翦燭。數枝殘菊影猶妍。

上都河道中

歌殘勅勒天如蓋。路繞灤陽水不回。一片黃雲千載淚。秋風吹上李陵臺。

淀舟卽事

雨後空明絕點埃。篷窗倚對夕陽開。遙村暝色收盪去。別港青泥載藕來。行過塘頭復淀頭。葦花近屋稻盈篝。持螯消得津門酒。絕似江南九月秋。

連雨書□

山妻解事酒常具。隣友能來句共參。竹檻荷塘深閉戶。未妨梅雨住江南。

陳祖范

字見復。號亦韓。常熟人。雍正十一年進士。乾隆十六年保舉經學。授司業銜。有司業詩文集。

乘月過韋蘇州祠

皓魄揚光輝。良宵展游眺。微吟韋郎詩。言尋韋郎廟。庭枝倦昏柄。罌烟歇晨燎。此邦幾人臨。公名至今劬。

曰余愧俸錢郡闈但坐嘯坐嘯政已成來者誰同調精靈苟或存夢寐挹清妙

廟中祈夢多奇驗

袁氏林亭

勝地宜開野移居遠世情雲端雙澗落雨外一峯晴嵐重迷寒暑林幽失晦明主人興不淺次第架書棚
僧宿已徂暑秋光一醒人倚空山陡健入夜月精神鏡裏乾坤老霜前樹石新欣偕二三子坐對此清真

周官猷

字辰遠長沙縣人雍正十一年進士官鹽運使分司有雪舫詩鈔

蒲芻山房詩評雪舫長沙名族其子弟以文行兼者頗多雪舫任浙中鹽運判官數載其配爲萬九沙經女故與全謝山風樊樹諸君皆稱投分詩集四卷得大歷十子之遺惜僮蹇下僚迄今無有知者之

從常山至玉山輿中卽事五十韻

水勢日東流山形緬西蠹天險昔王開行役余懷觸太末古城陰陂陀起平陸蜿蜒出修蛇窈窕屈荒服
三浙扁囊鍵八閩蔽輿輿一徑亘江廣千岩聯楚蜀舳艫不到處牽輓飛隼速百貨競麇至萬夫紛蟻屬
我來值初冬詰旦誠廝僕筭輿計便安無勞策筇竹老大筋力衰憑茲勝炙穀垂帷避夕霧卷幔迎晨旭
墟舍散仍聚炊煙斷且續小憩得草坪欹斜幾椽屋瓦盆野蔬鮮酒旆村酤熟颺鼠快飲河一飽時已足
行行寒鳥啼樹樹哀猿逐橘看霜後頽茶憶春前綠确田列縱橫疲農勞碌碌亦足給饔飧差堪返淳樸

重關倏屹立。百雉誰興築。中有會關。上設城梁。危石扼咽喉。羣峯鎖腰腹。王路久蕩平。戍壘空懸艤。聞昨沔蓼區。妖鳥滋狂剽。潢池已解散。渠魁未卽戮。大吏識機宜。要隘嚴稽督。諒彼狐兔羣。疇能工竄伏。撫時生慷慨。望古益慚慙。惟昔爛柯人。仙杵閱幾局。昭棗得長年。採藥思辟穀。亦有龍邱萇。違榮甘抱璞。至今行路者。猶解指芳躅。我生逢矢志。廿載辭圭竇。傲骨摧奸頑。鑠金遭謗讟。頻年牛馬走。萬里無停軸。鷄肋詎足惜。鵞頂已成禿。以茲浩然去。行笈兼程促。寒風刮面來。凜凜肌生粟。黃昏微雨霏。泥滑艱彳亍。遙望市肆門。如投鄉井宿。得窮一日力。哀然見懷玉山。名爐峯。與彭蠡次第入遐矚。前途罔愆期。旦晚抵家塾。雖無金在橐。尚有書盈篋。白髮盼游蹤。荆釵冷銀燭。誓將謀二頃。壠上鞭烏犢。俊悠可卒歲。知止庶免辱。遠游不如歸。斯言當三復。

設林招集乳桐軒聽雨懷堇浦謝山

一葉蕉窗雨。懷人五月秋。江湖生遠夢。琴筑在高樓。促坐翦殘燭。天涯共白頭。遙憐吟眺處。嶺月不禁愁。

茸城訪王澹園明府

復此吳淞路。春風短棹餘。江寒連海氣。潮長入山渠。望郭煙迷戍。推篷雨濕書。故人官就此。聞道有懸魚。

南屏觀司馬溫公隸書家人卦磨崖

靈山此呵護。贖蹟重璠璣。言行名臣錄。風雲石壁書。懸崖蹲虎豹。下筆掃蟲魚。若爲鈎摹去。鴻都可得如。

下湘先寄鏡亭變軒兩兄湘濤弟

湘中清迴地。秋半早涼天。岸竹滋微雨。江花澹遠烟。帆隨峯影轉。月趁櫂歌圓。五字吟安穩。因風寄雁傳。
寄二兄變軒

家計仍相累。萍飄尙此身。三年遠俎豆。一夢越關津。鹿柴聽樵斧。漁塘倚釣輪。迴思雞黍夜。風雨對牀人。
彭端淑

字樂齋。丹稜人。雍正十一年進士。官廣東肇羅道。有白鶴堂詩文集。

蒲褐山房詩話。樂齋與弟遵。以詩古文名蜀中。時號二彭。其德器從容。涵養純粹。梁文定公階平尤稱之。自吏部郎出。爲西粵監司。未幾歸老。余過成都。適樂齋主錦江書院。談藝之下。相得甚驩。因出生平所作。同其弟之文。屬余論定。余爲刪存十卷。後六年。余告假歸家。適江安楊君卓來。令吾邑。見此願任開雕。及余還都。而楊君被議。謫處伊犁。此集不知何往矣。是時聞樂齋亦下世。爲之愴然。樂齋詩大抵質實厚重。不爲擊帆之習者也。

由破石出殺谷

南來歷險阻。破石獨爲最。萬古剗不平。磊落爭向背。二陵鬱相望。風雨時顯晦。秦晉昔交戈。百萬化土塊。設險自天成。陝勢分外內。崖傾一徑危。其下臨深澮。我馬虺以隕。跼步出入礙。艱哉蜀道難。劍門險尤倍。遙遙望前程。轉使心如海。

大士崑

乍望阻行旌。前山聳崕嶺。磴道蟠蒼穹。數騎自雲出。危石千仞懸。飛湍百丈溢。紆迴仗木欄。摧頽勢難必。偶然一俯首。不寒體自慄。叮嚀語僮僕。跋陟戒奔逸。防身如履冰。兢兢猶恐失。秦棧洵多奇。此岩寔無匹。驚定復長歌。愧乏少陵筆。

種蔬

老去復何爲。無營亦無欲。淡泊性所甘。食不假粱肉。宅外有閒園。土沃方種菽。是時已仲秋。天陰常靄淥。計日未成句。淳然出地速。毋令野苒侵。此輩多潛伏。春至應蕃滋。採擷佐饘粥。家居瑣務煩。勤動在手足。身無軒冕榮。理生那免俗。不見杜陵翁。題詩課僮僕。

發宜昌

孤棹發宜昌。西歸一水長。漸臨三峽地。深入五溪鄉。臘盡寒猶壯。灘枯險倍常。猿聲天半落。頭白早如霜。

駟馬橋送開制軍之伊犁

制軍名秦

河梁送別欲魂消。翹首伊犁萬里遙。正是秋風楊葉下。一行班馬響蕭蕭。

董邦達

字孚存。號東山。富陽人。雍正十一年進士。官至禮部尚書。諡文恪。

題白雲泉圖

白雲一掬陽山隅。涓涓滴下青泥珠。大瓢挹彼來注此。活火可試風前爐。泉下架屋山人居。林木窈窕羅蕭疎。泉甘味冽漱齒頰。能令燥吻生津腴。眞如灌頂飮醍醐。又似九醞仙家醪。人間點滴不到口。而此日飲無時無。顧我年來病未蘇。那得到此嘗須臾。一杯欲乞治相如。消渴已捐頰疴除。山中煮泉良非迂。惜哉身不游姑胥。東吳佳處悲與俱。展卷爲寫雲泉圖。雲泉之泉誰有諸。有客自是山澤臞。濯腸洗胃神清虛。得非飲者其仙歟。

金德瑛

字汝白。號檜門。仁和人。乾隆元年殿試第一人。及第。官至左都御史。有檜門詩存。

蒲褐山房詩話。總憲酷嗜涪翁。故論詩以清新刻削酸寒。瘦澁爲能。子同鄉最愛錢君坤一。督學江西。識拔蔣君心餘。于諸生中而汪子康古其戚也。甲戌。予入京師。總憲時時招同游宴。于一經齋。清談終日。率以爲常。及予南歸。又以書薦于前山東吳運使凌雲。其愛才推轂。皆此類也。總憲歿四十餘年。而杭城士大夫請祀鄉賢。時予主講數文。因送其粟主奉于學宮。歸而重復其詩。爲之淒黯。

道源書院贈南安游心水太守

孟後千餘載。周子紹微言。生知無師授。獨臻闢奧全。晚得二程子。日月回中天。南安雖僻郡。司李栖龍鸞。大賢過化地。飲水應尋源。胡爲過嶺士。競慕南華禪。修途關易塞。野火撲更然。英哲尙迷方。狂騁如風顛。太守篤經術。仁讓變鷹鷂。一綫扶正學。辛勤歷十年。郡東峙佳嶺。秀色羅雲烟。翦除伽藍宇。改作禮義門。堂中四栗主。俎豆昭吉蠲。民懷功德在。配以王伯安。典型斯可仰。百世興懦頑。十室有忠信。入里必式焉。

寧謂四邑陋。不堪與陶甄。招徠青衿子。爨舍數十間。擇師具餼稟。琢璞成瓊璠。我來一登拜。俯仰發清妍。霽月光風境。宛然落目前。君政異俗吏。必以德教先。邦人如鄒魯。君名當不刊。

朱子六經圖碑石刻在上
饒縣學

六經之書古尚缺。六經之圖古更無。聶氏有功著三禮。猶惜六經非全圖。誰其縮之六片石。刻縷名物窮。錙銖石六片
碑面刻宗廟左右辨昭穆。明堂頽會聯冠裾。徐揚雍冀列地軸。鳥火虛昴通天樞。國有六職工居一。輿輪蓋軫多爲車。六律娶妻呂生子。鐘磬琴瑟發笙竽。瞭然一一指諸掌。不比揣籥談空虛。古者左圖而右史。形上形下貫精麤。箋疏曲折難盡曉。了了壁上觀規模。不見文翁石室像。可證跪坐非跣跣。漢氏去古尚未遠。辛勤補綴追厥初。詎因犧象劉杏說。小失便訾北海評。紛紛末學講元眇。無根勦襲堪胡慮。聖人象數蔑芻狗。問及典制徒睢盱。一朝紫陽真儒出。大舍細入該無餘。渺然心通作述始。置身三代窺唐虞。我生識小尚不足。敢比豎亥周坤輿。畱之昭示千萬世。何止聲價同鴻都。

桃源

主人耕作客人漁。說向先秦恫恍餘。好是碧溪紅樹裏。不傳數卷未焚書。

秦蕙田

字樹峯。無錫人。乾隆元年殿試第三人及第。官至刑部尚書。諡文恭。有味經窩詩文類藁。

蒲謁山房詩話文恭尊甫維生先生頌繫日久文恭既入翰林即請以官讀父罪蒙恩得釋故時輿
桐城方公宜田稱二孝蓋以宜田每于秋日省其父于塞外皮所故也生平草心經術尤熟禮經因
仿徐健菴尚書讀禮通考廣為五禮通考二百餘卷自來諸儒聚訟之內為之疏通解駁又附以
歷朝史志使後來者折衷損益可以坐言而起行其有功於經義良不尠也文恭博學多聞窮經之
外凡河渠律歷下至醫方數術靡不通晰故梁文莊公云樹峯如鷹隼橫空飛而食肉又口若懸河
辨才無碍其為同曹畏服如此乾隆辛未詔舉經學將以為師儒之官令大臣集議論至常熱陳進
士祖范或以其所掌錄少之文恭奮袂曰若不得陳某則此舉為無光衆驚問故曰癸丑陳某成進
士因謁蔣文肅公于邸舍文肅以好語慰之謂子有盛名今登甲榜而我又在朝今歲大魁非君誰
關陳某默然不應頃之趨出語其僕曰速辦裝南下無令他日以我為依附權門遂不與殿武風節
若此豈可遺之奏上遂與山西梁錫璵顧棟高吳鼎皆賜司業棟高無錫人鼎金匱人亦佐文恭纂
五禮者文恭常招予寓味經齋數月予病為按脉定方故得聞其事
後鐫刻五禮通考方公已為直隸總督與清河道宋宗元共出賞刻之

題張葯齋少宗伯觀穫讀書圖

淳風浹朝野。藹然觀唐虞。緬維文端公。相業韓范徒。風雲構神契。簞什達宸居。至尊親洒翰。奕世留璠瓊。
抗稻年。年觀穫樂。子孫世世。讚書聲。文端句。聖祖親書聯幅。以賜公圖。即用此意。吾師粹家學。植德侔醇儒。和鳴振高岡。奉璋曳華裾。寅清播文
教。九載臨東吳。孝秀奮阡陌。絃歌徧鄉閭。君親兩酬答。深心託茲圖。峩峩龍眠峯。渺渺隻溪廬。山氣台晨
夕。水容湛清虛。隴歌起中宵。書聲與之俱。物我愜所願。此樂誰能如。以茲悟公意。豈伊戀菰蒲。人生有定
分。農業及經畬。四體誠各勤。外物焉得渝。當今明良會。富教均涵濡。昇平繪真景。六合應無殊。

冬夜有懷和天鈞上人

暮雲歸遠樹。夕陽在西嶺。招提寂無人。徒倚息孤影。空山響天籟。嚴霜襲衣冷。皓魄澹禪心。涼宵知漏永。

嗟余履屯難。壯志邈難騁。反側聽蛩吟。熒熒一燈靜。清飈山中來。助我發深省。起坐調鳴琴。幽懷徒耿耿。
蒼復初先生見寄之作

六籍聖所貽。紹述賴百氏。紀綱天地人。厥功焉可紀。精言與大義。歷歷瞭如指。性功達治術。出處均一軌。胡爲後世士。觸目驚且哆。如搆九層臺。版築傾基址。又如舟失舵。簸蕩風波裏。禮器及車服。誰復求形似。吾邑有顧翁。復古氣雄偉。窮年抱遺經。含咀吸真髓。脫身塵壒外。清曠莫與比。擁書萬卷樓。尋原必迄委。初年學古文。下筆輒光煒。尙論愛司馬。年譜究終始。先生曾著溫公年譜神交若投契。覲面相應唯。詎止傳賢蹤。裨補先正史。三禮圖宮室。古意追釋米。穿穴暨春秋。三傳列硯几。創成大事表。務合筆削旨。書成忽十稔。作歌告諸子。謂蒙守朴學。謬與談名理。款款尺素書。殷勤附赤鯉。軒朗豁雙眸。不啻脫疔痕。所恨久離索。末由竟株柢。先生名山業。塵垢視青紫。高風式鄉閭。立志起頑鄙。嗟予日荒落。勺蠶難測海。持示蔡與吳。人手先色喜。何當返柴荆。百尺容攀倚。

燕子磯

策杖陟層巔。凌虛望遠天。江山自終古。亭榭幾經年。帆影懸殘照。漁譟入暮煙。長吟舒逸興。風月任無邊。

秋齋雜詠

夙有東臯約。春畦十畝閒。牕開泉上樹。門對雨中山。好鳥亦知靜。孤雲時就閑。何當守寂寞。長掩舊柴關。

蔡新

字次明。號葛山。漳浦人。乾隆元年進士。官至東閣大學士。賜告歸。加太子太師。卒諡文恭。

題汪文端公松泉圖

種樹添新蔭。先當培其根。疏泉資灌溉。先當裕其源。少師勤學殖。呈材依禁垣。汲深耕脩綆。下筆文瀾翻。示明自獻納。公望羣所尊。御賜飛白書。中有至道存。松貞泉比潔。寶之重璵璠。竹皇平泉記。溫公獨樂園。何如此清華。天語含春溫。憶我追陪日。直舍鄰高軒。文漪頻挹注。美植長滋繁。披圖感今昔。遺韻猶堪論。既以惠來學。復此垂後昆。始知餘慶在。世業皆君恩。

題古中盤五松圖

昔聞畢宏畫古松。振筆長風浩呼洶。如何此卷僅矮幅。而多天矯騰蹕之蟠龍。鱗爪攫擊勢莫止。濤聲在耳雲盪胸。倬哉萬松老居士。筆端具有造化工。此圖何處得畫本。傳自古云盤谷之中峯。侍從宸游多燕暇。相對勝友此扶筇。濡毫拂素標異狀。貌得盤山古幹真。形容最憐後彫質。沐日浴月幾春冬。太平之世豈獨民仁壽。草木亦含雨露濃。君不見泰山上有五大夫。風烟剝落摧秦封。如此蒼髯礪硯突兀自千古。得非福地神秀鍾。松兮松兮安能布襪青鞋盤桓於爾側。髣髴乎桂父木客之高蹤。

劉綸

字育涵號繩菴武進人乾隆元年召試博學鴻詞第一授編修官至文淵閣大學士加太子太保諡

文定有繩菴內外集

蒲褐山房詩話文定謙和恭謹尤以清修自厲少在尹文端公幕府得其指授繼以鴻博第一入翰林注文端公愛其才兼重其度晚年尤與劉文正公相得和而不流無所附麗代言應制皆爲一時之冠予嘗以要事繕奏稿夜半詣公門請閱公起爨燭操筆點定時仲冬寒甚公呼三公子爲具酒脯而廚傳已空僅有白棗十餘枚以侑酒公亦自嘆其儉陋爲可哂也

白菜

北里初寒候佳蔬入饌鮮千畦風露足一飽士農便絕勝金齏味疑參玉版禪漢陰人笑我廢圃剩吳天

寫心精舍

恭和聖製元韻

仙源勝處隔塵音曲磴懸梯迥出林金粟花香真諦現玉池月印葆光沉能馴最是靈臺鹿解舞都爲闕苑禽當境拈參無盡藏仰憑天藻會天心

西郊晚行

亂蟬聲歇趁新涼路轉神臯草樹香卻羨村翁豆棚坐笑看秋稼比人長
雨澗條條寒玉鳴風荷葉葉露珠傾宵來欲借高僧榻聽促蝦蟆續五更

諸錦

字襄七號艸廬秀水人雍正二年進士改庶吉士散館降教授乾隆元年復以博學鴻詞徵授檢討

官至左春坊左贊善。有絳趺閣集。

蒲褐山房詩話絳趺閣集。歿後門人刪定。鄭幾尺江以爲指擢胃腎。抉摘杳微。陸達堂奎勳以爲言近旨遠。根柢深而英華自茂。皆定論也。余甲戌春入都。請予相見。每日苦茗一甌。鱸魚晶飯。雜談經史。危坐相對。必至日下。春而後許返。先生出臨川李公穆堂門下。生平博聞強識。詩法山谷。而志節皦然。甘寂寞。守耿介。權貴之門。徵逐之地。未嘗一至。蓋古之聞人。而世之畸人也。

論畫贈吳叟威中

繪事有幾輩。此道嗟沉淪。昔聞廣川語。遊藝兼依仁。隱或在岩穴。顯或在搢紳。大約非俗工。流傳盡文人。匪直妙形似。亦以寫性真。精神到寂寞。乃始下筆親。青崖隻髻皤。結茅秋水濱。解組歸去來。免踏京華塵。雲山米漫士。評斷張愛賓。偶焉騁墨戲。著手都成春。有時雙管下。有時五指皴。折枝含露暈。纖羽帖花茵。畫意亦畫似。師古不師新。翻嫌徽廟時。苑匠少軼倫。古來負絕藝。坎壈纏其身。空使倚市門。擲揄老斲輪。良工每手縮。識者徒眉顰。不見曹將軍。頭白傷賤貧。

牧牛畫卷

畫牛韓滉戴嵩最。後來張符亦擅長。是皆一匹萬縉直。風流埽迹餘芬芳。此圖誰所作。年久脫名氏。牯犝牯牯輸。數件并十四。牧童不壓肱。翹足樹陰睡。原田農丈人。何處負耒至。對此身在桃林中。白烟紅雨空鬢鬆。亦復神馳渤海外。催耕勸牧脫佩帶。江南草長禾油油。見月不喘吳耕牛。忽憶宅邊烟雨足。沙汀試借一葉舟。飽飯冬菁戴短笠。耕糞盡日夫何求。

桂林黨籍碑拓本

道君皇帝嗣位初。黑白氣挾西方俱。流傳天變不足畏。又見樓槍紛埽除。乃知奸諛竊國枋。恣以鈞黨相吞屠。其先立石端禮門。未幾播惡及海隅。碑高三丈闊一丈。涑水以下無完膚。歿者奪官兼毀像。存者中朝不得立。斯須禮至作銘有遺臭。李斯刻石尤矯誣。彼猶可恕。稔己惡。京也。剪此朝士。胡爲乎。想其顯書深刻時。意欲獨出無古初。海桑陵谷不能蝕。蟲沙猿鶴不可逋。睢盱噉嚼無顧忌。自謂快意真訐謔。嗚呼。天地有正氣。華衰却假一字誅。剝之上。九存剝果。焉有君子反剝廬。三百九人更作傳。子孫恩例遞上書。宵人私恨徒區區。昔何氣銳今何愚。勾芒忽聞前殿泣。強敵連騎東都驅。上皇蒙塵紹興渡。此石未泐國已墟。猶存一本桂林拓。以爲殷鑒非黃圖。前者甘陵南北部。後者東林復社徒。邪曲害公亦如此。古來反覆何所無。古來反覆何所無。不見鹿可爲馬脯。可蒲。

天竺三生石

疎竹雨添翠。遠峯秋更青。來尋石門磻。未識香林亭。白日午不到。清齋人獨醒。葛洪有丹井。乞取問修齡。

東鄭叟

行人司雨
隨公之子

日糴五升米。年侵雙鬢絲。阿誰羊舌泣。依舊虎頭癡。樽散難爲斲。風塵枉用緇。練裙寒色苦。惆悵綠窗詞。

叟所著

七夕

十三夜月

涼露微微滴。明河黯黯收。林端初繞鵲。客夜詠牽牛。戎馬猶邊地。關梁凝遠愁。清暉千里月。忍照曝衣樓。
蒼壁圓猶橢。高秋恰近中。微雲無點綴。清露竟流空。楊柳藏鴉起。蒹葭宿鷺同。隔船誰撫瑟。清怨出簾櫳。

杭世駿

字大宗。號荊浦。仁和人。雍正二年舉人。乾隆元年。召試博學鴻詞。授編修。有《道古堂集》。

蒲褐山房詩話。荊浦先生。善擁百城。胸羅四庫。入翰林未久。即以言事罷歸。其文愷公送之。有句云。隣翁既雨。談牆築新。婦或婚議。竈炊益深。惜之也。既歸。益肆力于詩古文詞。海濱地負日光。玉潔實足以雉長。蘇林兩浙文人。自黃梨洲先生後。全山庶常及先生而已。乾隆丁丑秋。予至西泠。相見共論古今文章流別。謂予曰。子無輕視放翁詩文。至此亦足名家。其沖懷樂善。迥異乎世之放言高論者矣。先生有十子。自第八子賓仁外。餘皆下世。諸孫亦零落殆盡。其道古堂集。梁山舟侍講刻之。生平著述甚夥。今付剞劂者。未及其半。

秋日集鳳鳴菴

精廬遶山根。雜樹青不斷。微風透□輕。初日出林緩。閒閒素侶偕。戀此涼蔭滿。熏心借佛香。礪齒汨澄澗。卽事唯永懷。率爾役青管。石貌非世嫌。竹意同我嬾。不期釋褊心。竟以覆微瘡。起行弄清陰。寫望入幽散。
晚秋游蓮居報國兩招提

秋深濟疑夕。幽興任所選。野色迹鳥飛。翠影逐人轉。緣谿徑石橋。散策入僧院。出林清磬圓。到水涼雲變。

洗鉢魚不驚。坐樹葉屢顛。不辭竹風吹。時得花雨濺。了知佛香清。矧戀鄉土善。視蔭惜遽歸。境過意頻眷。

越秀山懷古

峩峩越秀山。千古閱興替。臺隍夷夏交。月表秦楚際。緬維老夫陀。荆棘此剪薙。中原方逐虎。兵甲惜勞弊。從容得關疆。屈彊遂稱帝。帶海爲維藩。陴山作屏蔽。不知漢廣大。頗恃兵鋒銳。卓哉陸大夫。一語豁蒙噎。稱臣請內屬。蹶起解椎髻。朝臺壓閭閻。奕世永帶礪。牝晨誤遠圖。煽處乏調劑。戈船下泮河。一往失重閉。險設豈可乘。時衰力能制。始知開國人。貶損有深計。清朝息金革。曠宇喜開霽。秋風吹餘花。孤客恣幽憇。日落樹聲鴉。潮來城上颯。江天兩蒼茫。俯仰供流涕。岿峩腐吏筆。憑弔落荒裔。

會宿素舫齋作

苦雨漫林屋。向晚勢尙乘。希聞檐溜縮。時見新點增。嚴城急魚鑰。猛斂力不能。歡下聽雨牀。兼試照字鐙。深杯且重把。僻事請再徵。縱橫算文楸。爛漫天剡藤。微吟共擁鼻。短睡暫曲肱。瘦影儼翺鷲。靜退如枯僧。奇夜性所耽。習詔戒力懲。淒風攪松竹。併作清響騰。起視江上峯。澹澹沒翠稜。初地罕津逮。緩縛隻行滕。

張高要甄陶遺送嘉魚

鄙夫無他營。專意事口腹。家居江湖間。浩淼富水族。湖鯽鱸比絲。江鱸肥勝肉。其餘鱗鱗鯉。瑣猥不足錄。策杖來南中。譬奕已換局。炎荒闕冰雪。地氣少涵蓄。百錢謀盤餐。無一可糜屬。非無薑桂芼。不免腥腐啄。

廢箸長忍飢。噴責到僮僕。坐是兩頤瘦。經歲不能復。端州有嘉魚。性不受淤濁。噉嚼石室底。游泳蒼山麓。陟多始上浮。千百自相逐。漁子伏殺機。網罟恣撈漉。蒼梧見未曾。丙穴耳已熟。豈若此地佳。滓垢能盡浴。張侯我同隊。蓬池偶失足。知我彈鋏歌。清響出荈屋。牽船帶荇藻。遠寄一溪綠。撥刺頰尾長。斑駁錦鱗簇。笑鱸口空巨。陋鱖項常縮。饑奴忍不禁。亟令翠釜沃。堆盤出芳鮮。飽飫豈非福。終餐默自維。俊味恐難續。諸生頭角鱗。程藝聚筍束。妙義如吞鉤。活脫不可捉。釣深思嘉魚。善譬本山谷。山谷次韻晁仲考進士試卷詩。釣深思嘉魚。攻璞願良情事適相叶。會心吾豈獨。緘詩報良友。爛漫遂滿幅。臥想魚殮人。笑齒粲啓玉。

汎舟至游魚洲訪羅煩才精舍同過海幢寺尋本無上人

我友冰雪姿。寂寥抱冬心。亦有三黎生。共鼓風中琴。精舍八九椽。花藥羅堂襟。楫以六枳籬。劣許藤蘿侵。向南拓水窗。釣竹橫江潯。突出捎雲枝。濃綠招棲禽。從容申襟契。先後相窺臨。齋鐘起隣梵。命策同幽尋。幽尋到山寺。邪徑繚江口。參差春浮陰。飛墮不容帚。枯僧折幔幢。樹底一招手。佛屋可滌煩。禪喜詎嫌久。茶聲續寒吟。晷影側疏牖。循廊玩苔碑。坐樹接林叟。靈禽非生客。馴鹿亦舊友。揮手辭香林。濕翠猶在肘。

次江關晚晴步浴鵠灣至花家山放舟歸南屏

泛泛仙客舟。歷歷南山樹。渚晚欲生波。烟輕已紆路。觀荷引勝情。直破鏡光渡。丹房酣落日。翠萼晦昏霧。想見高興時。豪吟驚宿鷺。收歸素幘中。尚有無聲句。川觀不克偕。雲思曷由吐。披卷一忻然。洽我滄洲趣。

小西別館追送程舍人晉芳用昌黎會合聯句韻

簪毫紫禁嚴。宣詔丹地重。駿世誰歟冠文豪。入選奮才勇。裕黃高鶩歎力沉。翹望益神聳。閔摩空賦筆瓊。翻水

詩思涌。陳疾如馬脫銜。浩若川決壅。沙維遠齊嚴徐肩。近接顏陸踵。張四橫翔類排山。獨出儼斷壘。江光

連星河。程名氣懾虎豹恐。世握瑜炫席珍。含穎挺嘉種。駿世東門飲餞多。北地鈴馱冗。裕乘風想揚鑣。過家

當上冢。華雞壇別舊知。鳳閣拜新寵。阜驂闕候館闕。旌拂驛樓栱。維衝寒馬毛縮。裹雪僕心恂。四雙堠隻

堠迎。十漿五漿奉。炎封崖冰嵯峩。撐郭樹臙腫。世名閨市驚乍穿。短簪喜初擁。駿世岱色翠忽交。燕雲晴可捧。

曉警盤空鷹。夜咽跼寒葢。華美哉壯游遨。胡然惜微種。阜心儀王道平。目極帝闕鞏。維殊恩故特達。當

職敢傷鱗。科四陳謨追虞唐。銜憲展虔悚。炎革帶玉螭盤。黼裘青兕茸。世名丹穴耀九苞。華省豔雙琪。世駿兼

晴朝制尊鼎槐。皇輿擴秦隴。裕德至銀甕出。瑞應玉膏溶。華賜復逮耆耆。肆省破蠻拳。阜謀謨參廟堂。雙

理佐宰冢。維墓言羽排霄。清口繭抽蛹。科四居中體易崇。近日價增踊。炎雄飛鳶戾天。卑伏燕斂氄。世名君行

慎樞筦。趨直準宮甬。駿世我其內熱歟。鬪險夜呼洵。裕

聖與圖爲沈鑣作

魯雩門外境崔巍。參覃灌木大十圍。龜山左顧帶沂水。差差綠漲初生肥。聖門狂點見大意。童冠六七相
因依。餘寒乍減試白袷。雜花亂逐羣鶯飛。上已被除本國俗。此老胸次何祥禩。解衣就冰盤薄羸。那得遽

免同川譏。臨深况有辱。親懼教。獐毋乃。行人誹魯論。古本踵訛誤。小儒咋舌徒。依違昌黎解。經出巨手奮。筆直改沿乎。沂此義皎如。撥雲霧。紛紜曲說皆當揮。沈郎觀書鄙章句。志在擺脫塵中鞅。謹謝冠者挈童子。意取活潑流天機。紅鵝拍拍戲。苜岸青芽短短抽。蘆碕游絲颺空如。繫日暖風度水旋吹衣。眼前生意收不盡。好事往往傳郊扉。從游一問子所善。樊遲而後三人稀。涵濡聖涯更得汝。上與狂者爭幾希。城南暮景翳將入。呼秀在縣城南七里。濯濯皎月流金徽。三章試咏舒天紹。攜幼緩緩循隄歸。

南漢金塗鐵塢歌

香刹崢泓花雨歇。秋繁匝地涼珠結。華幢七級門莊嚴。突兀東西破空立。棱尖萼萼刺天閭。焦葉盤盤卷雌蜺。是誰留此鎮山門。儼似巍峩雙闕揭。我來開梵訶子林。衣上濃陰清可插。脩廊走徧寶坊開。捩眼香雲驚一瞥。青苔繡蝕九蓮花。勁骨橫撐孤竹節。層層烟蓋透瓏玲。獵獵風輪轉替戾。細尋銘字瘦蛟蟠。淨剔霜花釵股折。僞號公稱大寶年。傳家不改驕淫轍。矯首江天三太息。往事茫茫更稱說。昌華苑裏月如霜。歌舞岡頭花似血。髡徒噓燄竊國鈞。熏涿瞞天污朝列。塗金定徵三品貢。鑄錯空糜六州鐵。君不見天險頻爲荒宴移。地脉潛教媚川洩。又不見洸祠枉殺邵廷瑁。賀江晚起潘崇微。雙女山前戰艦空。流出降帆水鳴咽。江南眼見死牽機。西蜀同時亦灰滅。亡王獨爾保天年。佛力居然佑顛蹶。尋僧弔古起羈愁。漸漸西烏澹將沒。摩挲千過飽興亡。歸到虛堂轉騷屑。

題魏司馬縮課兒圖

吾聞漢有鄧仲華。勳高望重願不奢。子十三人人一藝。後乃各自名其家。又聞晉有劉長盛。教子紛綸經史並。蔚然門內七業興。北州學者莫與京。魏侯攬轡來黔中。諸郎玉雪驕春風。佳者龍鳳劣虎豹。頭角嶄露牙須雄。侯今施政政已通。訟庭長草青丰茸。晚衙初放常自教。短檠燄燄燒青空。此樂於今幾人見。寫入圖中洵堪羨。不將蠟鳳滴圓珠。共向銅槃誇異饌。青箱素業世爭傳。鉞鏤門風原不賤。清時養就凌雲姿。豈患雄文少人薦。我輩於世百不聞。愛就阿戎談夜分。投床隔屋支枕聽。琅琅送響清人雲。長公名聲如蘭芬。次公意氣更不羣。橫經奪得戴憑席。弄筆書破羊欣裙。盤空硬語輒敢和。跋扈真足張吾軍。杜言紈袴不餓死。蘇言識字憂患始。斯皆過激非至言。吾所斷章不在此。請標二事舉似君。符讀城南陶責子。

夜入羚羊寺

羚羊峽束初上潮。斷岸千尺叢青茅。衝波卷浪擿柔撈。舟師怖恐龜魚驕。松間忽出焮火照。始識蟻路緣秋毫。登登輕策攬臂上。蘚磴屈折藤蘿捎。榕陰黯黯穩栖鳥。石骨逋峭愁飛猿。野僧披榛起肅客。纖塵不動鳴蒲牢。潮音傑閣亘天半。香雲縷縷盤空拗。側窗透空望江影。似有寶月空中招。天風擺磨振仙梵。飄墮木杪驚鳥巢。吾聞仙人顏李蕭。伸臂運筆一丈高。見范石湖詩註英山古寺昔題壁。靈迹已邈難追鈔。茲字嶸嶸夾山立。佛力猛鎮千年蛟。一重沙界一重獻。腹背交壓苦提梢。攬天峭壁闕雲篆。浩劫期我騰神尻。埽

空試鑄三百字。畱與好事懸椎敲。脩羅降雨助墨海。餘潤立灑湖田礲。江深夜黑一揮手。燭龍銜曜應相邀。

明嘉靖中端州守曾直建八節祠於北門外以祀唐張柬之李紳宋劉摯鄒浩胡寅胡銓畱正張世傑而魏元忠以亢直貶高要尉獨不得與余以春日肅拜祠下心獨異之作歌簡吳太守

劉高要爲鴻

君不見魏元忠布衣上書論兵事。金殿吐氣如長虹。鐵冠峩峩肅綱紀。豪奴杖殺都亭中。除惡志在清君側。白簡豈顧張昌宗。羣邪側目謠詠起。卑官謫墮炎荒中。洞夷畏威噤不發。至今崖厂流清風。吁嗟高要一隅地。貶官往往王侯充。韋承慶輩不足錄。如公豈合隨沙蟲。我來端水恣臨眺。步履晚出高城東。僂僂崇祠壓道左。大樹突兀寒烟空。入門肅拜認栗主。八賢名姓昭愚蒙。唐景龍逮宋迄命。大節歷歷摩蒼穹。茫茫宦跡證人代。屈指獨少齊貞公。元忠封齊國公諡貞去畱豈復有深意。討覈那不謀羣衷。笙鏞暗啞芹藻闕。閱二百載無人攻。自來守土責匪細。社稷尸祝宜甄綜。漢陽王傅志失載。高要志不載張柬之與公乏祀將毋同。旅窗作歌寄牧尹。會看闕憾能彌縫。豐祠從此標九節。亘千百世垂無窮。

連日飲止山堂梅花下簡盛上舍世揚

短巷晴莎軟。嘉招步履頻。梅畱殘歲萼。酒泥蚤春人。素壁廻鐙豔。枯碁算劫新。耳邊鄉語熟。客裏倍情親。

好客應須酒。看花可少詩。清吟君最擅。爛醉我何辭。冷蕊時窺座。飛禽忽踏枝。眼前生意足。不用慰衰遲。

題獨渡先生遺像

南村晉處士。汐社宋遺民。湖海歸來客。乾坤定後身。竹堂吟暮雨。山鬼哭蕭晨。莫問匡門去。霜風收撲人。
秋井苔花漬。荒廬蜃氣蒸。飛潛兩難問。憂患况相仍。拄策非關老。裁衣祇學僧。淒涼懷古意。豈是屈梁能。
巢覆仍完卵。皇大本至公。蓼莪篇久廢。薇蕨採應空。劫已歸龍漢。家猶祭鬼雄。等身遺著在。泉下告而翁。

謝錫大將軍惠黃精

返黑思黃獨。羅浮產最良。斲來鴉背膩。馱送馬蹄香。靈液蒸丹竈。山苗曬石梁。羅淨有葛洪丹竈二山相接處有石如梁曰鐵橋

方言聽漸熟。知是野仙薑。

鄭氏休園二首

巷逐城陰轉。人傳谷口居。入門三徑曲。過嶺一亭虛。捉麈鷗邊席。行廚竹裏廬。不知尋鹿砦。裴迪近何如。
薜壁青蘿繡。苔楹老樹撐。穿花莎徑窄。照影古潭清。高臥茶噴枕。微吟鳥繼聲。即看仙跡杳。猶剩石棋枰。
贛州傷王總戎濤。即題其浩氣集後

章江東望颺檣烏。太息元戎此寄孥。見說粟姚工蹋鞠。豈知虜善投壺。蠻荒笳鼓開詩壘。瘴海風雲入

秋日獨上五層樓望海

千級層梯宛轉過。浮雲棲棟下承阿。樓船瀨水思楊僕。黃屋蠻荒笑尉陀。蜃氣三春侵畫堞。騶夷百戰息
碣戈。茫茫漲海東南去。極目天涯涕淚多。

九日曹孝廉逢招游光孝寺喜遇羅秀才元煥

相期九日散清愁。共向城西古寺游。樹葉翠含梁代雨。井波涼汲海門秋。吟邊剩韻邀羅袞。劫外零縑見
貫休。卅載津梁慙臥佛。又隨紅葉上經樓。貫休畫應真羅漢一幅。尙存寺中。經樓上有銅臥佛。

齋廚曲傍翠琅玕。爛熳松花恣意餐。識字耕田慚兩負。打鐘掃地喜粗安。池光透日搖丹壁。草色乘秋上
古壇。俯仰便生身世感。山僧只作勝游看。

拱北樓

蕩蕩雙門勢轆盤。危樓直北拱長安。蓮花轉漏銅龍咽。雲葉棲簷鐵鳳寒。萬里行來初放眼。九秋悲後獨
憑欄。珠明氣象層層迴。可許孤臣綵筆干。

得閩中諸故人書却寄

鄉心長在雁歸前。回首生涯意黯然。奉使自慚非陸賈。傳經差喜得彭宣。浮江客去剛三月。謂吳雍吳珮增過嶺
書來動隔年。坐待深更僧磬寂。不堪依舊抱愁眠。

哭厲徵君鶚

復衣升屋叫荒祠。掌夢無憑祇益悲。服散幾年疎酒伴。分香先日放歌姬。契丹已定傳疑史。天水空鐫本

事詩。泉路定應尋月上。斷風零雨說相思。君著遼史拾遺。期與余撰金史補闕。宋詩紀事百卷已刊行。月上其亡姬也。

年年蹤跡滯揚州。兩點金焦健筆收。翠壁分題香界暗。玉山高會草堂秋。韓江烟月魂應戀。石友情懷老

更愁。謂馬曰瑄曰璠他日來尋舊吟榻。不堪腸斷竹西游。

集素舫齋詠春陰

如船矮屋入新年。雨後偏慳曉日鮮。芳草客尋行藥地。輕陰人住養花天。檀欒翠竹清收影。澹池荒池冷
霧烟山鳥錯疑巖谷暝。飛來長繞石牀偏。

秋日南屏僧舍茗讌

藤刺鉤衣石有稜。旋螺山路記來曾。貪涼客喜因秋健。無礙天真似水澄。竹裏煮茶清響發。樹頭安榻午
風增。孤懷欲寄東林社。不見虛堂覓句僧。詩讓公在桐鄉。

紅橋雨夜

小雨微微未肯晴。漫游且共放船行。望中撥擢春泥滑。醉後推窗夜氣清。玉鏡雲蕪華月影。畫橋風度豔

悅枝堂坐雨

爲戀清歡未肯歸。棋完剛值雨微微。儘牽孤客偷閒坐。別約殘花恣意飛。似醉心情仍命酒。作寒天氣欲更衣。青鞵不惜衝泥滑。傍郭人家早掩扉。

秋集徐本清學圃

桐陰不雨也生涼。藥草因風自送香。弄水與鷗分野席。看山留客坐茆堂。舉杯已約月同飲。得句且邀秋共商。幾折危闌天半倚。葛巾吾欲傲斜陽。

咏木綿花

目極牂牁水亂流。低枝踈地入端州。最憐三月東風急。一路吹紅上驛樓。

過文明門見木綿花再賦一絕

只和柳絮撲雕闌。不共蘆花漲碧灘。可惜向春零落盡。西風依舊客衣單。

湖海詩傳卷六

陳兆崙

字星齋。號句山。錢塘人。雍正八年進士。乾隆元年召試博學鴻詞。授檢討。官至通政使。

蒲褐山房詩話。星齋先生成進士後。重入宏詞。游登卿等。侍直上書房。兼尹京兆。而意致蕭散。寢處輒有山澤間儀。書法蘭亭。取意簡遠。梁侍講同書云。本朝不以書名。而書必傳者。陳文簡公元龍及先生也。余得其手蹟頗多。適濱後皆失之。王寅修西湖志於杭州。因索先生遺詩。而令子同知玉敦深閱不肯出。及其孫桂生來京師。始以全集見示。并乞序言。因而甄錄如左。

春正四日謝孝廉徵雲招飲一枝山房

亞字城南烏石西。市塵不到稱幽棲。一聲山犬穿雲吠。幾處林鳩帶雨啼。掃葉煮泉丹井暖。就花移琖石牀低。平生臘有春襟在。纔入新年醉似泥。

臘底病中有述

聲聲巷柝報三更。欹枕無眠對短檠。技到鳴驢真可笑。心關鬪蟻動成驚。中年斷欲衰偏早。瘦骨支寒痛漸生。已自低頭攻七發。其如歲事劇嶢嶸。

二月二十日同孫二端人夏十二醴谷宿海淀隱師房

師號隱扉。僕與交久矣。頃來上御門益早。始初辨色耳。故翰林官侍班多借宿於此。

一聲孤磬散林陰。好月當窗照素心。手版恰堪量丈室。顛毛渾不稱華簪。中春漏促眠須早。老伴情多話

轉深。幸得絺緣歡喜相。鎮容塵轍此相尋。

蒙恩賜鹿肉恭紀

一樹分霏獵騎還。霜毛猶帶染輪斑。烟浮豐草長林外。味在松花柏子間。作炙送杯憐僕倦。下鹽爲脯笑余慳。平生頗切庭懸愧。須認君恩異等閒。

將回至熱河公寓途中疊南天門韻屬景垣和

萬曲東流湧玦環。輪囷佳氣近堪攀。未成清暑宮中頌。前一月餘侍皇子讀書於行宮東禁以殘暑展闋期故也忽自長楊獵後還。地

有含靈先潤戶。潤戶用天官書語意雲將入塞半遮山。今宵合刻題詩燭。屋底安眠慢啓關。

題邵戒山先生朝參遺像先生諱遠平康熙甲辰進士入鴻詞科累官少詹事

坐殘宮漏整冠裳。脈脈書思踏曉霜。未許家人窺藁草。藁草見班彪傳肯令隸役探綈囊。運逢昇泰忠逾篤。世閱

艱難慮較長。借問椒馨滿楡社。幾人留得簡編香。

沈芳廷

字晚叔。號椒園。仁和人。乾隆元年召試博學鴻詞。授編修。官至山東按察使。有隱拙齋集。

蒲褐山房詩話椒園風流儒雅詩筆亦同書法在蘭亭丙舍間乾隆戊寅予入都遇于臨清同行者經月青篋計訪書籤硯格繡歷不染望而疑爲魏晉間人也爲臬使時嘗欲以湯文正公紙崇祀兩廡事雖不行庶論建之士論建之

題商秀才紫芝剡谿秋泛圖

騷人泛剡曲。爲愛名山多。谿光動古壁。秋色明烟蘿。時有清香來。遠渚留殘荷。菰蘆雜蘋蓼。奕奕揚微波。中流自容與。曲折隨扁舸。昔游每入夢。塵境浮青螺。況讀吾友畫。恍若重經過。雅懷將無同。歲月空蹉跎。溪山不負客。歸計當如何。

登泰山歌

五岳巨鎮推岱宗。插天萬仞青芙蓉。盪空層雲浩如海。夜半日躡扶桑紅。初經迴馬嶺。路轉山腹行虛空。旋過水簾洞。倒懸雪練噴長風。石磴盤盤歷盡十八曲。始覺捫參撫井呼吸上。與天關通。左招碧霞君。右叩青帝宮。羽衣金節飄飄半空下。邀我游戲秦吳兩觀東西峯。其間秦松漢柏雷雨已摧朽。焉辨七十二代玉簡金泥封。攬身絕頂高攀雲松。磨崖剔古篆。剝蝕如爛銅。獨有無字碑。屹立寒雲中。我欲大書補其闕。恐驚山鬼驅蚪龍。還尋祖龍避雨地。更訪天寶盤游蹤。祈天符命理無據。矧以縱欲希神功。粵稽重華事柴望。肆覲羣后昭協同。周王時邁陟喬嶽。明堂數對來球共。東巡自古有典禮。詎尙封山刻石誇豪雄。吾聞泰山之雲膚寸合。氤氳倏歛彌蒼穹。化爲霖雨澤萬國。神靈酬秩宜三公。默贊我后效變理。永禳旱潦銷兵戎。和平作頌覲神聽。多稔多黍歌年豐。

彈子渦

海天插水石如笏。忽肖怒濤勢鬱勃。留在波間山作骨。中有通水碇礪。雙巨彈子相磨汨。祖龍欲鞭鞭不得。生此莫計萬歲月。頃乘長風駕雲帆。攀掖登岸凌巉巖。俯視窈深宛在械。試嘗水味仍作鹹。若遺龍卵質不凡。移置隔宿劍合函。人有以彈子石移置他所者隔宿仍歸函內坡仙頻訪忘暫暑。愛之不異耽香餽。余亦癡興弗可芟。匹聆廣樂逢謏咸。品題奚止玉與瑊。歸躡石頂勝野巖。潮平一色春蕉衫。

次韻答樊榭見寄

而歲相思碧海遙。先生南返我辭朝。夢回梁月聞雞唱。香滿湖花發藕條。貧裏預籌遊岳屐。老來縱筆賦江湖。耦耕行踐秋蒨約。無盡意齋吟沓寥。

立秋夕同中林履旋小飲隱拙齋

早見銀河角影斜。西風先到小庭花。涼生荷芰野人服。秋滿竹林居士家。團扇欲拋留篋衍。短檠初上對窗紗。題詩莫感流光速。明月當頭酒可賒。

夏之蓉

字芙蓉。號醴谷。高郵人。乾隆元年。召試博學鴻詞。授檢討。

過十八灘

自我來西江。連宵黯風雨。旋渦躡急瀑。孤夢破柔櫓。舊傳十八灘。迅疾甚飛羽。其上排雲霓。其下蟠水府。

三曲奔雷霆。五座鑿門戶。涼灘尤斗絕。餘波尙歎吐。橫空折坤軸。入坎發機弩。滾滾驚狂奔。盤盤瘦蛟舞。怪石立積鐵。穿沸類鳴釜。決溜懸篷牕。雲霧暗江浦。憶昔游閩南。王事日靡盬。豈無川梁隔。未覺行役苦。江潭古人輕。窮薄命所主。敢謂恃忠信。時亦戒莽鹵。積悶腸屢回。愁多頰慵拄。所賴素心人。聯舟澹容與。險韻誇競病。諧談雜爾汝。驚湍倏已平。微陽照孤嶼。

齊召南

字次風。號息園。天台人。乾隆元年。召試博學鴻詞。授檢討。官至禮部侍郎。有賜硯堂詩。

蒲褐山房詩話。侍耶賦。才敏慧。博學多聞。自詞林以大考前列。卽登卿貳。入上書房。退直歸澄懷園。上馬守門。兵舉赤捧。驅之馬。驚墜地。傷于額。腦髓盡流。皇子聞之。亟遣蒙古醫生往視。殺牛取其胃。絲繩包裹。鼻回館舍。至半夜乃得蘇。又傳以祕藥。閱六七月始痊。然于平生所讀。已不能記憶矣。其所著撰。皆未能成編。惟水道提綱。係充一統志。館纂修時。所撰於源流上下。縷析條分。使讀者如指諸掌。又有寶繪堂文集八卷。則浙江臬使秦君瀛刻之。詩亦編爲八卷。稿尙藏其家。今摘錄如左。

午窗坐睡

讀書花滿眼。憑几柳生肘。不如扶養和。一覺齊萬有。睡鄉鄰醉鄉。太古相傳久。跌坐遊華胥。至人或捧手。教我持斗杓。盡量飲天酒。導我餌丹丸。天地並老壽。形神豈長保。金石亦衰朽。葆真傳片言。長跪謹當受。人嗤晝作夜。我似浴去垢。醒來午炊熟。疑值邯鄲叟。

越城懷古

海內蓬萊是越州。畫屏中臥鏡中遊。家家接檻連青雀。日日開簾對白鷗。蟹舍嘗懸明月夜。菱田標颯夕陽秋。我因一曲思狂客。煙水微茫何處求。

符曾

字幼魯。錢塘人。監生。乾隆元年。薦舉博學鴻詞。尋保舉。官至戶部郎中。有春鳧小稿。

蒲褐山房詩話。余初入京時。卽見春鳧主人。時年已六十有餘。爲戶部郎中。常以窮假。所居韓家潭。令余直入臥內。床幃之外。書籤畫卷。茗椀香爐。列置左右。几案無纖塵。四時長供名花數盆。余笑謂曰。入君燕寢。已如在斷橋籬落間。使人不復憶西子湖矣。其雅潔蕭灑。非東華軟香塵上中人。所能企也。蓋自少與樊榭堇浦玉几同學。故其戀情如此。詩亦清絕。不免窳於邊幅。而儵然物外之致。可想見其風韻焉。

宿水興寺德公山樓同厲樊榭作

空山行晚雲。褐衣濕春雨。昏際人漸希。杳謁入深路。曲磻伏潛流。叢篠紛交護。到寺僧相迎。把火話曩素。雨止鐘亦殘。星光出幽樹。境異心頓開。魂清跡偕赴。夜窻覓山歌。影忽落如霧。亂耳百松聲。鏘然奏韶濩。清極本無寐。有夢亦同趣。至晚重儂徊。烟華想流注。

雨中舟泊白門

濕雨低颿重。冥冥江路遙。殘蘆易蕭瑟。孤雁感飄搖。秋盡身仍客。舟停晚避潮。烟中一吟眺。遠樹見寒條。

菊

西風被楚菊。踈蕊自離離。瘦影交秋徑。寒香出短籬。淡能消世味。清復絕人知。持此繫懷抱。冰霜與後期。

燈夕懷稚威

東華雪霽後。烟月自孤清。開閣客初去。下簾苔欲生。梅花醒宿酒。斜月夢春城。除却吟兼臥。深懷望遠情。

重過永興寺

向與樊榭看梅。夜宿于此。去今廿八年矣。寺亦頽廢。爲之慨然。

尋碑野寺蘚痕斑。祭酒風流杳莫攀。不見疎梅照寒水。祇餘修竹滿空山。雲歸初地鐘聲寂。秋散遙天客意閒。還憶春泉滴幽澗。竹窗深夜聽潺湲。

淮浦贈鴻漸僧。工畫能詩家吳中。

偶然淮浦寄閒身。卷裏青山與細論。到寺秋光紛滿眼。繞隄流水自通邨。師如鴻爪空留跡。我比蛛絲淨掃痕。他日支硎訪梅去。袖攜香雪叩柴門。

題畫

秋來游興遍天涯。山水方滋豈繫家。一枕清風住茗甞。未妨留客爲蘋花。

遊南湖慧雲寺

昨夜西風減漲痕。荒坡流水接城根。秋光多上綠荷葉。斜日晚花香寺門。

過皂林

蟬唱西風暑漸忘。篷窗客睡試新方。夕陽帆影沈秋水。一路菱花送晚涼。

感舊

蒼涼無復舊遊蹤。踏月聞歌記昔逢。今日西風黃葉路。獨行荒寺聽疎鐘。

陳撰

字楞山。鄞縣人。布衣。乾隆元年。薦舉博學鴻詞。未就有玉几山房吟卷。繡鈔集。

蒲褐山房詩話。楞山爲毛西河弟子。又工寫生。以墨暈之。若不經意者。而蕭疎簡遠。品格極高。亦不苟作。故時人寶之。余定交。邗溝時年已六十餘矣。戍削而修。望之若閒鷗。野雀。嗜吟咏。今所傳吟卷。蓋一鱗半爪。佳者或不盡是也。然句如二分明月樓頭影。十里平山檻外雲。兩時茶飯伊蒲饌。一樹梅花貝葉書。詩卷白頭悲舊雨。燭花紅淚滴秋堂。焚香自寫圖中影。把卷何須絃上聲。饒有晚唐風韻。

歲晚雜述三首

我旅苦瑟居。無以與日夕。惟有二程子。借松門。過從稱莫逆。如何復分張。數月虛接席。漫天雲萬里。到地雪

三尺。閉門時相思。開門斷行迹。百里尙如此。何況千里隔。借松門客真州。借柳還宣城。

楊子別三月。楊工求。相見出意外。握手總片時。凡到寓齊即去。咫尺阻塵壒。既無連牀話。亦乏斗酒會。身踐逆旅難。

時窮道途憊。獨有磊落腸。一往尙凌邁。今晨命歸楫。幡然返蓬艾。惟我留天涯。寒廳轉無賴。遙思急風帆。

雪花飛掌大。

時既苦鈍悶。客亦抱拙遲。耳目乏充對。胸膈靡妍思。盜盎花一叢。出自我友貽。水仙一盆。宋庭所貽。置之硯席間。坐起同燕私。衝寒發妙香。虛室來天機。不足爲人道。吾以絃吾詩。

擬古

黃鳥集柔桑。白駒逝空谷。豈不慕言旋。進退悲無告。作客每思人。投足多踈踖。已無邱園存。十畝何由築。白雲時時飛。煩紆亂心曲。護草不可樹。汎此杯中綠。

端居生百憂。獨步向原野。擾擾躬耕子。誰可與言者。倦翼拂樹還。頽景依林下。不見一心人。延首淚盈把。撫枕怨遙夜。振衣步中林。涼月皎素輝。照我松間琴。佳人不可覩。山川阻遐深。願因西飛羽。遠致瑤華音。雲路無由階。引領傷我襟。

天道不可問。撫躬良悠悠。昔爲公卿子。今爲輿隸儔。劔埋豐城獄。鼎沈伊水流。貴者可復賤。賤者將安求。何如遊太始。冥心委糟邱。

市門競錐刀。志士爭懷抱。誠使中心安。此外均草草。貧賤顧有分。簪裾何足道。松柏本不凋。何知春風好。陽鳥收餘映。夕兔升檐光。傲然一樽酒。醉倚空階旁。不知庭際露。泫然濕我裳。援琴謔陽和。清響激天霜。此曲苟可理。知音寧所望。

昔聞彭澤老。耽醉未能醒。折腰恥俗吏。歸來臥柴扃。茅檐秋日高。朗誦山海經。悠然觀物化。坐對南山青。

我行一何有。于世空沉冥。遐慕今已矣。太息增撫膺。

古蕩歸途

日暮東風急。歸途雨正繁。泥深粘屐重。雲濕帶林昏。野水喧漁艇。人家掩竹門。遙憐折梅處。回首更西村。

春盡

爲貧常作客。春盡未還家。故國重回首。江城正落花。屯雲依樹斷。江柳趁風斜。寂寞年時意。勞勞空歲華。

羈棲

羈棲成我拙。躑躅世都忘。草樹荒三徑。琴書亂一牀。苦吟貧亦好。屏跡嬾何妨。時復看雲去。和烟過石梁。

聞蛩

不寐夜聞蛩。淒淒四壁空。疎燈人醉後。細雨客愁中。失路依衰草。長吟向暗風。壯心殊突兀。爲爾感飄蓬。

□□

日沒秋陰靜。閒庭向夕昏。鳥栖無定樹。葉落半空村。砧杵誰家急。園林幾處存。衰燈寒照客。獨酌盡殘尊。

新柳次韻

淺拂輕描畫閣前。微黃楚楚倍芳妍。春風驛路初橫笛。夜雨江城恰禁煙。試看藏鴉還計日。憶曾繫馬忽經年。無端觸忤生惆悵。豈待吹花賦別筵。

漲

木落烟江漲。沙崩古樹根。汀洲蘆葦沒。繫艇到柴門。

葢

疎牕秋氣靜。清露濕籬根。細語蛩聲急。愁人自掩門。

螢

月黑秋林昏。映水忽明滅。微光聊自照。不假因人熱。

艇

放艇沿清溪。隨風去容與。隱隱聞漁歌。蘋香不知處。

筇

白恰清秋客。蒼藤碧玉紋。醉扶三徑月。吟倚萬峰雲。

簞

淨展桃笙滑。涼生薤葉秋。橫琴山月浸。欹枕水雲浮。

樵

腰鎌入秋山。山秋足烟樹。長歌行荷薪。踏葉尋歸路。

經舊酒家

小市紅燈憶昔遊。短衣側帽劇風流。錢郎已去王郎死。忍過樊川舊酒樓。
予于夷辰化上同王紫欄使君及歌者錢郎會飲於此

送工求

天畔離思夢未醒。登臺秋露下殘星。落花吹徧江樓笛。偏在關山獨自聽。

朱稻孫

字稼翁。秀水人。彝尊之孫。貢生。乾隆元年薦舉博學鴻詞。有六峯閣詩稿。

蒲稱山房詩話稼翁少孤其祖撫之漁洋題小長蘆卷所謂桐孫稻孫者是也稼翁以名人之後至人傾慕之乙亥丙子間年近七十游揚州為虛雅雨運使上客因出其祖所撰經義考後半未刻者雅雨為刻其全其後開四庫館詔求遺書得以全帙獻於朝上題詩冠首由是流傳海內蓋可謂能守先澤者矣晚年貧不能支曝書亭藏書八萬卷漸致散佚而已之所作亦久不傳余與其孫伯承為鄉同年又在揚州同寓梅花亭數月故得見其詩張匠門序所云始則氣猛而格上後則境膠而情遙殆不虛也

月夜宿清流關

重關昔設險。山勢多劣削。徑小路盤紆。有蹇策不得。秋月皎夜光。遠近見峯色。分明龍眠畫。具此大筆力。緩步過山坳。樵櫟費攀陟。鐘聲雜鈴聲。可聽不可即。白露濕我裳。一餉林間息。

過張顛三水周林留題

一曲波淪小。軒窗四面懸。儘能留散客。自可酌清泉。風定花枝亞。林疎塔影圓。撐他湖上去。合喚總宜船。

醞舫卽景

節未逢寒食。傷心已禁烟。欲臨求米帖。久讀絕交篇。樹有新禽集。牀無故客眠。淒涼桐竹下。卽景淚潸然。

賦得十月先開嶺上梅

峯前迴雁北飛時。早是東風第一枝。小雪乍晴行客路。短牆深護曲江祠。青猿上樹休教折。翠羽中宵尙未知。說與隴頭人不信。除非驛使寄相思。

無題和柘南

纔渡銀河會女牛。瞳瞳日上最高樓。人當欲別終難別。曲記無愁果有愁。絕世自應稱北里。憶梅從此下西洲。水邊輸與雙鸚鵡。皎鏡芳塘暖共游。片帆重指莫愁村。好向南塘舊事論。桃葉滿江猶可渡。梨花如雪不開門。隔窗煙冷思秦女。尋夢風颺逐楚魂。欲結同心何處是。空山夜夜叫哀猿。一縷烟銷日未晡。箇人無賴倚窗窺。淺流脉脉終難渡。弱柳依依欲待扶。料得牆東憐宋玉。空教陌上憶羅敷。絲連藕斷渾閒事。對此踟躇計轉迂。已逐鈿車下碧霄。經春驀地動歸橈。曾隨月底修簫譜。漫向樽前試舞腰。鏡裏獨憐張靜婉。道傍最憶董嬌嬈。年來已作傷心樹。撩亂長條復短條。

東溝

一溝淺水碧灣環。紅板橋西柳可攀。日暮晴雲趁風去。隔江時露六朝山。

七夕詞

最好人間落葉時。宵分河曲慰相思。不知露冷香風起。開到秋花第幾枝。

陳章

字授衣。號絨齋。錢塘人。布衣。乾隆元年薦舉博學鴻詞。有孟晉齋集。

蒲褐山房詩話。揚州巖商所萃。喜招名士。以自重。而馬氏秋玉佩兮。小玲瓏山。尤爲席帽所歸。時盧雅雨任。使。又能奔走寒峻。於是四方輻輳。而浙人尤多。如全謝山。祖望。陳楞山。荊。厲太鴻。鶚。金壽門。陶農。篁村。元藻。及授衣弟江皋。尤以領袖稱。授衣詩上規韋王。下則錢郎。非戴石屏等。江湖小集所可並論也。

荷汀納涼

孤遊去塵遠。小坐戀烟渚。水風能清人。何地著炎暑。紅蕖媚明波。娟好如靜女。冷香灑生衣。淒若冒微雨。不逢入浦船。只有沙禽語。日暮凝碧雲。因思涉江侶。

西潭夜漁圖

秋潭夜氣澄。烟水滿寒綠。孤艇淡夷猶。蘆灣凡幾曲。涼月沙際生。亭亭耿如燭。知君豈爲魚。要令幽意足。且莫扣舷歌。恐驚鷗鷺宿。

遊攝山

朝臚涉風湍。暮策冒松霰。攬勝情已欣。出險心彌泰。度澗屢踏石。憩林一解帶。微涓注藥叢。頽陽麗崦外。足跡半吳越。默歎此遊最。幽篁裊孤磐。投宿知所在。攜月入荆扉。然鐙步香界。愛詢前遊人。夜靜引清話。繩牀養脚力。明欲領其槩。

僧樓坐清曉。雨在西南峯。忽然雲滃合。不見寺外松。殘梅飄歷歷。澀澗鳴淙淙。天影互明晦。山氣雜春冬。陸子鍾輝發高興。不顧窳冥濛。樓帽曳筇屨。予亦欣相從。名園叩幾處。危磴拾百重。風爐酌乳泉。石窟瞻金容。回頭望來處。但聞岩下鐘。巢禽競歸翼。遊客尋還蹤。帶溼轉蘿陰。門徑煙已封。

夏夜宿環溪

追涼昨有期。還尋舊宿處。雙鵝向客鳴。荷葉門前路。登閣盡殘霞。杳然平楚暮。草響農牧歸。野語籬根度。藤竹多清陰。幽意與心遇。所嗟縛塵勞。經過不獲屢。主人情最殷。埽牀兼治具。風吹林間酌。月照池邊步。夜深倦投席。水軒微滴露。晝暑氣難斂。轉枕輒復寤。驚魚靜還躍。繁螢飛且住。清絕愛荷香。披衣不待曙。

早春田家

爲農傍東臯。知時卽生理。歲酒尙有餘。獨酌茅簷底。宿雨澹杏花。微風活谿水。珍重數日閑。作勞自此始。

晚步劔池

晝遊夜復至。境靜了不同。疎星明澗底。人語春山空。僧扉待我掩。露滴松間風。

舟中望縹緲峯

但作孤峯峭。不似羣山巨。翠影落前灣。夕陽峯背暝。應是無行人。松花滿風磴。

孤泛

寒溪景蕭條。清幽復窅窅。偶然泛扁舟。不必有同調。林疎見山樓。岸曲隱漁釣。喧寂與曩殊。但覺所歷妙。密竹已夕陰。平岡尙殘照。搖搖興難盡。煙際孤鴻叫。

行庵坐雨

漠漠雲初合。蕭蕭竹作聲。雨喧人自寂。苔冷地逾清。幽鳥忽雙下。疎鐘時一鳴。茅檐猶點滴。樹杪夕陽明。

江上早行

侵朝沙際路。麥冷尙裝緜。幽鳥初辭樹。清江半入煙。迴橋藏釣艇。空谷響耕田。幾處晨炊絕。憂心祝稔年。

歸舟

負土荒山去。蒼茫欲雪天。江湖暫歸客。兄弟就衰年。濁酒孤鐙話。寒更一舸眠。薄田如可買。送老傍松阡。

落日放船好

落日放船好。沿緣出綠荷。低田分水急。高柳得煙多。欲罷當窗釣。時聞隔浦歌。江湖後歸客。閑詠意如何。

同太鴻話吳興舊遊和韻

春風陳迹已漫漫。爲話蘋香憶碧瀾。四月桑陰門巷綠。半城谿色市橋寒。老漁舉網銀刀出。少婦繰絲雪繭殘。果有心期不相負。三閩水閣未應難。

悼玉裁

雪涕同興宿草情。月襟水佩憶平生。蛾眉自昔嗟難嫁。牛耳從今失主盟。俊及清流叨合契。錢郎傑作讓齊名。海山兜率知難覓。聞道芙蓉別有城。

寄秋涇

亭臯落日惜分襟。滿樹桃花鴨鶻啼。春色漸歸芳草外。行人應近灞陵西。情深留別詩常記。路遠相尋夢易迷。九曲黃流如箭激。鯉魚可得斷書題。

鷗灘

廣叢鷗所家。水淺鳴還浴。月夜上春潮。飛向前灣宿。

雨後泛舟過篠園

谿流凡幾灣。荷葉欲無路。撐艇到籬門。一蟬吟碧樹。

夜過吳江

涼波如畫泛輕艫。夢醒秋衾月在牕。臥聽漁人煙外語。白荷花裏過吳江。

篠園水亭

枕簟茶瓜幽興長。柳深池館自生涼。片雲吹過西陂去。一片荷花無夕陽。

程廷祚

字啓生。上元人。諸生。乾隆元年薦舉博學鴻詞。有岫雲閣詩鈔。

贈顧進士復初

憲廟昔臨御。恩波覃八極。渙汗其大號。邱園交束帛。維時承平久。化成邁往昔。里巷聞絃歌。窮陬務修飭。聞命各戒裝。爭先赴上國。儒冠旣峩峩。征車復奕奕。或懷隨侯珠。或握荆山璧。或披蘭若新。或掣滄海碧。鳴珮集丹陛。心情接虹霓。就中星斗寒。鉅儒出無錫。讀書破萬卷。性同杜氏癖。著述窮歲年。鑽研入無隙。宣尼生周季。仰窺王迹熄。然後作春秋。萬古垂法式。筆削見是非。義存三代直。當時游夏輩。欲贊空太息。如何後世人。無端奮私臆。邱明見國史。事實頗能核。博會雖時有。網羅著勞績。齊魯多陋儒。厥惟高與赤。鄒夾未有書。莫由問失得。三家遂鼎峙。左氏仍後植。自茲口說勝。聖經嗟晦蝕。功令尊胡氏。學子徒守墨。首先革周正。先聖寧蹙額。一褒復一貶。譁張令人惑。褒貶本所無。安用常唧唧。忍使日月光。蔽虧重雲黑。先生蹙然興。掃除不遺力。百家咸披靡。似用大師克。煌煌大事表。卷軸日盈積。發憤闡闕文。塵埃教蕩滌。

曲說從此廢。禾稼驅螟螣。上則考天時。殷勤補長歷。下則綜形勢。聚米圖疆域。僭禮與敗度。亂賊暨戎翟。事事關大義。臚列各就職。載觀交兵篇。往來正如織。旌旗猶在眼。開卷若憑軾。晉楚爭夏盟。宋鄭困行役。向戍忽弭兵。難免司城責。五材民並用。戒懼存法則。霸統經再變。王猷竟永寒。人欲日橫流。瞻烏更誰適。竊取有深意。肯令鯁生識。君書出雖晚。重到杏壇側。鐘磬鏗然鳴。清音動四壁。憶昔鴻詞徵。余亦預末席。客居郊壇西。頗愛厥境僻。涼風下庭梧。朝昏玩羲畫。冥會得懸解。忽然塵慮釋。與君偕罷歸。十載臥泉石。著書曩未成。今也喜大獲。假令留青瑣。茲業諒俱寂。深荷皇天慈。慨然增感激。

翁照

字朗夫。號霽堂。初名玉行。字子靜。江陰人。乾隆元年。薦舉博學鴻詞。十六年。以經學徵。有賜書堂集。蒲褐山房詩話。霽堂少時曾奉教於邑西河太史西河序其詩。盛為推挹。常詠裴衣。有風雨一身秋之句。從此得名。後在浙幕中。詩亡失大半。今所刊賜書堂集。十之三。四。爾其為時傳諷者。則有一抹夕陽連漢苑。二分春色在蕪城。小樓夜半朦朧月。深院秋千澹宕風。青拂河橋風乍轉。綠昏江店雨初來。春寺煙深聞粥鼓。午塘風暖度錫簫。一聲啼鳥破春寂。數點落花生暮寒。殘月半痕巫峽晚。夕陽一半洞庭秋。關塞梅花愁裏曲。池塘芳草夢中詩。夾岸綠陰垂柳渡。滿篷紅雨落花天。沈椒園臬使云。先生年高。藤杖方袍。須眉朗映。其詩風致盎然。而神韻瀟灑。

送歸愚沈少宗伯予告歸里

片帆潞河來。相值在泚水。知公予告歸。南風指故里。敬讀御賜詩。千丈榮光起。載賡洵一德。眷注情無已。遭逢媿虞唐。進退善終始。公歸有程期。我老失準軌。離筵布南池。鳴蟬綠陰裏。無計更挽留。去去波如駛。

但願南風狂。維解舟仍艤。

憶昔初識公。其歲當壬午。兩地合雲龍。僑札通縞紵。吳門與暨陽。來往互賓主。屹屹商古今。經經訂出處。龍躍終升天。雲散難作雨。遙遙兩地分。間隔寒與暑。雲龍今復合。情深逾昔者。叶齒增易驚惕。道進無違拒。相期同惜陰。晚節師侃禹。

送公歸去來。悠悠返荷屋。作社赴雞豚。約伴同樵牧。引權香水溪。采芝硯山麓。誰識袞冕儔。依然抱黃犢。道充輕祿位。天定歸淳朴。我將還故林。老去愛雲木。三十三山間。結廬臥空谷。公能復來過。江皋路應熟。念舊話前程。草堂夜同宿。

涵秋亭小憩懷師十五南塘

疎林過微雨。返照明殘滴。獨立野亭中。蕭然起寒色。澄湖落雁斜。古渡啼鴉寂。不見遠歸人。楚天淡秋碧。

秋雨

旅泊滄江上。頻聞楚雨過。昏黃低雁陣。寒綠漲鷗波。氣逼孤燈暗。聲兼落葉多。故鄉餼菜好。何日着漁蓑。

重過張墨岑別墅

重尋方外侶。林壑認依稀。一逕入紅葉。數峰橫翠微。夕陽明笏笠。秋色上荆扉。纔到幽棲處。逢君采藥歸。

將之北河留別

織就文禽作對飛，一篝燈火久相依。耦耕當日言猶在，佐讀終年計轉非。但使我能拋犢袴，肯教君更泣
牛衣。料應不學蘇家婦，金盡歸來也下機。

贈沈侍御椒園

展卷光騰五朶霞，繚由忠愛發精華。詩宗杜老推雄抱，文泝昌黎屬大家。午夜疎燈焚諫草，春風小驛見
常花。懸知兄弟聯吟處，添得新詩護碧紗。

馬曰瑄

字秋玉，號嶰谷，祁門人。監生。居揚州。候補知州。乾隆元年薦舉博學鴻詞。有沙河逸老集。

晉樹亭坐雨同邵北崖程洪江陳竹町陸茶塢張西園弟半查分得坐字

入秋已浹旬，殘暑氣未挫。暑盛猶可逃，早甚真無那。今朝北郭苔，欣逢上客破。老樹垂千年，稗竹搖萬個。
颯然好雨來，晴風先滿坐。一時研席涼，幾處農人賀。擬作甘澤謠，君謔我當和。

爲寄舟上人題天池石壁圖

中吳山水佳，天池夙所慕。往歲恣行吟，曾踏松陰路。是時九月中，風葉落如雨。上涵明鏡光，倒影射寒兔。
石室千載留，高士幾回住。別來躡一紀，夢魂屢沿溯。寄公湯休流，文字契真悟。攜圖出示我，一見豁沉痼。
念往俗慮湔，懷新秋色赴。惜哉筋力衰，足蹇慚故步。持此當臥遊，白雲莽回互。

五月十二日集篠園

時候黃梅近。林亭宿雨晴。早荷爭水出。晚筍上階生。雲影過橋斷。茶聲隔院清。可憐城市客。無復此閑情。

擬復竹西亭和泝江太史

邗溝東畔竹西亭。歲歲尋遊感廢興。細雨斜廊還有井。蜀井在禪智寺夕陽秋寺欲無僧。幾時碧玉圍千个。依舊紅闌覆兩層。收取江南煙樹色。蒼茫祇借一枝籐。

甘露寺

斷磴猶存劫火銷。祇憑絕頂看金焦。我來十月霜風厲。紅葉飄零似六朝。

馬曰璐

字佩兮。號半槎。乾隆元年薦舉博學鴻詞。有南齋集。

西山擬常徵君述

幽思落巖穴。起尋山澗鐘。松風導我前。石磴希人蹤。落日辨遠樹。一片煙濛濛。氤氳花氣合。窈窕禽聲通。空翠望不極。雲歸知所終。況茲波上月。瑩魄明前峯。洲渚暝色至。蒲稗浮光重。此時閑眺聽。餘清貯心骨。

雁足燈歌

炎漢燈檠二十五。想見神壇照風雨。秀華細錯首山銅。未入歐陽一家譜。集古字遺西漢前。丹陽裴守搜。

荒烟暮來雁足燈銘古。榮宮造自黃龍年。何如吾家曩所得。自昔曾無弋人弋。瓜皮綠活土花鮮。蠶尾蠶頭月半蝕。絲文綠繫之半故云。初疑槃仿蓮勺形。漢蓮勺爐銘亦彎環如月。既認趾同鳥蹠青。老眼觀書夜行燭。年號依稀辨竟寧。竟寧年間屢郊時。火續燈傳接芳苴。麟鬚難以拂霜蛾。峇落蚌膏與鳳髓。不將歌舞挂樓頭。曲柄須煩黨伯舟。皎然細注輝齋壁。浙爾涼風裊素秋。墮葉紛紛窗戶裏。似有哀鴻拍秋水。炎光銷盡一咨嗟。開閣殘螢竹間起。

秋霽集看山樓得山字

秋色矜新霽。憑闌此解顏。雲涼花氣薄。天淨鳥行閒。喜有三間屋。還添一角山。何當諸勝侶。吟望不知還。

遊冷泉亭

鐘韻一星星。幽尋獨此亭。山從入寺好。泉欲過時聽。冷氣怯春服。清輝隱翠屏。我來巖下坐。刻石記曾經。

杭州半山看桃

山先燄燄映明霞。燕子低飛掠酒家。紅影到溪流不去。始知春水戀桃花。

張庚

字浦山。號瓜田。秀水人。監生。乾隆元年。薦舉博學鴻詞。有強恕齋集。

蒲褐山房詩話。浦山工於山水。世多以翰墨稱之。不知學問淹博。如通鑑綱目釋記。糾繆補註。極爲精審。古文節樸。五七言古體詩。頗見古人堂奧。丙子丁丑閒。君來往廣陵。常同樽酒。盡讀所著書。故

得悉其
深造

聽葉函齋談霍山之勝書此爲尋游之約

結廬南嶽下。耳目飽幽勝。一雨百泉鳴。高秋衆山靜。地僻無澆風。居人葆真性。聽談未及終。吾心已潛泳。請爲來歌期。再作誅茅訂。

游法慶寺

勝游敢後期。況乃秋容好。林吹聽方清。山氣攬逾顯。崇寮敞閑爽。仄徑入窈窕。烟篁旣深靄。雲闕還高造。逸境延冥搜。元情逮幽討。淪泉和石髓。纈裳貯瑤草。芳潔良自娛。冥微有誰攷。殘陽上遠峯。夕霏翳虛椽。側見帶羅人。勞心鬱懣懣。嘉惠不我疑。逝將信夙抱。

聽雨

曉夢忽泯漾。空庭春雨聲。浙瀝集芳樹。蕭散侵軒楹。迴風時一過。林鳥寂不鳴。重門尙未啓。虛幌覘已明。欹枕豈能寐。悵然生遠情。懷勞莫自歇。傷舊復多縈。大江日東逝。亂山杳西迎。客鬢霜雪積。故園無草平。方知衡泌客。寧讓安期生。

三橋峽

叢峯忽相合。蒼翠鬱沉幽。入深路逾峻。陡壁夾洪流。怪石皆側出。奇狀奚以侔。懸若列鈇刃。轟如攢長矛。

天府開武庫。森森眩人眸。隋磴間危棧。升降懷惕憂。乍看午景射。倏忽嵐陰稠。哀猿啼斷續。古木盤虯。奇花媚晚色。瘦竹清脩脩。於山歎觀止。於險驚絕儔。自笑白髮翁。有此南荒游。

大樹鋪山家

連峯翠無際。環列如圍屏。中有千幅田。灑灑畦水平。山村倚崖麓。灌木杳葱青。於時罷收穫。百室歡盈寧。園柑垂早黃。圃韭舒晚青。石泉瀉沙淺。野花被徑明。爭桀羣雞集。歸巷黃犢鳴。征夫方倦役。對此尤移情。酒香試新籩。樹酌依前楹。夕曛半隱見。浮嵐藹崢嶸。微風一相拂。秋氣彌以清。憶昨曾過宿。風雨昏冥冥。今來值霽爽。萬象粲自呈。栖栖感徂歲。僕僕悵勞生。誰曰夷俗陋。計將闢柴荆。

倪雲林溪山無盡圖

清闕高人標格奇。意趣豈復同凡兒。偶然適興寫山水。冷冽疑欲凌人肌。想是霞餐却火食。不然那得清如斯。此卷高尺長減仞。幽溪重複山逶迤。枯林一簇山之麓。林下深深置兩屋。蓋茅零落牆欲頽。屋後蕭疎映叢竹。柴門不閉闕無人。烟波迤漾平侵門。旁通略約亦將斷。舟楫沉齧洲沙痕。崇峯側嶺絕蹊。荒寒似寫亂後村。要是生當至元末。亂亡在在驚心魂。目有所傷手自應。豈惟迂癖成性存。此卷筆法尤可喜。細觀不與常作似。山石居然王右丞。樹木全偏營邱李。枯淡雖云是本色。神味須知備衆美。李君珍惜同隨珠。自云得之酒家胡。出以藉茅非偶爾。定是迂翁神與俱。

陳黃中

字和叔。號東莊。吳縣人。諸生。乾隆元年薦舉博學鴻詞。有東莊遺集。

蒲褐山房詩話。和叔爲少章先生子。校讐考訂。是其家傳。而和叔少時。即留心史學。頗以經濟自負。常遊督撫幕府。晚年歸家。病宋史繁蕪。如湯養仍王損仲。屢有刪故。皆未成書。因將宋史紀傳表共改定一百七十卷。但以未諳天文歷律。故各志尙屬闕如。歿後其稿本尙存于吳。下藏書家。詩不多作。彭尺木收而刻之。未爲完本。卽予所見。其在長沙作五言排律六麻一百韻。則已失之矣。

夜泊黃河口

永夜河聲壯。扁舟客思孤。山川雄兩戒。漕粟擁千艘。明月中流湧。歸鴻隔岸呼。一生江海意。對此獨踟蹰。

武昌登樓

行藏落拓漫登樓。楚塞山川四望收。納納乾坤懷管樂。滔滔江漢憶曹劉。五年重到仍爲客。此地從來說上游。水漲民饑風景惡。未知誰作徙薪謀。

胡鳴玉

字廷珮。青浦人。貢生。乾隆元年薦舉博學鴻詞。

初夏訪御李

喬木疎籬似畫圖。數椽老屋向城隅。隔林雨霽鳩呼婦。近戶風輕燕引雛。花委藥欄紅欲盡。草深蔬圃綠全蕪。知君剩有郢筒酒。許我池邊一醉無。君近日自蜀歸。

楊潮觀

字閔度。號笠湖。金匱人。乾隆元年舉人。官至瀘州知州。有吟風閣詩鈔。

瀘州山房詩話笠湖性情惆悵。工畫竹詩亦多傑句。尤工度曲。所著吟風閣傳奇如諸葛公夜渡瀘江。寇萊公思秋罷宴。詠劇聲情磊落。思致纏綿。雖高則誠。王實甫無以過也。子掄字方叔。掄字水叔。皆能詩。善駢體。著名於時。

雨中登劔閣

煙火迷秦塞。登臨帶雨來。鷹聲盤絕壁。虎跡破蒼苔。古戍風雲暗。重關劔戟開。時平天失險。空憶勒銘才。

牛頭山

于盤出劔閣。萬仞上牛頭。嶺勢雲中見。江聲地底流。連山風送雨。滿谷樹生秋。何處葭城小。深藏大壑舟。

魏公子無忌

太息夷門市井紛。信陵高躅想風雲。誠知天下無雙士。莫道當時有四君。屠僧監門登上客。婦人醇酒畢奇勳。可憐未冷英雄骨。動地函關又出軍。

登雅州城樓和觀察杜凝臺韻

千盤轉粟上青雲。使節籌量動夜分。尚有兵烽通夕照。未妨農耨遍朝曛。庾樓嘯起邊城月。嚴道春殘故壘雲。所喜年豐堪借箸。緩裘亦足張吾軍。

負戴千羣鳥道中。廟謨豈爲重邊功。風雲列陣原無戰。枕席行師偶未通。肯使唐蒙輕發卒。敢言魏絳且和戎。天威震疊須臾事。望氣應知率舞同。

城上頻傳叱馭聲。黎風雅雨倍關情。

音普兼
守雅州

山連相嶺遙飛鞚。江帶平羌近濯纓。望裏干戈銷舊壘。坐閒

鐘鼓報新晴。一絨訝許巴人和。筆陣空慙細柳營。

曹秀先

字冰持。號地山。新建人。乾隆元年進士。官至禮部尙書。謚文恪。

雄縣舟中

繞城一水自彎環。野色雲容各自閒。便當乘槎溯天漢。眼中只惜少名山。

途中雜詠

古道垂楊雨幾巡。披襟剛是晚涼新。平生愛讀秋聲賦。聽到蟬吟亦可人。

